

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcún de historia Jesús, tǎcá jniñu jeē ni sáha ya ni cajito yó. ² Te ni catee de tǎca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcún ná tǎca jnúhun ya, nde nuū ní quejéé. Te ni jeni ni na jéē suni íyó váha jeē tée cǎjí ná tǎca jnúhun yáha núū ní, amigo Teófilo. ⁴ Te súcuan te cuni ni jéē iyó ndáa tǎca jnúhun jeē ní cacastūhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni íyo ñn sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucún maá sūtū Aarón cúu ña. ⁶ Te ndindúú de cahíyo ndaā de nuū Yaā Dios, te ndaā vāha cásquicu de jniñu ndácu ley maá Jítóho yō Yaā Dios, cǎjito tǎca ñáyuu. ⁷ Te tú sēhe de íyó, chí ñahan númá cúu Elisabet, te je jéhnu ndindúú de.

⁸ Te ñn quiví te jéjníñu Zacarías nuū jniñu jeē cúu de sutū nuū Yaā Dios, chí ni quee quiví jeē ndívi grupo de. ⁹ Te ni casáha de sorteo, nájñuhun íyó costumbre sutū. Te ni sáha tocar Zacarías jeē quiví de ini cuarto ñi templo Jítóho yō Yaā Dios, te cahmu de sūje cútú. ¹⁰ Te hora jeē cayú sūje cútú, te tǎca ñáyuu cuehē cáhīn i fuera, cǎjicān tahu i. ¹¹ Te ni cane ñn ndajéhé maá Jítóho yō nuū de, ín ya lado

váha altar nuū jéhm̄u de sūje cūtú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíín de:

Zacarías, ma yūhu ró, chi je ni chih̄i Yaā Dios cuenta jeē ni jícān tahu ró. Te ñasih̄í ró Elisabet, scácu ña ñn sēhe yíí, te snání ró i Juan. ¹⁴ Te yōhyo cusī̄ ni rō. Te cuehē ñayuu cusī̄ ni jeē cácu i. ¹⁵ Chi cuyéhm̄u sēhe ró sáha máá Yaā Dios. Te ma cóho i vino ni ndixi cuíí. Te cunuú máá Espíritu Santo jíín i, nde ná tu cacu i. ¹⁶ Te sáha i jeē cuehē ñayuu nació̄n rō Israel ndīvicoo i nuū Jítoho i Yaā Dios. ¹⁷ Te xīhna gā Juan quīji nacani jnūhun Jítoho yō Jesús, te sáá te quīji ya. Te sáha i nájnūhun ni sáha Elías, tēe ni nacani jnūhun Yaā Dios jenahán, te coneváha i poder jeē nácani i jnūhun, nájnūhun ni coneváha Elías. Te sáha i jeē tāca tátá ndumanī de jíín sēhe de. Te suni sáha i jeē ñáyuu nīhni ni cuatáhú i nuū Yaā Dios, nduu i ñayuu ndaā. Súcuan sátūhva i ñayuu návāha candíje i máá Jítoho yō jeē quīji ya. Achí ndajéhé.

¹⁸ Te Zacarías ni cajnūhún de ya:

¿Ndese cucáhnu ni na núu jendaá cúu? Chi tēe jéhm̄u cúu ná, te suni jéhm̄u ñasih̄í ná, achí de.

¹⁹ Te ni cahān ndajéhé un jíín de:

Máá rí cúu Gabriel, te íne ri nuū Yaā Dios, jejnīñu ri nuū yā. Te ni tají yá ruhū vēji ri cahān rī jíín ró, te nácani ri jnūhun vāha yáha núū rō. ²⁰ Te jeē tu ní cándíje ró jnúhun ni cahān rī, te cuñíh̄ín ró, te ma cúu cahān rō, chi nde na cácu sēhe ró. Te squícu nahín jnúhun cáhán rī yāhá, na quée quīvī, achí ndajéhé.

21 Te ñayuu cáhīn ichi fuera, cándetu i Zacarías, te cájeni ni i na vé ni cuu jeē cucuée de ini cuarto i templo. 22 Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñn jeē ni stéén yā nuū de. Te máá seña na ni sáha de nuū i, chi ni cuñhín de.

23 Te nuū ni jínu quivī ni jejniñu de ini templo, te cuanuhun de vehe de. 24 Te ni cuu jecu quivī, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhén ña. Te jéni ni ña: 25 Súcuan ni sáha máá Jítóho yō jíin rí, te ni tejiyo ya jnūhun jeē cúcanu rī nuū ñáyuu jeē tú sēhe rí, jéni ni ña.

Jeē ní cachi ndajéhé jeē cacu Jesús

26 Te nuū iñú yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañūū Galilea. 27 Te ni jehēn yā nuū ñn sūchi síhí naní María. Te je ni cundaā jeē quijnáhan ña jíin ñn tēe naní José, te sēhe yucūn rey David cúu de. 28 Te ni quivī ndajéhé un núū ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhyo ndetū gā cúu ró núū tāca gā ñahan, áchí yá.

29 Te nuū ni jító ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíin ña. 30 Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. 31 Te jecūhun sēhe ró te scácu ró ñn sēhe yí, te snaní ró i Jesús. 32 Te kujéhu i, te conaní i Sēhe Yaā kujéhu téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey. 33 Te ní cáni ndacu i jniñu nuū ñáyuu

nación Israel. Te ma ndíhi cuiṭi jeē ndácu i jniñu. Achí ndajéhé.

³⁴ Yūcuán na te ni cajnūhún María:

¿Ndese coo jeē ni cáhān ní? Chi ná tu coo yih ná, áchí ña.

³⁵ Te ni cahān ndajéhé un:

Máa Espíritu Santo quiṭi siquī rō, te poder maá Yaā cujéhnū téyí sáha ñn jniñu jéhnū jíín ró. Te jeē yúcuān máa súchi lí jeē cácu, quiṭi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñn sēhe vēsú je jéhnū ña. Te vijna íyó íñū yoō jeē tuá cácahān ñayuu jeē cúu ña ñahan númá. ³⁷ Chi ndíhi-ni cuu sáha Yaā Dios, te tu íyó ni ñn jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuān, chí sáha ná táca jniñu ndácu Jitoho yō Yaā Dios, te na cóo jíín ná nájnūhun ni cachi ní, áchí ña.

Te máa ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quiṭi, te yachī cuahān María, ni caa ña yucu cuahān ña ñn ñuu región Judea. ⁴⁰ Te ni jinū ña vehe Zacarías, te ni cahān ña jíín Elisabet.

⁴¹ Te nuū ní jini Elisabet jeē cahán María jíín ña, te sūchi ñúhun chíji ña ni canda-ni i. Te ni cunuú Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhō ndetū gā cúu ró núū táca gá ñahan, jíín jéē yóhō ndetū sēhe ró. ⁴³ ¿Te ndese cúu jeē ní quee naná máa Jitoho rī nuū rī? Chi tu cújéhnū cuiṭi rī. ⁴⁴ Chi jeē ní jini-ni ri jnūhun ni cahān rō jíín rí, te sūchi ñúhun chíji ri ni canda i

jeē cúsġ ni i. ⁴⁵ Te nacā ndetū rō jeē ní candíje ró, chi squícu nahín tāca jnúhun ni cahān maá Jítóho yō jíín ró. Achí Elisabet.

⁴⁶ Yūcuán na te ni cahān María: Cáhán rī jeē kujéhnū ndasí máá Jítóho yō Yaā Dios, ⁴⁷ te cúsġ ni rī jíín Yaā Dios, Yaā jnáma ruhū.

⁴⁸ Chi ni sáha ya cuenta ruhū, vēsú tu cújéhnū rī.

Te na squícu rī jniñu ndácu ya.

Te nde vijna te tāca ñáyuu jeē nácacu, cahān i jeē yóhyo ndetū rī.

⁴⁹ Chi Yaā jnġ ndihġ poder, ni sáha ya jniñu jéhnū jíín rī.

Te Yaā ĩ ndoo cúu ya.

⁵⁰ Te ní cáni cundáhú ni yā tāca ñáyuu ndíso ĩyo nuū yā.

⁵¹ Ni sáha ya jniñu jéhnū jíín poder yā,

chi ni scúnu ya ñáyuu casándúxí máá,

⁵² te ñáyuu cácujeéhnū, ni quende ya jeē kujéhnū i.

Te ñáyuu ndahú chi ni sajeéhnū ya i,

⁵³ te ñáyuu cájiġ sōco ni jēhe ya jeē cáji vāha i.

Te ñáyuu cucá ní natají yá i súcuan-ni.

⁵⁴ Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náā ni yā jeē cundáhú ni yā yohó.

⁵⁵ Chi súcuan ni jejnūhun ya nuū tāca jíí yō,

nuū Abraham jíín táca yúcūn de jeē cóo ní cáni.

Achí María.

⁵⁶ Te ni condee ña jíín Elisabet nájñūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quivġ jeē scácu Elisabet sēhe ña, te ni scácu ña ĩn sēhe yí. ⁵⁸ Te tāca ñáyuu ndeé jajni jíín ña jíín táca jnáhan ña, ni cajini i jeē yóhyo ni

cundáhú ni Yaā Dios ña, te ni jengoo i ni cacahān i jnūhun sīñ ni jíin ña. ⁵⁹ Yūcuán na te nuū uná quiṽi jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuan cúu ñn jnunī nuū yíqui cúñu tāca sūchi yíñ hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. ⁶⁰ Te ni cahān naná i:

Ma cúu, chi Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ñn jnáhan ró nání súcuan, áchí i.

⁶² Yūcuán na te jíin seña ni cacajñūhún i tátá sūchí un ndese cúní de jeē cónaní i. ⁶³ Te máá de ni jicān ñn tutu, te ni tee de: Juan conaní i. Te tāca ñáyuu un ní canaa ni i cájito i. ⁶⁴ Te ni nduvāha Zacarías jeē ní cuñíñ de, te ni quejéé de cáhán de jeē yóhyo vāha Yaā cúu Yaā Dios. ⁶⁵ Te tāca ñáyuu ndeé yajni jíin de, yóhyo ni canaa ni i. Te ní yucu región Judea ni jitē núu tāca jnūhun yáha jeē súcuan ni cuu. ⁶⁶ Te tāca ñáyuu jeē ní cajini jnūhun, ni quejéé i cánacani ni i, te cácajnūhun jnáhan i:

¿Ndese coo na cuéhnu sūchi yáha? áchí i.

Chi máá Jítoho yō yóhyo ni sáha ya jeē vāha jíin i.

Jnūhun luu jeē ní nacani Zacarías

⁶⁷ Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

⁶⁸ Yóhyo vāha Yaā cúu máá Jítoho yō, Yaā Dios yohó ñáyuu Israel,

chi ni quiji ya nuū yō jeē cácuu yó ñáyuu yā, te ni jnama ya yohó.

⁶⁹ Te ni jeni ya ñn Yaā iyó poder jeē jnáma ya yohó, te Yaā ún cacu yucūn mozo yā rey David.

70 Chi súcuan ni jejnūhun ya, ni cacahān tāca téé ndoo ánuá jeē ní canacani de jnūhun ya jenahán.

71 Chi ni cacahān de jeē jnáma ya yohó núū jeē cájito uhū yohó, jíín núū jeē cáquitī ni nuū yō.

72 Chi ni cundáhú ni yā tāca jíí yō jijnáhan, te tu ní náá ni yā contrato íi yā.

73 Chi suu un ní jejnūhun téyí yá nuū jíí yō Abraham,

74 suu jeē jnáma ya yohó núū ñáyuu cájito uhū yohó, návāha cuajníñu yó núū yā, te ma yūhu yó i.

75 Te coo ndaā coo ndoo ánuá yō, cuajníñu yó núū yā tāca quívi jeē cótecu yō.

76 Te róhó súchi lúlí, cuu ró téé nacani jnūhun Yaā kujéhu téyí.

Chi cosnūu ró ichi núú maá Jítóho yō, návāha sátūhva ró ñáyuu, te sáá te quiji ya.

77 Te castūhun ró nuū ñáyuu maá yá jeē jnáma ya i, jíín jéé cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cundáhú ni yā yohó.

Jeē yúcuan tají yá maá Yaā jeē sáha jeē cúndijin ini anuá yō, quiji ya nde andiví,

79 návāha jecūhun ni yohó jéé cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo sīi ni yō. Achí Zacarías.

80 Te sūchi lúlí un ní jehnu i te ni ije i jíín jnúhun ya. Te ni condee i nde nuū ñúhun téhé ndé quiví ní quenda ndijin i nuū ñáyuu Israel.

*Jeē ní cacu Jesús
(Mt. 1.18-25)*

2

¹ Te ni cuu jecu quiṽī, te Augusto, tēe cúu rey, ni ndacu de jniñu jeē coo censo jeē núcosō síhví ndivii ñayuu ní cáhnu nuū ndácu de jniñu. ² Yáha cúu censo xīhna ñúhún jéē ní casáha de ná ni cuu Cirenio gobernador nación Siria. ³ Te ndivii ñayuu cuanungoo i ná ñuu ná ñuu maá i jeē nácuāha i síhví i. ⁴ Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de síhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo. ⁶ Te níni cáhīn de yūcuán te ni jinū quiṽī jeē cácu sēhe ña. ⁷ Te ni scácu ña sēhe yí núú ña, te ni chusúcún ña i sahma cuitá, te ni jequin ña i ini ñn nundōo núū yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhīn tēe cácuu pastor, te cándito de lanchi de ní niñu jecuáā nde yucu ún. ⁹ Te ñn sanaa-ni te ni cane ñn ndajéhé maá Jítoho yō nuū de, te nduva máá Jítoho yō ni ndindēe ní núú cáhīn de. Te yōhyo ni cayūhú de. ¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsi ndasí ni tāca ñáyuu: ¹¹ Chi vijna nde ini ñuu David ni cacu ñn Yaā jnama róhó, te máá Jítoho yō Cristo cúu ya. ¹² Te súcuan nacuni rō sūchi yíquin un, chi ñúsúcún i sahma cuitá te catú i ini ñn nundōo núū yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhīn ya jíin ndajéhé un, te cácahān yā jeē yóhyo vāha Yaā cúu Yaā Dios. Te áchí yá:

¹⁴ Yóhyo luu cújéhnu Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiñ ni yā jíin i.

Achí táca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíināhan de:

Na quíhín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

¹⁶ Te yachī cuangoo de, te ni nanihīn de María jíin José jíin súchi yíquín un, cátú i ini nundōo núu yéji quití. ¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. ¹⁸ Te ni canaa ni tāca ñáyuu cájini nahín i jnūhun cácahān tēe cácuu pastor. ¹⁹ Te María, ni quendōo tāca jnūhun yáha nuū jeē níjnūní ña, te nácani ni ña siquī. ²⁰ Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī tāca jéē ní cajini sōho de jíin jéē ní cajito de, chí ni squícu nahín nájnūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chí síhví yúcuán ní cachi ndajéhé yā nuū María nde ná tu jecūhun i.

²² Te ni jíinu quiví jeē casquícu ña costumbre jeē ndúndoo ña nuū Yaā Dios jíināhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá

Jítóho yō Yaā Dios. ²³ Súcuan ni casáha de, chi yósó núū tútu ley yā: Tāca súchi yíí núú jéē cácacu, quihi cuenta i nuū Jítóho yō Yaā Dios, achí tutu. ²⁴ Te suni cuasocō de nájnūhun cáhán ley maá Jítóho yō: Socō rō uū livi chí úū paloma, achí tutu.

²⁵ Te ni īyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te máá Espíritu Santo íyó yá jíin de. ²⁶ Te je ni castūhun yá nuū de jeē ma cúū cuii de chi nde coto de nuū Cristo jeē tají maá Jítóho yō Yaā Dios. ²⁷ Te ni steén yā nuū de jeē quihín de templo quiiví ún. Te suni tátá naná sūchi yíquin Jesús, ni quivícoo de ini templo jíin i, jeē nácuāha de i nuū Yaā Dios nájnūhun cáhán ley Moisés. ²⁸ Te Simeón ni ñunundee de i, te ni cahán de jeē yóhyo váha Yaā cúu Yaā Dios, te áchí de:

²⁹ Tátā Yaā Dios, vijna te cuu cuāha ni jnúhun jeē cuu ná, chí je ni cusí ni ná.

Chí je ni squícu ní jnúhun ni jejnūhun ní núū sãña jéé cúu ná mozo ni.

³⁰ Chí ni jito jíinúū na núū Yaā jnama sãña jíjnáhan ná.

³¹ Chí ni jeni ní yá jeē jnama ya tāca ñáyuu ñayiví.

³² Te máá yá sáha jeē cúndijin ini anuá ñayuu tācá nación,

návāha jecūhun ni i siquī ní.

Te sáha ya jeē kujéhnu ñayuu maá ní Israel.

Achí Simeón.

³³ Te José jíin naná i cánaa ni de cájini nahín de jnúhun ni cahán Simeón siquī i. ³⁴ Te ni jicān tahu

Simeón jehē de jíjnáhan de, te ni cahān de jíín náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichī ni cuehē ñayuu i. ³⁵ Te súcuān te quenda ndijin ndese cájeni ni tāca ñáyuu. Te máá ró chi jnahuhū ndasí ni rō coto ró jeē ndóho i. Achí Simeón.

³⁶ Te suni íne ñin ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíín yñ ña uxā cuiyā. ³⁷ Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe iī, chi jéjníñu ña nuū Jítóho yō Yaā Dios nduú ñuú, te ndite ni ña te jícán tahu ña. ³⁸ Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jíín táca ñáyuu Jerusalén jeē cáñuhun ni i jeē quee Yaā jnama i.

Jeē cuánungoo de ñuu Nazaret

³⁹ Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañū Galilea. ⁴⁰ Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíín i.

Jeē íne sūchi lulí Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴² Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quivī víco ún. ⁴³ Te ni yáha vico, te cuanungoo de. Te sūchi lulí Jesús, ni quendōo i

Jerusalén, te tu ní cájini José jíin náná i. ⁴⁴ Te cájeni ni de jeē cuahán i mēhñu ñáyuu cájica ichi ún. Te ni cajica de ñin quivī, te sáá te ni cananducú de i mēhñu táca jnáhan de jíin ñáyuu cájini jnáhan de jíin. ⁴⁵ Te tu ní cánanihīn de i. Te ni canandicó de cuangoo de Jerusalén, cuananducú de i.

⁴⁶ Te nuū uní quivī te ni cananihīn de i ini templo, néne i mēhñu tée cástéén tutu ley Yaā Dios, te jíini nahín i jeē cácahān de te cájnūhún i de siquī jnūhun ún. ⁴⁷ Te tāca ñáyuu cájini jnūhun cáhán i, cánaa ni cájito jeē váha cájí xínī i te vāha nástíó cuíñí i jnūhun. ⁴⁸ Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rī cánanducú rí rohó, achí ña.

⁴⁹ Yūcuán na te ni cahān i:

¿Naun cánanducú ní sãña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jnūhun ni cahān i.

⁵¹ Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo tāca jnūhun yáha núū jeē níjnūní ña. ⁵² Te Jesús ni jehnu ga i, te ni cundíchí gá i, te cúshī ni Yaā Dios jíin i, te suni súcuan tāca ñáyuu.

Jnūhun Juan tēe scuándute
(Mt. 3.1-12; Mr. 1.1-8; Jn. 1.19-28)

3

¹ Te ni cuu xahūn cuiyā jeē ndácu Tiberio jniñu ní naciún. Te Poncio Pilato cúu de gobernador Judea, te Herodes cúu de gobernador Galilea, te

ñani de Felipe cúu de gobernador Iturea jíin Traconite, te Lisantias cúu de gobernador Abilinia. ² Te sutū cujéhnū ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. ³ Te ni jica nuu de tācá ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán: Coo ñn tēe cana jee nde nuū ñūhun téhé: Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā, te tācá yucu jíin loma na ndúnduhvā, te na ndúyóhó ichi yácuá, te na ndúlñi ichi ndáyí. Te ndihí un cúu jeē ndúvāha ndundaā anuá ñayuu nuū yā.

⁶ Te ndihí i cuni i jeē jnáma Yaā Dios i. Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núū castigo xeēn jeē quiíji? ⁸ Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje vāha, te núu cúní yā. ⁹ Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo

xeēn, nájñūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñayuu un ní cacajñūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jēē cánevāha uū sahma, na cuáha ró ñn nuū jeē tu névāha. Te róhó jēē cánevāha jeē yéji, suni súcuan na sáha ró, áchí de jíin i.

¹² Te suni jecu tēe cástútú xūhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajñūhún jecu soldado:

Te máá ná, ¿ndese sáha ná jíjnáhan ná? áchí de.

Te ni cahān Juan jíin de:

Ma quénde rō ndajniñu ni ñn jíin jnúhun siúhú ni jíin jnúhun stáú yáhu, te cusñ ni rō jíin yáhu ró, áchí de.

¹⁵ Te tāca ñayuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

¹⁶ Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñn Yaā jeē nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te cújéhnú ndasí yá, chi tú na vé jéhnú cuiñi cúu ri nuū yā, ni jeē cuajniñu ri nuū yā vēsú ñn jniñu lúlí gá nájñūhun jeē ndají rí vēsú correa ndijēn yā. ¹⁷ Te sáha ya nájñūhun sáha tēe scánda trigo, chi sásñn ya ñayuu vāha jíin ñayuu

cunéé, nájnūhun cúndoo trigo jeē quéndá s̄n paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

¹⁸ Te súcuan te jíin cuéhē gā jnūhun ni stihví ni de ñayuu un, ní nacani de jnūhun vāha Yaā Dios nuū i. ¹⁹ Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. ²⁰ Te sa víhyá gā ni sáha de jeē néé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quiví Juan vecāa, ná ni ine de ni scuándute de tāca ñáyuu, te suni ni scuándute de Jesús. Te jícán tahú yā, te ni nune-ni andiví. ²² Te ni cuun Espíritu Santo ni quee xinī yā, te cáa nájnūhun ñn paloma. Te ichi ándiví ní cahān ñn jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jnūhun, te íyó yá nájnūhun ocō uxī cuiyā. Te cájeni ni ñayuu jeē sēhe José cúu ya. Te José ni cuu sēhe Elí, ²⁴ te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, ²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, ²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá,

²⁷ te Judá ni cuu sêhe Joana, te Joana ni cuu sêhe Resa, te Resa ni cuu sêhe Zorobabel, te Zorobabel ni cuu sêhe Salatiel, te Salatiel ni cuu sêhe Neri, ²⁸ te Neri ni cuu sêhe Melqui, te Melqui ni cuu sêhe Adi, te Adi ni cuu sêhe Cosam, te Cosam ni cuu sêhe Elmodam, te Elmodam ni cuu sêhe Er, ²⁹ te Er ni cuu sêhe Josué, te Josué ni cuu sêhe Eliezer, te Eliezer ni cuu sêhe Jorim, te Jorim ni cuu sêhe Matat, ³⁰ te Matat ni cuu sêhe Leví, te Leví ni cuu sêhe Simeón, te Simeón ni cuu sêhe Judá, te Judá ni cuu sêhe José, te José ni cuu sêhe Jonán, te Jonán ni cuu sêhe Eliaquim, ³¹ te Eliaquim ni cuu sêhe Melea, te Melea ni cuu sêhe Mainán, te Mainán ni cuu sêhe Matata, te Matata ni cuu sêhe Natán, ³² te Natán ni cuu sêhe David, te David ni cuu sêhe Isaí, te Isaí ni cuu sêhe Obed, te Obed ni cuu sêhe Booz, te Booz ni cuu sêhe Salmón, te Salmón ni cuu sêhe Naasón, ³³ te Naasón ni cuu sêhe Aminadab, te Aminadab ni cuu sêhe Aram, te Aram ni cuu sêhe Esrom, te Esrom ni cuu sêhe Fares, te Fares ni cuu sêhe Judá, ³⁴ te Judá ni cuu sêhe Jacob, te Jacob ni cuu sêhe Isaac, te Isaac ni cuu sêhe Abraham, te Abraham ni cuu sêhe Taré, te Taré ni cuu sêhe Nacor, ³⁵ te Nacor ni cuu sêhe Serug, te Serug ni cuu sêhe Ragau, te Ragau ni cuu sêhe Peleg, te Peleg ni cuu sêhe Heber, te Heber ni cuu sêhe Sala, ³⁶ te Sala ni cuu sêhe Cainán, te Cainán ni cuu sêhe Arfaxad, te Arfaxad ni cuu sêhe Sem, te Sem ni cuu sêhe Noé, te Noé ni cuu sêhe Lamec, ³⁷ te Lamec ni cuu sêhe Matusalén, te Matusalén ni cuu sêhe Enoc, te Enoc ni cuu sêhe Jared, te Jared ni cuu sêhe Mahalaleel, te Mahalaleel ni cuu sêhe Cainán, ³⁸ te Cainán ni cuu sêhe Enós, te Enós ni cuu sêhe Set, te Set ni cuu sêhe Adán, te Adán ni cuu sêhe Yaā Dios,

chi ni sáha ya de.

Jeē ní jito ndee jexeén Jesús
(Mt. 4.1-11; Mr. 1.12-13)

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sáha Espíritu Santo. ² Te ni ine ya yūcuan úū xico quiṽī, te ni jito ndee jexeén yā, chi cúní jeē sáha ya cuēchi. Te tāca quiṽī ún tu ní yéji cuiṽi yā, te ná ni yāha quiṽī ún, te jíí yā sōco. ³ Yūcuán na te ni cahān jexeén un jíín yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíín:

Tuú chi yósó núu tútu iī: Nasūu máni máá jíín stāā cátecu ñayuu, chi suni jíín táca jnúhun cáhán Yaā Dios, achí yá.

⁵ Yūcuán na te cuahān jexeén un jíín yá nde xinī ñn yucu súcún, te ñn núnúu-ni ni steén nuū yā tācá nación ñí cáhnu ñayṽí. ⁶ Te ni cahān jíín yá:

Nuū maá ró cuāha ri jeē cujéhnu ró núu ndivii nación yáha, chi yōhyo luu cáa. Chi máá rí jññ ndíhi, te cuu cuāha ri nuū ndé ñn cúní rī. ⁷ Núu súcuan te núu cuiñi yíṽi ró chiñúhún ró ruhū, te cuāha ndíhi ri nuū rō. Achí jexeén.

⁸ Te ni cahān Jesús jíín:

Satanás, cujiyo quihīn rō, chi yósó núu tútu jeē chiñúhún ñayuu maá Jítóho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te sīngava ró máá ró nde nuū ñūhun, chí jnama ya rohó. ¹⁰ Chí yósó núu tútu:

Tejníñu ya ndajéhé yā quijicoo coto róhó.

¹¹ Te cunundee yā rohó jíináhan ya, návāha ma cáchihi ró jéhē rō nuū yuú.

Achí tutu. Achí jexeén.

¹² Te ni cahān Jesús:

Tuú chí suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

*Jeē ní quejéé Jesús nácani ya jnūhun región Galilea
(Mt. 4.12-17; Mr. 1.14-15)*

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jītē núu jnūhun ya. ¹⁵ Te ni steén yā jnūhun ini tǎcá vehe iī sinagoga, te ndihí ñayuu ni cajejnúhún i ya.

*Jeē cuánuhun yā ñuu Nazaret
(Mt. 13.53-58; Mr. 6.1-6)*

¹⁶ Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe iī sinagoga, nájñūhun sáha sáha ya. Te ni ndocuiñi yā jeē cahu ya tutu iī. ¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihīn yā nuū yosó jnúhun ni cahu ya:

¹⁸ Espíritu maá Jitoho yō Yaā Dios iyó yá jíin rí,

chi ni tejníñu ya ruhū jeē nácani ri jnūhun vāha nuū ñáyuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cá cucuíhyá ni.

Te castūhun rí nuū ñáyuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

¹⁹ Te nacani ri jnūhun jeē ní quee tiempo jeē sáha Jitoho yō Yaā Dios jeē váha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū téē jéjníñu ini sinagoga, te ni nucōo ya jeē steén yā jnūhun nuū ñáyuu cáhīin ini sinagoga. Te tācá i cájito vāha i nuū yā. ²¹ Te ni quejéé yá cahán yā jíin i:

Vijna te ni squícu jnūhun cáhán tutu iī yāha ní cajini sōho ró, áchí yá.

²² Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajnūhun jnáhan i:

¿A násūu séhe José cúu tēe yáha?

²³ Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúní cahān jeē nájnūhun ni nasávāha ri cuehē ñayuu cácuñū ini ñuu Capernaum ni canihīn rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

²⁴ Te ni cahān gā yā:

Jendaá cahán rī jín ró, ni ñn tēe nacani jñuhun Yaā Dios, tu cájetáhú ñayuu ñuu maá de nuū de. ²⁵ Te suni jendaá cahán rī jín ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jñuhun Yaā Dios. Te tiempo un tu ní cúun cuiṭi saū unī cuiyā yosáva, te ni íyo ñn jnamā xeēn ñí cáhnu nación. ²⁶ Te tu ní tájí Yaā Dios Elías quihín de nuū ni ñn ñahan viuda nación yō Israel, chí nuū máá ñn-ni ñahan viuda jeē ndeé ñuu Sarepta ndañúū Sidón, ni jehēn de ni jito de jeē ní yeji ña. ²⁷ Te ini nación yō Israel suni ní íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jñuhun Yaā Dios. Te ni ñn de tu ní cándíje jeē ndúvāha de sáha Eliseo, chí sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tāca ñáyuu cáhīn ini sinagoga, yōhyo ni caquiṭi ni i jñuhun ní cahān yā. ²⁹ Te ni candocuiñī i, te ni caquenehen i ya yatā ñúū ún, cuahān i jín yá xinī yúcu íne ñuu ún, chí cáconi i chundahá i ya ñinga ya cava ún. ³⁰ Te tu ní cúu sáha i, chí ni yāha-ni ya mēhñú i cuahān yā.

Jeē ní quenehen ya tachī ini ñn tēe

(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jñuhun nuū ñáyuu. ³² Te ni canaa ni i cájini i jñuhun steén yā. Chí ni steén vāha ya nuū i, chí jíní vāha máá yá.

³³ Te ini vehe sinagoga un íne ñn tēe jeē ñuhun tachī xeén ini de. Te tēe un ní cana cóhó de:

³⁴ Cuijiyo ní. ¿Naun vēji ní núū na jínáhan ná, Jesús ñuu Nazaret? ¿A vēji ní jēe snáa ni sáña, chí

naún? Je jíni na ndé ñn cúu ní, chi Sēhe ñ Yaā Dios cúu ní. Achí de.

³⁵ Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de. ³⁶ Te ndihi ñayuu un ní cayūhú i, te ni cacahān i jíin jnāhan i:

¿Na jnūhun cúu yāha jéē ní cuu súcuan? Chi cújéhnú tēe yáha jéē ndácu ñihin de jniñu nuū tachí, te quéndacoo-ni, áchí i.

³⁷ Te jnūhun ya ni jitē núu cuahān ñí cáhnu región yūcuán.

*Jeē ní nasávāha ya naná chīsó Simón Pedro
(Mt. 8.14-15; Mr. 1.29-31)*

³⁸ Yūcuán na te ni quenda Jesús ini vehe ñ sin-agoga, te cuahān yā te ni jinū yā vehe Simón. Te naná chīsó Simón, yíhi xeēn quíji ña, te ni cacahān ndahú de jíin yá jehē ña. ³⁹ Te ni jīta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuiñi-ni ña, te ni sáha ña jeē ní yeji yā jíin de.

*Jeē ní nasávāha ya cuehē ñayuu
(Mt. 8.16-17; Mr. 1.32-34)*

⁴⁰ Te jeē ni quée niāndii, te tāca ñáyuu jeē iyó jnāhan i cácuñu ndinuū cuehyi, ni caquindeca i jnāhan i un núū yā. Te ni soó yá ndaha ya siquí ñn ñn i, te súcuan ni nasávāha ya i. ⁴¹ Te suni cuehē ñayuu ni quendacoo tachī ini i, te cácana cóhó táchī ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chí cájini jeē maá yá cúu Cristo, Yaā ní taji Yaā Dios.

*Jeē ní nacani ya jnūhun región Galilea
(Mr. 1.35-39)*

⁴² Te nuū ní cundijin, te ni quenda ya cuahān sīn ya yatā ñúū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i. ⁴³ Te ni cahān yā jíin i:

Suni cánuú jéē nacani ri jnūhun vāha nuū tāca gá ñuu síquī ndese ndácu Yaā Dios jniñu, chí jeē yúcuán ní taji yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tācá vehe i sinagoga.

*Jeē ní canihīn de cuehē chācá ni sáha ya
(Mt. 4.18-22; Mr. 1.16-20)*

5

¹ Te iin quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chí cácuni i cuni nahín i jnūhun Yaā Dios. ² Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cánacate de ñunu de. ³ Te ni quivī ya ini iin barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. ⁴ Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jni ró chāca, áchí yá.

⁵ Te ni cahān Simón:

Maestro, nĩ niñu ni casínga ná ñunu jeē jnĩ ná tí, te tu ní níhín cuítĩ ná ni ñn tí. Te jeē cahán maá ní súcuán, te na sínga tucu ná ñunu, áchí de.

⁶ Te ni casínga de, te ni quĩvícoo cuehē ndasí chāca, nde nducú táhndē ñunu de. ⁷ Te ni cacaja ndahá de nuū jnáhan de cáhĩn ini inga barco, na quĩjicoo chindéé ñájnáhan jín de. Te ni quecoo de, te ni cascútú ndĩ de tí ndĩndúú barco, te nde je yajni quēe barco. ⁸ Te ni jito Simón Pedro jeē súcuán ní cuu. Te ni jecuiñĩ yítĩ de nuū Jesús, te ni cahán de:

Cujiyo ní núū ná, chi tēe íyó cuéchi cúu ná, áchí de.

⁹ Chi máa de jín táca tēe cáhĩn jín de, ni cayūhú de jeē ní canihĩn de cuehē chācá un ní sáha ya.

¹⁰ Te suni ni cayūhú Jacobo jín Juan, ndĩndúú séhe Zebedeo, chi tēe chĩndéé ñájnáhan jín Simón cácuu de. Te ni cahán Jesús jín Simón:

Ma yūhu ró, chi nde vijna te sáha ri jeē nihĩn rō cuehē ñayuu candíje ruhū, nájnūhun ni nihĩn rō cuehē chācá. Achí yá.

¹¹ Yūcuán na te nuū ni jínūcoo de jín barco nuū ñūhun íchi, te ni castóo de ndihĩ ndajníñu de, te ni candiquĩn de ya cuango de.

*Jeē ní nasávāha ya ñn tēe ndóho cuehyĩ stehyú
(Mt. 8.1-4; Mr. 1.40-45)*

¹² Yūcuán na te íne Jesús ini ñn ñuu, te ni quee ñn tēe ndóho cuehyĩ stehyú. Te ni jito de nuū Jesús, te ni jecuiñĩ yítĩ de ní jequĩn de nuū de nde nuū ñūhun, te ni cahán ndahú de jín yá:

Jíní na jéē cuu sáha ní jéē nduvāha ná, te núu cúní ní, áchí de.

¹³ Yūcuán na te ni soó yá ndaha ya siquī de, te ni cahān yā:

Cúni rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ¹⁴ Te ni ndacu ya jniñu nuū de jeē ma cáchi cuiti de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núū yā, nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵ Te víhyá gā ni jitē núu jñuhun ya cuahān. Te ni cataca cuehē ñayuu jeē cúni nahín i jñuhun stéén yā, jíin jéē nasávāha ya i nuū tāca cuéhyī cándoho i.

¹⁶ Te máá yá cuahān sñn ya nuū tú ñayuu, te ni jicān tahu yā.

*Jeē ní nasávāha ya ñn tēe ndóho cuehyī ni íjin
(Mt. 9.1-8; Mr. 2.1-12)*

¹⁷ Te ñn quivī te stéén yā jñuhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tācá ndañū Galílea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñ. ¹⁸ Yūcuán na te ni quecoo jecu tēe, cándiso de ñn tēe ndóho cuehyī ni íjin, cátu de nuū ñn camilla. Te cánducú de squívī de tēe ún ini vehe, te caquin de nuū íne ya. ¹⁹ Te tu ní cániñ de modo quívicoo de jíin tēe un, chi cáyūcú chítú ñayuu. Te ni cacao de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēñu ñayuu. ²⁰ Te ni jini Jesús jeē cácdíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé ìn cúu tēe yáha jéé cahán de jnūhun ndevāha jeē quití ni Yaā Dios? Chi nasūu Yáā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ²³ Jeē uú jnūhun yáha, ¿ndé ìn yí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jníñu ri ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuñī te naquihin ró camilla rō, te quinhun rō vehe ró, áchí yá jíin de.

²⁵ Te ni ndocuñī-ni tēe ún, jíto jínúū ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. ²⁶ Te yōhyo ni canaa ni tāca ñáyuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyūhú i, te cacahān i:

Vijna te ni cajito yó jniñu jéhnu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ìn tēe stútú xūhun renta, naní de Leví, néne de nuū cutútú xūhun renta. Te ni cahān yā jíin de:

Condiquīn ruhū na quíhín yō.

28 Te ni ndocuñĩ de, te ni stóo de ndihi ndajniñu de, te cuahān de jíin yá.

29 Yūcuán na te ni sáha Leví ĩn vico cáhnu vehe de, jeē cúsiñ ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá. 30 Te tēe grupo fariseo jíin tēe cástéén tutu ley Yaā Dios, ni quejéé de cácahān de siquĩ tēe cáscuáha jíin yá, te ni cacajñuhún de:

¿Najehē cáyeji rō cájihi ró jíin tēe cástútú xúhun renta jíin tēe cásaħa cuēchi? áchí de.

31 Te ni cahān Jesús:

Ñayuu cáhıyo vāha, tu jíni ñuhún i tēe tájna, chi ñayuu cácuħú cúu jeē jíni ñuhún. 32 Te ruhú nasūu jéé véji ri cana ri ñayuu tú cuēchi, jeē cúu i nájnūhun ñayuu cáhıyo vāha. Chi sa suħva véji ri cana ri ñayuu cáhıyo cuēchi, jeē na nácani ni i te stóo i cuēchi i. Achí yá.

*Jeē ní cacajñuhún de ya siquĩ jeē condite ni
(Mt. 9.14-17; Mr. 2.18-22)*

33 Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhıyo ndite ni de te cájicān tahu de. Te tēe cáscuáha jíin máá ní, ¿naun tu cásaħa de súcuan? Chi cáyeji de cájihi de.

34 Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha ró jéé condite ni ñayuu cáhıin vico nándāha, te núu níni néne tēe nándāha? 35 Te quee quivĩ jeē cújiyo tēe ni nándāha, te quivĩ ún chí condite ni i. Achí yá.

³⁶ Te suni ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jenahán. Achí yá:

Ni ñn ñayuu tu jéhnde i ñn pedazo sahma jéé i, te nachuhun i nuū ñn sahma túhú i. Chi núu súcuan te stívi i sahma jéé i, te suni tu quíjnáhan jeē jeé un jíin jéē tuhú. ³⁷ Te tú ni ñn chúhun vino jeé ini ññi túhú. Chi núu súcuan, te vino jeé un ndatá ññi, te naa vino jíin ññi. ³⁸ Chi cánuú jéē cúhun vino jeé ini ññi jéé, te súcuan te quéndō vāha ndíndúú. ³⁹ Te ñayuu cájihi vino áva, tu cúní i coho i jeē jeé, chi jeē áva cúu jeē vāha ga, achí i. Achí yá.

Jeē ní cataxín de yoco trigo quíivī ndétātú
(Mt. 12.1-8; Mr. 2.23-28)

6

¹ Te ñn quíivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquín de ini ndaha de, te ni cayejí de. ² Te sava tēe grupo fariseo ni cacajnúhún de:

¿Najehē casáha ró jniñu jeē tu íyó vāha sáha ró quíivī ndétātú?

³ Te ni cahān Jesús jíin de:

¿A tu ní cácahu cuiñi rō tutu ndese ni sáha David, ñn quíivī jeē ni jíi de sōco jíin tēe cáhīn jíin de? ⁴ Te ni quíivī de ini vehe Yaā Dios, te ni quihin de pan ií jeē yosó ndijin nuū Yaā Dios. Te ni yejé de, te suni ni jēhe de ni cayejí tēe cáhīn jíin de. Te tú na ley jeé cáji ni ñn tēe, chi máa-ni sutū cuu caji. Te vēsú súcuan te tú na cuēchi ní íyo síquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétātú, áchí yá.

Jeē ní nduvāha tēe ni ichī ndaha

(Mt. 12.9-14; Mr. 3.1-6)

⁶ Te inga quivī ndétātú, suni ni quivī ya ini vehe iī sinagoga, te ni steén yā jnūhun. Te yūcuan íne iin tēe ni ichī ndaha váha de. ⁷ Te tēe cástéén tuțu ley jín tēe grupo fariseo, cájito yuhu de ya núu nasávāha ya tēe un quivī ndétātú, návāha nihīn de cuēchi siquī yā. ⁸ Te máá yá je jíní yā ndese cájeni ni de. Te ni cahān yā jín tēe ni ichī ndaha ún:

Ndocuiñī, te condichi rō mēhñu yáha, áchí yá.

Te ni ndocuiñī de, te ni jecondichi de mēhñu.

⁹ Yūcuán na te ni cahān yā jín de jínáhan de:

Na cájnūhun rí rohó iin jnūhun: ¿Ndesé cáhan ley siquī quivī ndétātú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéē cúu i? Achí yá.

¹⁰ Te ndéhé yá nuū de jeē cáyūcú de ní xiin ya. Te ni cahān yā jín tēe cúhú un:

Scáá ndaha ró.

Te ni scaá de, te ni nduvāha-ni ndaha de. ¹¹ Te yōhyo ni caquitī ni tāca tēe un, te ni quejéé de cándajnūhún de siquī Jesús, ndese cahni de ya.

Jeē ní nacāji ya uxī uū tēe apóstol

(Mt. 10.1-4; Mr. 3.13-19)

¹² Te ni cuu jecu quivī, te ni quenda ya cuacacān tahu yā nde yucu. Te ní niñu ni jicān tahu yā nuū Yaā Dios. ¹³ Te nuū ní cundijin, te ni cana ya tāca tēe cáscuáha jín yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya. ¹⁴ Te yāha cúu síhví

de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵ Mateo, Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē
(Mt. 4.23-25)

¹⁷ Te ni nanuu ya yucu jíin táca tēe un jēe cascuáha jíin yá, te ni jecuiñī yā ñn nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jēe ndúvāha i cuehyī cándoho i. ¹⁸ Te ñayuu jeē ñúhun tachī ini i, suni ni canduvāha i ni sáha ya. ¹⁹ Te ndivii ñayuu cácu ni i quehé i ya, chi súcuan ndúvāha i sáha ya jíin poder yā.

Jnūhun ñayuu yōhyo ndetū jíin ñáyuu jeē xeēn ndoho
(Mt. 5.1-12)

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēe cándoho ndáhú, chi quivī ró ñuu nuū ndácu Yaā Dios jniñu.

²¹ 'Yōhyo ndetū rohó jēe cájīi sōco vijna, chi quiiji quivī jeē ndutú chíji ró.

'Yōhyo ndetū rohó jēe cándahyū rō vijna, chi quiiji quivī jeē cuecú rō.

²² 'Yōhyo ndetū rō te núu cáquīī ni ñayuu nuū rō jeē siquí ruhū, Yaā ní nduu tēe, te cásquéhichī i rohó, te cácahān neé i nuū rō, te cácahān i jeē ñáyuu casáha jniñu neé cácuu ró. ²³ Te na cóo siñi ni rō quivī sáha i súcuan, te víhyá gā na cúsiñi ni rō, chi cáhnu téyí

coo tahū rō nde andiví. Chi suni súcuan ni casáha uhū tāca jíi i jíin téé ni canacani jnūhun Yaā Dios nde jenahán.

24 'Te nacā jeē xeēn ndoho róhó ñáyuu cucá, chi vijna-ni cúu jeē cáhīyo sīi ni rō.

25 'Nacā jeē xeēn ndoho róhó ñáyuu jeē víjna cáhīyo vetū chīji ró, chi quiiji quiivī jeē cuu rō sōco.

'Nacā jeē xeēn ndoho róhó ñáyuu jeē víjna cájecū rō, chi quiiji quiivī jeē nducuíhyá ni rō te ndahyū rō.

26 'Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cajejnúhún jíi i tāca téé ni canacani jnūhun stáhú ndé jenahán.

*Jnūhun jeē cundáhú ni yō ñáyuu cájito uhū yohó
(Mt. 5.38-48; 7.12)*

27 'Te cáhán rī jíin róhó jeē cájini sōho: Cundáhú ni rō ñáyuu cájito uhū rohó. Te sáha vāha ró jíin ñáyuu cáquitī ni nuū rō. 28 Te cacān rō jeē váha coo ñáyuu cácahān ndevāha síquī rō. Te cacān tahú rō jehē ñáyuu cácahān neé núu rō. 29 Te núu ndé téé cani de ñin lado yiqui núu rō, te vāha ga suni cuāha ró inga lado cani de, vēsú jeē nácuāha ró jéē ndútahū de. Te núu ndé téé cúni de quende de ticāchi ró, suni cuāha ró jnūhun jeē na quíhin de jíin ndé camisa rō. 30 Te na-ni ñáyuu jicán nuū rō, te cuāha ró núu i. Te ñáyuu quíhin ndajníñu ró, ma nándacān rō. 31 Te nájnūhun cáconi rō jeē sáha vāha ñáyuu jíin ró, suni súcuan na sáha vāha ró jíin i.

32 'Chi núu íyó mánī rō jíin máá-ni ñáyuu jeē maní jíin ró, ¿te na vé jeē váha ga sáha ró núu súcuan? Chi nde téé casáha cuēchi, suni manī de jíin téé maní jíin máá de. 33 Te núu sáha vāha ró jíin máá-ni ñáyuu jeē casáha vāha jíin ró, ¿te na vé jeē váha ga sáha ró

núu súcuan? Chi nde tēe cásáha cuēchi, suni súcuan cásáha de. ³⁴ Te núu cuāha núú ró núū maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. ³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núú ró núū i. Te ma cuáha ró máá síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máá yá vāha ni yā jíin ñáyuu tu nácuatáhú núū yā jíin ñáyuu casáha néé. ³⁶ Núu súcuan te cundáhú ni rō ñayuu, nájnūhun máá Tátá rō cúndáhú ni yā i.

*Ma cahán yō síquī cuéchi jnáhan yó
(Mt. 7.1-5)*

³⁷ Ma cahán rō síquī cuéchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núū ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sánihin ya, te nde scáa ya cuāha ya nuū rō. Chi cūhva jeē cájéhe ró núū ñáyuu, suni cūhva un cuáha ya nuū rō. Achí yá.

³⁹ Te ni cahán yā ñn jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñn tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā?

⁴⁰ ñn tēe scuáha, tu cújéhnu de nuū maestro de. Te

tēe scuáha ún, núu je ni cutūhva vāha de, te jinū de coo de nájñūhun maestro de.

⁴¹ 'Te cuēchi jnáhan ró cúu nájñūhun jeē íne ññ yāca lúlí tññúú í. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájñūhun jeē íne ññ nduhu tññúú máá ró? ⁴² ¿Te naun cácahān rō jíín jnáhan ró: Condetu, na táva rī yāca íne tññúú ró, te tu cánacani ni rō jeē íne ññ nduhu tññúú máá ró? Tēe stáhú-ni cácuu ró núu súcuan. Xīhna gā tññúú máá ró tava rō nduhu, te yūcuán na te cuu condēhe váha ró jēē táva rō yāca tññúú jnáhan ró.

Jíín jniñu cásáha ñayuu te nácuni yō ndese ñayuu cácuu í

(Mt. 7.17-20; 12.34-35)

⁴³ 'Tu íyó yujnu váha jeē jéhe ndehē neé, te ni tu íyó yujnu neé jēē jéhe ndehē váha. ⁴⁴ Chi jíín ndéhē jeē jéhe ññ ññ yujnu, te jííní yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza. ⁴⁵ Te suni súcuan tēe vāha, cáhān de jñūhun vāha, chí vāha ánuá de. Te tēe sáha neé cáhān de jñūhun neé, chí cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān í.

Siquī uú vehe

(Mt. 7.24-27)

⁴⁶ '¿Najehē cácahān yiñúhún ró jíín rí: Jitoho ná, áchí ró, te tu cásquícu ró jniñu ndácu rí? ⁴⁷ Tāca ñayuu vēji nuū rī te jííní sōho jñūhun cáhān rī te squícu, na stéén rī nuū rō ndese cúu í. ⁴⁸ Cúu í nájñūhun ññ tēe jeē ní jeni de vehe de, te ni jete cúnú de nde ni nihīn de toto, te ni jeni de siquī.

Te nuū ní ndaa yūte, te ni chundahá vehe ún, te tu ní cánda cuiṭi sáha, chi siquī toto ín. ⁴⁹ Te tāca ñáyuu jíni sōho jnūhun cáhán rī, te tu squícu i, cúu i nájnūhun ìn tēe ni jeni de vehe de nuū ñúhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ìi-ni. Achí yá jíin i jíjnáhan i.

*Jeē ní nasávāha ya mozo capitán
(Mt. 8.5-13)*

7

¹ Te nuū ni jínu ni cahān yā ni cajini nahín ñáyuu ún, te cuahān yā ñuu Capernaum. ² Te ìn tēe nación Roma jeē cúu capitán, íyó ìn mozo de jeē manī ndasí de jíin. Te mozo un cúhú i te je yajni cuu i. ³ Te ni jini capitán jnūhun Jesús. Te ni tají de jecu tēe jéhnú cándacu jniñu nuū ñáyuu hebreo, cuangoo de nuū yā jeē cahán ndahú de jíin yá jeē na quíji ya sávāha ya mozo de. ⁴ Te ni jinūcoo tēe un núú Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe vāha cúu de. ⁵ Chi manī de jíin nación yō, te máá de ni ndacu jniñu ni cuvāha ìn vehe sinagoga cuu yó. Achí de.

⁶ Yūcuán na te cuahān Jesús jíin de jíjnáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhín, chi tu cújéhnú de jeē quihín ni quívi ní vehe de. ⁷ Jeē yúcuān tu ní sájéhnú de máá de jeē quíji de nuū ní, áchí de. Te máá jēē cahān-ni ní, te na ndúvāha-ni mozo de, áchí de. ⁸ Chi máá de suni ndíso jniñu de

ni casáha tēe cácujeñnu ga. Te cújeñnu de nuū tācá soldado de, áchí de. Te núu cáhán de jíin ñn tēe jeē na quíhín de, te cuahān de. Te núu cáhán de jíin inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jíin yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni ñn ñayuu candíje nihin súcuan, nájnūhun cándíje tēe ún, vēsú tēe nación tu jíní jnūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñn ñuu naní Naín. Te tēe cáscuáha jíin yá, jíin ñáyuu cuehē, suni cuangoo i jíin yá. ¹² Te ná ni cuyajni ya yuñū ún, te yūcuan ní quendacoo ñayuu jeē quíchindūji i ñn tēe suchí jéē ni jihī. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña.

¹³ Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndíyí ún, te ni jñi ya yejnū, te ni cajecuiñi tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñi, achí yá.

¹⁵ Yūcuán na te ni nucōo súchi ní jihī ún, te ni quejéé i nácahān i. Te ni nacuāha ya i nuū naná i. ¹⁶ Te ndivii ñayuu ni cayūhú i jeē ní cajito i, te

ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee ïn tēe cújēhnu nácani jnūhun Yaā Dios.

Te suni cácahān i:

Máa Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jitē núu jnūhun ya ní cáhnu región Judea jíin táca región yajni yūcuán.

Jeē ní taji Juan uū tēe nuū yā

(Mt. 11.2-19)

¹⁸ Te íne Juan vecāa, te tēe cáscuáha jíin de ni cacastūhun núu de jeē súcuan ni cuu tācá jniñu yáha. ¹⁹ Te ni cana Juan uū tēe ún, te ni taji de cuangoo nuū Jesús, návāha cajnūhún de ya núu máa yá cúu ndije Cristo jeē ní cachi Yaā Dios jeē taji yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni taji de sãña véjicoo ná cajnūhun ná nihín núu máa ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máa hora un ní nasávāha ya cuehē ñayuu cácuñu, jíin ñáyuu cándoho cuehyī xeēn, jíin ñáyuu ñūhun tachī ini. Te suni cuehē ñayuu cuaá ní ndundijin tinūú i ni sáha ya. ²² Te ni cahān yā jíin de:

Cuángoo te castūhun ró nuū Juan tācá jniñu ni cajito ró jíin jnūhun ni cajini ró. Te cachi ró nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú

jéē jnama Yaā Dios i. ²³ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahán yā jnūhun Juan jíin ñáyuu:

¿Na vé ni jécondēhe ró jijnáhan ró ndé nuū ñúhun téhé? ¿A ñin tēe jéni ñin jéni uū ni, nájñūhun ite jeē cánda sáha tachí? ²⁵ Te núu tuú, ¿te na vé ni jécondēhe ró núu súcuan? ¿A ñin tēe cúní cujéhu jeē ñúhun sahma lúu? Tuú chi cájini rō jeē tēe cáñuhun sahma lúu te cánducú tāca jéē cúsiñi, máni ini vehe rey cáyūcú de. ²⁶ ¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cáhán rī jíin ró jeē suu ni jecondēhe ró. Te cújéhu ga Juan yáha vēsú tāca gá tēe ni canacani jnūhun Yaā Dios. ²⁷ Chi jnūhun Juan cúu jeē ni cáhān Yaā Dios jeē yosó núu tútu iī:

Tají rí tēe nacani jnūhun ri cosnūú de ichi núú Cristo,

návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhán rī jíin ró jeē ini ñayīví yáha cújéhu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñuu nuū ndácu Yaā Dios jniñu, cújéhu ga de vēsú Juan. Achí yá.

²⁹ Te tāca ñáyuu jíin táca tēe cástútú xúhun renta, ni cajini i jnūhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan.

³⁰ Te tēe grupo fariseo jíin tēe cástéén tutu ley, ni casquéhichí de jnūhun jeē cuní Yaā Dios sáha ya jeē váha de, chi tu ní cájendute de nuū Juan. ³¹ Te ni cahán gā maá Jítóho yō:

Yāhá cachi rī ñn jñūhun yátá návāha na cúni rō ndese cúu ñayuu tiempo vijna. ³² Cúu i nájñūhun sūchi lúli cáhīn nuū yáhu cácasíquí i. Te cácana ndee i xinī jñáhan i: Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúli un jeē tu ní nújnahan ni i ni ñn, suni súcuan cándāa ró. ³³ Chi ni quiiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñūhun tachī ini de. ³⁴ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni rō, te chísóo jñūhun ró cacahān rō jeē máni máá jéé yéji rī jíhi ri vino. Te quíjnahan ri jíin tēe cástútú xūhun renta jíin táca gá tēe cásaaha cuēchi, achí ró. ³⁵ Te núu cúndichí ñn tēe jíin jñūhun Yaā Dios, te jíin jniñu sáha de te cájini táca gá tēe ndichí jeē ndichí de. Achí yá.

Jeē íne Jesús vehe Simón tēe fariseo

³⁶ Te ñn tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñn ñahan sáha cuēchi, ndéé ña ñuu yúcuán, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ñn frasco yuū luu jeē ñūhun chitú aceite perfume. ³⁸ Te íin yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñúú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñūhun Yaā Dios cúu tēe yáha, te cuni de ndese ñahan cúu ñahan yáha jeē

quehé ña de, chi ñahan sáha cuēchi cúu ña, jéni ni de. ⁴⁰ Yūcuán na te ni cahān Jesús jíin de:

Simón, cúní rī cahān rī jíin ró ñn jnūhun.

Te ni cahān maá de:

Cahān ní, Maestro.

⁴¹ Te ni cahān Jesús:

Ñn tēe jéhe núu xūhún, ni īyo uū tēe táu nuū de. Ñn de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēe un jéē náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ñn de coo manī gā jíin de? Achí yá.

⁴³ Te ni cahān Simón:

Jéni ni na jéē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jíto ya nuū ñahan ún, te ni cahān gā yā jíin Simón:

¿A jíto ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájnūhun íyó costumbre. Te ñahan yáha ní stáji ña jehē rī jíin ndute tñnúú ña, te ni nasíchí ña jíin ixi xíní ña. ⁴⁵ Te tu ní téchūhu ró ruhū nájnūhun íyó costumbre. Te ñahan yáha, nde jeē ni quívī ri vehe ró, tu jécuiñī ña jeē téchūhú ña jehē rī. ⁴⁶ Te tu ní chūhun ró aceite xinī rī nájnūhun íyó costumbre. Te ñahan yáha ní chuhun ña aceite perfume jehē rī.

⁴⁷ Núu súcuan te cáhán rī jíin ró jeē ni stéén ña jeē yóhyo manī ña jíin rí siquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū ñn ñayuu iyó jecu-ni cuēchi, te jecu-ni stéén i jeē maní i jíin rí, achí yá.

48 Te ni cahān yā jín ña:

Je íne cáhnu ni rī nuū tāca cuéchi ró, áchí yá.

49 Yūcuán na te ñayuu cáyeji staā jín yá, ni quejéé i cácahān maá i:

¿Ndé ñn ga cúu tēe yáha jéé cahán jeē íne cáhnu ni nuū cuéchi? áchí i.

50 Te Jesús ni cahān gā yā jín ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsñ ni rō. Achí yá.

Jnūhun ñahan ní cajejníñu nuū yā

8

1 Yūcuán na te ni cuu jecu quivī, te ni jica cuu Jesús tācá ñuu náhnu jín ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jín yá. 2 Te suni íyó jecu ñahan cájica jín yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī. 3 Te inga ña cúu Juana, ñasihí Chuza, tēe ndíso jníñu ini vehe Herodes. Te inga ña cúu Susana, jín cuéhē gā ñahan jeē cáchindéé ñáhán ña, jéhe ña tāca jéé jini ñúhún yá jín de jínáhan de.

Jnūhun yátá síquī tēe jéte trigo

(Mt. 13.1-9; Mr. 4.1-9)

4 Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā ñn jnūhun yátá jín i:

5 ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jitē yuhíchi. Te ni cajeñū ñayuu síquī, te ni cayeji saa. 6 Te jecu gā

ni jité nuū ñúhun yuū. Te ni cane, te ni ichī-ni, chi tú cuehē cajin. ⁷ Te jecu gā ni jité nuū náne iñu. Te inuú-ni ni canecoo iñu jíin, te ni jesi nuū. ⁸ Te jecu ni jité nuū ñúhun váha. Te nuū ní jehnu, te ni jēhe cuehē nunī, chi jeē ñin ñin ni jēhe nde ciento. Achí yá.

Yūcuán na te ni cahān jee ya:

Tāca rōhó jēē jíni sōho, na chúsóhó ró, achí yá.

Najehē cahán yā máni jnūhun yátá

(Mt. 13.10-17; Mr. 10-12)

⁹ Te tēe cáscuáha jíin yá ni cacajnūhún de ya na vé cuní cahān jnūhun yátá yáha. ¹⁰ Te ni cahān yā:

Róhó jíináhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnúhun yátá cáhán rī jíin sava ga i, návāha vēsú cájito i, te quéndōo i nájjnūhun jeē tú na vé ni cájito i. Te vēsú cájini sōho i, te ma jécūhun ni i.

Jeē ní castūhun cájí yá jnūhun yátá tée jéte trigo

(Mt. 13.18-23; Mr. 4.13-20)

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jité yuhíchi cúu nájjnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jité nuū ñúhun yuū cúu nájjnūhun ñayuu cájini jnūhun, te cájetáhú i te cácusī ni i jíin. Te tu cúcutú jnúhun ún ini anuá i. Te jecu-ni quivī cácandíje i, te núu ni quejéé jnúndóho, te cájica yátá i. ¹⁴ Te trigo jeē ni jité nuū náne iñu cúu nájjnūhun ñayuu cájini jnūhun, te cuangoo i te cácujeñu i jíin jniñu i jíin jéē cuní i cucúca i te coo sī ni i. Te tu íje i jíin jnúhun ya. ¹⁵ Te trigo jeē

ni jítē nuū ñúhun váha cúu nájnūhun ñayuu cájini nahín jnúhun ya, te cájniñ vāha i, chi íyó váha íyó ndáa anuá i. Te cáhije i jíin jnúhun ya, chi cá candíje vāha i.

Jnúhun yátá síquī lámpara
(Mr. 4.21-25)

¹⁶ 'Núu nástín ñayuu ñn lámpara, te tu jési i ni ñn síquī, ni tu jéni i chíji jito. Chí sa suhva jéni i nuū sucún, návaha cundijin nuū ñáyuu quívicoo vehe. ¹⁷ Te suni súcuan tu íyó ni ñn jnúhun sāhi jéē ma cúni ñayuu, chi ndihī tāca jnúhun cácahān i nane ndijin te cuni ñayuu.

¹⁸ 'Núu súcuan te na cúni sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máa jecu jeē jéni ni i jeē jiní i, sa suhva naa. Achí yá.

Náná yā jíin ñani yā
(Mt. 12.46-50; Mr. 3.31-35)

¹⁹ Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu. ²⁰ Te ñn ñayuu ni castūhun núu yā:

Náná ni jíin táca ñani ni cáhīn nuū quéhe, te cá cuni cahān jíin ní, áchí i.

²¹ Te ni cahān maá yá:

Suni náná rī jíin ñani rī cácuu ñayuu cájini sōho jnúhun Yaā Dios te cásquícu i, áchí yá jíin i.

Jeē ní jecuññī tachī ñhin jíin mar ni sáha ya
(Mt. 8.23-27; Mr. 4.35-41)

²² Te ñn quívī ni quívī ya ñn barco jíin téé cáscuáha jíin yá, te ni cahān yā jíin de:

Na yáha yó quíhīn yō inga lado mar.

Te ni cascáca de barco cuangoo de. ²³ Te níni cascáca de barco, te ni quixī yā. Te ni jequñhi ñn tachī níhin nuū mar, te je yajni chitú ndute ini barco, te ndúcú quée barco. ²⁴ Te ni castónnda de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñi-ni ya, te ni cahān yā nuū tachī níhin jíin núū mar. Te ni cajecuiñi-ni, te ni cuu nayúú íi-ni. ²⁵ Te ni cahān yā jíin tée cáscuáha jíin yá:

¿Naun tu cácaandíje ró?

Te máa de yōhyo ni cayūhú de, te cánaa ni de, te cácahān de jíin jnáhan de:

¿Ndé ñn ga cúu tēe yáha jéē nde nuū tachí níhin jíin núū ndúte ndácu de jniñu te cájetáhú jéē cahán de? Achí de.

Tēe Gadara jeē ndóho tachí

(Mt. 8.28-34; Mr. 5.1-20)

²⁶ Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea. ²⁷ Te nuū ní nanuu ya nuū ññuhun íchi, te ñn tēe ñnuu un ní quee de nuū yā. Te je ni cuu cuehē cuiyā ññuhun cuehē tachí ini de. Te tu ññuhun cuiñi de sahma, ni tu ndéé de vehe, chi sa suhva nuū cáyindūji ndīyi ndeé de. ²⁸ Te ná ni jito de nuū Jesús, te ni jecuiñi yití de nuū yā, te ni cana cóho de:

¿Naun vēji ní núū ná, Jesús Sēhe Yaā cujéhnu téyí? Cáhán ndahú ná jíin ní jeē ma stóho ní sáña, achí de.

²⁹ Súcuán ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē jínu sáha xeēn tachí jíin de. Te cájihni ñayuu

ndaha de jehē de jíin cadena, návāha tú na vé sáha de. Te ndihí-ni jéhnde de, te jínu de jéhén de nde nuū ñúhun téhé sáha tachī ún. ³⁰ Te Jesús ni cajnūhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chí ñúhun cuehē tachī ini de. ³¹ Te ni cacahān ndahú táchī un jíin yá jeē ma taji yá quihīn ini tūhnchi cúnú. ³² Te yucu yúcuan cáhīn cuehē quīnī cájitu ti. Te tachī jeē cáñuhun ini tēe un ní cacahān ndahú jíin yá jeē na cuáha ya jnūhun quīvīcoo ini quīnī ún. Te ni jēhe ya jnūhun. ³³ Te ni quendacoo tachī ún ini tēe ún, te ni quīvīcoo ini quīnī. Te quīnī un ní cajinu ti ni nīngoo ti in yucáva, ni quīvīcoo ti nuū mar, te ni ndaquihī ti ndute, ni cajihī tī.

³⁴ Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñuu un jíin ñáyuu tāca rancho. ³⁵ Te cuangoo ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachī ini, néne de nuū jehé Jesús, te ñúhun de sahma, te je ni nducájí xínī de. Te ni cayūhu ñáyuu ún. ³⁶ Te tēe ní cajito ni canacani de jnūhun nuū ñáyuu, ndese ni nduvāha tēe ni ñuhun tachī ini.

³⁷ Yūcuán na te tāca ñáyuu ní región Gadara, ni caquejéé i cacahān ndahú i jíin yá jeē na cújiyo ya quihīn yā, chí yōhyo cáyūhú i. Te ni ndīvī ya ini barco jeē quīnuhun yā. ³⁸ Te tēe jeē ní quendacoo tachī ini, ni cahān ndahú de jíin yá jeē na cuáha ya

jnūhun quihīn de jíin yá. Te Jesús ni cahān yā jeē na quéndōo de, te áchí yá:

³⁹ Cuánuhun vehe ró, te nacani ró jnúhun ndese yōhyo jéhnū jniñu ni sáha Yaā Dios jíin ró, achí yá jíin de.

Te cuahān de, te ni nacani de jnūhun ní ñuu ún, ndese yōhyo jéhnū jniñu ni sáha Jesús jíin de.

Jnūhun sēhe síhí Jairo jíin ñahan ní quehé yusáhma ya

(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusī ni i jeē ní najinū yā, chí ndihí i cándetu i ya. ⁴¹ Te ni quee ñn tēe cújéhnū ini vehe íi sinagoga, naní de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihín yā jíin de vehe de. ⁴² Chí íyó ñn sēhe síhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i.

⁴³ Te mēhñu ñáyuu un cuáhān ñn ñahan cúhú jeē ní cuu uxī uū cuiyā ndóho ña cuehyī niñī. Te ni jexin ña tāca jéē névāha ña jíin tēe tájné, te tu ní ndúvāha ña sáha ni ñn de. ⁴⁴ Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

⁴⁵ Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhīn jíin de, ni cacahān de:

Maestro, jító ní jéē ñáyuu cuehē yāha ní chitú níhin i xiin ní, te cáqũhi i níhín, te cájnūhun ní ndé ñin ni quehé sahma ní.

⁴⁶ Te ni cahān Jesús:

Tuú chi ñin ñayuu ni quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jéē tu ní cúu coo yuhu jeē ni sáha ña. Te quísi i ña ni quee ña, te ni jecuiñi yití ña nuū jehé yā. Te jító jíinúū tāca ñáyuu, te ni cachi cají ña najehē ni quehé ña yusáhma ya, jíin jéē ní nduvāha-ni ña. ⁴⁸ Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhán te na ndúsñi ni rō, achí yá.

⁴⁹ Te níni cáhán gā yā súcuan, te ni quee ñin tēe vēji vehe Jairo, tēe cújéhu ini sinagoga, te ni cachi nuū de:

Je ni jihī sēhe síhí ní. Te ma sájnéñu ga ní Maestro, achí de.

⁵⁰ Te ni jini Jesús jnūhun yáha, te ni cahān yā jíin Jairo:

Ma yūhu ró, chi candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jéhe ya jnūhun quívi ñayuu jíin yá, chi máá-ni Pedro jíin Juan jíin Jacobo jíin tátá naná sūchi síhí un. ⁵² Te cácuquíhyá ni ndíhi ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jíináhan ró. Tu ní jíhí i, chi quíxí-ni i, achí yá.

⁵³ Te ni cajecū catá i jeē ni cahān yā, chi cájini i jeē ni jíhí sūchi síhí un. ⁵⁴ Yūcuán na te ni jñi ya ndaha i, te ni cahān jee ya jíin i:

Síhī, ndocuiñī, achí yá.

⁵⁵ Te ni natecu i, te ni ndocuiñī-ni i. Te ni ndacu ya jniñu jeē na cuáha ña jeē cáji i. ⁵⁶ Te tátá i náná i yōhyo ni canaa ni de cájito de. Te ni ndacu nīhin ya jniñu nuū de jeē ma cáchi de nuū ni ñn jeē súcuan ni cuu.

*Jeē ní tají yá ndihúxí uū de cuanacani de jnūhun
(Mt. 10.5-15; Mr. 6.7-13)*

9

¹ Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jéē nasávāha de ñayuu cácuñu. ² Te ni tají yá de quingoo de jeē nácani de jnūhun ndese ndácu Yaā Dios jniñu, jíin jéē nasávāha de ñayuu cácuñu. ³ Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihīn rō jíin ñn-ni camisa, te ma cóndiso ró inga. ⁴ Te na-ni vehe núu ni quivicoo ró, te yūcuán coyūcu ró nde quenda tucu ró quihīn rō inga ñuu. ⁵ Te núu ñn ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñu.

*Jeē ni jhī Juan tēe scuándute
(Mt. 14.1-12; Mr. 6.14-29)*

⁷ Te Herodes, tēe cúu gobernador, ni jini jnūhun de tācá jniñu sáha Jesús. Te ni cunéé ni de, chí cájeni

ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chi ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jnūhun ri jeē sáha de jniñu jéhnū? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācá jniñu ni casáha de. Te ni jeca ya de cuahān sín ya jíin de in lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuango i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácu hū.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācá ñuu jíin táca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, áchí de.

¹³ Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chí uhūn-ni staā jíin úū-ni chācá. Te vēsú núu quicuaan ná stāa caji ndihi ñayuu cuehē yáha, te ní ma cúu, áchí de.

¹⁴ Chí íyó nájnūhun uhūn mil tēe. Te ni cahān yā jíin tēe cáscuáha ún:

Cahān jín ñáyuu na cúcoo s̄in cincuenta cincuenta i, áchí yá.

¹⁵ Te súcuan ni casáha de, te ni cacucōo ndihí ñayuu. ¹⁶ Te ni quihin ya ndihúhún staā jín úū chācá un, te ni ndacoto ya ichi ándiví, te ni nacuatáhú yá. Te ni tahu cuéchi yá staā ún, te ni jēhe ya nuū tée cáscuáha jín yá, te ni casaja de nuū ñáyuu cuehē. ¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxī uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ñin quiví ni cus̄in Jesús, jícán tahu yā, te máá-ni tēe cáscuáha un cáh̄in de jín yá. Te ni cajnūhun yá de:

Ruhū, ¿ndé ñin cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajnūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní taji Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu n̄hin ya jniñu nuū de jeē ma cáchi de jnūhun yáha núū ní ñin ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tée jéhnu jín sūtū cácujuhnu jín tée cástéén tutu

ley, squéhichī de ruhū. Te cahni de ruhū, te nuū ní quiivī te natecu rī, achí yá.

²³ Yūcuán na te ni cahān yā jíin ndihī de:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū tāca quiivī, te cuāha i jnūhun ndoho i jnūndóho jeē siquí rī, vēsú na cúu i. ²⁴ Chi núu ndé ñayuu cuní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē siquí ruhū, te cotecu i ní cáni. ²⁵ ¿Chi ndé cuajníñu vēsú na cúndeyí ñayuu nihīn i ní ñáyiví, te núu squívī i máá i nuū jnahnū ndetū i ní cáni? ²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jíin síquī jnūhun cáhān rī, suni súcuan cucanu rī jeē siquí máá i, quiivī ndíji rī. Te quiivī ún chi yōhoyo luu cujéhnū rī, nájnūhun cujéhnū Tátá rī, te suni cácujehnū ndajéhé ndoo ya sáha ya. ²⁷ Te jendaá cáhān rī jíin ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸ Yūcuán na te nájnūhun nuū uná quiivī jeē ni cáhān yā jnūhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuangoo de jíin yá. ²⁹ Te níni jícán tahu yā, te tucu ni nduu nuū yā, te sahma ya ni nducuíjín quiyí, te ndíndéé. ³⁰ Yūcuán na te ni canecoo uū tēe, cándajñuhún de jíin yá. Te cúu de Moisés jíin Elías, tēe ní cahīyo jenahán. ³¹ Te luu ndíndéé de cáhīn de, te ni cacahān de jíin yá siquí jeē ní cuyajni cuu yā ñuu Jerusalén. ³² Te Pedro jíin tēe cáyūcu jíin de,

yōhyo cájiī de māhná, te vēsú súcuan te tu ní cáquixī de. Te ní cajito de jeē lúu ndíndēe yá jiín ndíndúú tée cáhīn jiín yá. ³³ Te nuū ní cacujiyo tēe un núū yā, te ní cahān Pedro jiín yá:

Maestro, nacā jeē váha jeē cáhīn ná yáha. Te na sáha ná únī vehe ramada, ĩn cuu máá ní, ĩnga cuu Moisés, te ĩnga cuu Elías, achí de.

Te tu sáha de cuenta na vé cúu jeē cahán de. ³⁴ Te níni cáhán de súcuan, te ní quee vicō nūhun ní jesi nuū de jíjnáhan de. Te ní cayūhú de jeē cáhīn de chíji vicō ún. ³⁵ Te nuū vicō un ní cahān ĩn jnūhun:

Yáha cúu Sēhe ri jeē maní ndasí rí jiín. Te na cúni nahín ró jnūhun cáhán yā, achí.

³⁶ Te nuū ní jínu ní cahān jnūhun ún, te máá ĩn na Jesús ín ya nuū de. Te máá de tu ní cácahān cuiti de, te tāca quivī ún tu ní cácachi de nuū ní ĩn jeē súcuan ní cajito de.

*Jeē ní nasávāha ya ĩn sūchi ñúhun tachī ini
(Mt. 17.14-21; Mr. 9.14-29)*

³⁷ Te ĩnga quivī un ní nanuu ya yucu jiín de. Te cuehē ñayuu ní jejnahan i ya. ³⁸ Te mēhñu ñáyuu cuehē un ní cana jee ĩn tēe:

Maestro, jícán tahu na núū ní jēē condēhe ní sēhe yíí ná, chí máñúhún i nuū ná. ³⁹ Te máni jeē sáha xeēn tachī jiín i, te cána cóhó i sáha, te jéhni yīhí i, te jée tiñū yuhu i. Te yōhyo stóho i, te yōhyo uhū siaá i. ⁴⁰ Te ní cahān ndahú ná jiín tée cáscuáha jiín ní jeē na quénehen te tachī ún, te tu ní cúu sáha de, achí de.

⁴¹ Te ní cahān yā jiín de jíjnáhan de:

Ñayuu yōhyo níhni ní cácuu ró, chí tu cácaadíje ró jēē cuu nduvāha i. ¿Nasaa ga quivī condee rī jiín ró

jeē cuándeyí ni rī jín ró? Cuáquihin sēhe ró na quíji i, áchí yá.

⁴² Te níní véji i nuū yā, te ni cotúú i ni sáha tachī, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. ⁴³ Te ndivii ñayuu nahán ní canaa ni i cájito i jeē yóhyo jéhnu jniñu sáha Yaā Dios.

Jeē ni cahān tucu ya jeē cúu yā

(Mt. 17.22-23; Mr. 9.30-32)

Te níní canaa ni i cájito i tācá jniñu ni sáha Jesús, te ni cahān yā jín tée cáscuáha jín yá:

⁴⁴ Chuhun vāha ni rō jnūhun cáhán rī yāhá, te ma náā ni rō, chi ruhū, Yaā ní nduu tēe, nastúu i ruhū quívi ri ndaha tāca tēe xeēn, achí yá.

⁴⁵ Te tu ní cájecūhun ni de jnūhun cáhán yā, chi tu ní cúu cuiñi jecūhun ni de. Te ni cayūhú de cajnūhún de ya siquī jnūhun ni cahān yā.

Ndé ñáyuu cúu jeē cujéhnu ga

(Mt. 18.1-5; Mr. 9.33-37)

⁴⁶ Yūcuán na te tēe cáscuáha jín yá ni caquejéé de cácahān de siquī núu ndé ñn de cujéhnu ga. ⁴⁷ Te Jesús ni jini yā jeē súcuan cájeni ni de. Te ni jniñi ya ndaha ñn sūchi lúlí, te ni jeni ya i xiin ya. ⁴⁸ Te ni cahān yā jín de:

Na-ni ñayuu núu jeē siquí ruhū jetáhú i sūchi lúlí yáha, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñu ró, máá i cujéhnu ga, achí yá.

Ñayuu tu cáhán siquī yā, ñin i jín yá

(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñin tēe jeē jín sñví ní quénehen de tachí ini ñayuu. Te ni cajesi na jēe sáha de, chi tu jíca de jín yó, achí de.

⁵⁰ Te ni cahān Jesús jín de:

Ma cási rō jeē sáha de, chi tēe tu cáhān siquī yō, ñin de jín yó, achí yá.

Jeē ni cáhān yā nuū Jacobo jín Juan

⁵¹ Te ni cuyajni quiví jeē quínahun yā andiví, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jín jnúhun jeē jinú yā. Te cuangoo de ñin ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndōo ya, chi ni cajini i jeē ndé Jerusalén quihín yā. ⁵⁴ Te Jacobo jín Juan, tēe cáscuáha jín yá, ni cajini de jeē súcuan cúu, te ni cacahān de jín yá:

¿A cúní ni jēe ndácu yó jniñu quiji ñuhūn nde andiví, návñuhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnúhun cácahān rō. ⁵⁶ Chi ruhū, Yaā ní nduu tēe, tú vēji ri jeē snāā rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jín de ñnga ñuu.

*Siquī ñáyuu jeē cácuni i condiquīn i ya
(Mt. 8.19-22)*

⁵⁷ Te níní jíca ya ichi jín de, te ni cahān ñin tēe jín yá:

Condiquīn na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jín de:

Tāca ñúcuii, íyó yáū cava cáñuhun ti. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jín inga de:

Condiquīn ruhū na quíhín yō.

Te máá tée un ní cahān de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

⁶⁰ Te ni cahān Jesús jín de:

Stóo tāca ndíyī na chindūji jnáhan ndīyī, chi ndīyī cácuu ñayuu tu cácandíje. Te róhó, cuáhán te nacani ró jnúhun ndese ndácu Yaā Dios jniñu, áchí yá.

⁶¹ Yūcuán na te suni ni cahān inga de:

Cúni na condiquīn na níhín, te cuāha ní jnúhun jeē xíhna gā quicahān na jín ñáyuu cáyūcú vehe ná, áchí de.

⁶² Te ni cahān Jesús jín de:

Núu na-ni tēe quéjéé de condiquīn de ruhū, te núu máni jeē nácani cuíhyá ni de siquī tāca jéē ni stóo de, núu súcuan te cúu de nájñuhun in tēe jítu jín yátá, te jícó cóto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

Jeē ní taji yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni taji yá ndihuū ndihuū de jeē cósnūú de nuū yā, quingoo de tācá ñuu jín táca lugar nuū jé yajni quihīn maá yá. ² Te ni cahān yā jín de:

Ñayuu yáha cácuu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū maá Jítóho rō Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jñuhun ya nuū ñáyuu. ³ Te cuángoo jíjnáhan rō, te na cástūhun rí nuū rō jeē tají rí rohó quíngoo rō nájñuhun londe mēhñu yíhī. ⁴ Te ma cóndiso rō ñunu, ni yíjni xūhún, ni ndijēn. Te ichi ma cucuéé rō ndajnūhun rō jíin ni ñn. ⁵ Te na-ni vehe núu ni quívi rō, te xīhna gā cahān rō: Na quíji jñuhun ndeyí jñuhun sīi ni nuū rohó, ñáyuu vehe yáha, achi rō. ⁶ Te núu vehe yúcuan iyó ñáyuu vāha, te jñuhun ndeyí ní cahān rō jinū siquī i. Te núu tuú, te jñuhun ndeyí ní cahān rō ma jinú siquī i. ⁷ Te suni vehe yúcuan coyūcu rō, te caji rō coho rō jéē cuáha ñayuu nuū rō. Chi siquī jniñu jeē nácani rō jnúhun nuū ñáyuu, te cánuú coto i rohó. Ma quéndōo rō tijni vehe, chi ñn-ni vehe. ⁸ Te na-ni ñuu núu ni quívicoo rō, te núu cuatáhú i rohó, te caji rō tāca jéē cuáha i nuū rō. ⁹ Te nasávāha rō ñáyuu cácuhū ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰ Te na-ni ñuu núu ni quívicoo rō, te núu tu ní cájetáhú i rohó, te quendacoo rō ini calle yūcuán, te cahān rō: ¹¹ Nde ticachā ñuu rō yāha jéē ni jñí jehē rī, na náscóyo ri jeē cúu seña jeē iyó cuéchi rō jéē tu ní cájetáhú rō. Te na cónahán rō jeē Yaā Dios je ni cuyajni ya jeē ndacu ya jniñu nuū rō nuú. ¹² Te cáhán rī jíin rō jeē quívi juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuēchi.

*Jeē ní cuxeēn yā nuū sava ñuu nīhni ni
(Mt. 11.20-24)*

¹³ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnú jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xinī i núú. ¹⁴ Núu súcuan te quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. ¹⁵ Te róhó ñáyuu ñuu Capernaum, ¿á cájeni ni rō jeē kujéhnú ró nájñūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyī. Achí yá.

¹⁶ Te ni cahān gā yā jíin tēe jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusī ni de te cácahān de jíin Jesús:

Nde tachī cájetáhú núu na jéē jíin síhví ní, chi quéndacoo ini ñayuu, achí de.

¹⁸ Te ni cahān yā jíin de:

Súcuan cúu, chi ni jito ri jeē nájñūhun ñn taja ni ñingava Satanás ichi ándiví, chi ni quende rī ndīhi poder un. ¹⁹ Te vijna te je ni jēhe ri fuerza nuū rō jeē cueñū rō nájñūhun siquī tāca cóo jíin tísuhma, te cundeyí ró siquī tāca fuerza maá jéē jító uhū yohó, te tú na vé sáha ga jíin ró. ²⁰ Te ma cúsi ni rō maá-ni

jeē cájetáhú táchī nuū rō, chí sa cusī gā ni rō jeē yosó síhví ró nde andiví. Achí yá.

Jeē ní cusī ni Jesús

(Mt. 11.25-27; 13.16-17)

²¹ Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núū ni Tátā, Jitoho andiví jíin ñáyiví. Chí ni jesi ni táca jnúhun ndíchí ní, jeē ma cúni ñayuu ndichí jíin ñáyuu tūhva cuenta ñayiví yáha. Te ni steén ni núū ñáyuu cácuu nájnūhun sūchi lúli. Chí súcuan ni nujnahan ni ni Tátā, achí yá.

²² Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te íyó ñáyuu jeē cuní maá Séhe stéén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jíto ya nuū tée cáscuáha ún, te ni cahān yā jíin máá-ni de:

Yōhyo ndetū ñayuu cájito jniñu jéhnū jeē cájito máá ró. ²⁴ Chí cáhán rī jíin ró jeē cuehē téē ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnúhun ñn tē vāha ni nación Samaria

²⁵ Yūcuán na te ñn tē stéén tutu ley Yaā Dios, ni ndocuiñi de ni jecahān de jíin Jesús, chí cuní de coto ndee de ya. Te ni cajnúhún de:

Maestro, ¿na vé sáha ná te nihīn tahu na cotecu na ní cáni andiví? áchí de.

²⁶ Te ni cahān yā jiín de:

¿Ndese yósó núū tútu ley? ¿Ndese cáhán cáhu ró? Achí yá.

²⁷ Te máá téé un ní cahān de jeē cahán nuū tútu:

Coo manī ndasí ró jiín máá Jítóho rō Yaā Dios, nde jnāā ndasí ró sáha ró ndihí jeē cúsiī ni yā, nde jiín ini jiín ánuá rō, jiín ní fuerza rō, jiín ní jéé níjnūní rō. Te cundáhú ni rō jnáhan ró nájnūhun cundáhú ni rō maá ró, achí. Achí de.

²⁸ Te ni cahān yā jiín de:

Vāha ni cahān rō. Te núu cuu sáha ró súcuan te nihīn tahu rō cotecu rō ní cáni, áchí yá.

²⁹ Te máá téé un cúní de jeē quéndō ndaā de nuū yā jiín jnúhun ni cajnúhún de, te ni cahān de:

¿Te ndé ñáyuu cácuu jnáhan ná? áchí de.

³⁰ Te ni cahān Jesús:

Īn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núū de, te ni caquende ndihí ndajníñu de, te nde sahma ñúhun de. Te ni cacani ndevāha ún de jeē jé yajni cuu de núú. Te ni castóo ún de, te cuangoo. ³¹ Te ni cuu jeē íchi un yáha ĩn sutū quihīn de, te ni jito de nuū téé ún, te ni síyo-ni de cuahān de. ³² Te suni súcuan ĩn tēe grupo levita jeē cájejniñu ini templo, vēji de ichi ún, te ni jito de nuū téé ún, te ni yáha jíca-ni de cuahān de. ³³ Te ĩn tēe nación Samaria, suni vēji de ichi ún, te nuū ní jito de, te ni cundáhú ni de tēe ún. ³⁴ Te ni quee de nde nuū catú téé ún, te ni chuhun de aceite jiín vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin téé un ndé ĩn mesón, te ni condito de. ³⁵ Te ĩnga quivī ún, hora jeē quihín de, te ni tava de uū xūhun

cáa, ni jēhe de nuū tēe chíi mesón. Te ni cahān de: Coto ní tēe yáha, te núu caxīn gā ni xúhun ní jíin de, te nuū nándicó ná te nachunaa ná núū ní, áchí de. ³⁶ Núu súcuan ¿te ndese jēni ni rō? Jeē ndinúni tēe ún, ¿ndé ñn de ni chihi cuenta jeē jnāhan de cúu tēe ni canecoo ñacuīhna núū? Achí yá jíin tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tujī, vēsú tēe ñuu jicá cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihin tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña ya ni jehēn yā vehe ña. ³⁹ Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jnūhun cáhán yā. ⁴⁰ Te Marta chi cúnée máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sāña núu jniñu? Te cahān ni jíin ña na chindéé ñáhán ña sāña, achí ña.

⁴¹ Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. ⁴² Te íyó ñn-ni jniñu cánuú. Te María chi ni nacāji ña jniñu cánuú, suu jeē ndíhví ni ña siquī jnúhun Yāā Dios, te ma quénehen yó ña nuū ún. Achí yá.

*Jeē ni stéén yā ndese cacān tahú yō
(Mt. 6.9-15; 7.7-11)*

11

¹ Te ñn quiṽi íne Jesús ñn lugar jicán tahu yā. Te nuū ní ndíhi ni jicán tahu yā, te ñn tēe scuáha jíin yá, ni cahān de:

Stéén ni núū ná ndese cacān tahu na jíjnáhan ná, nájnūhun ni steén Juan nuū tēe ni cascuáha jíin de, áchí de.

² Te ni cahān yā jíin de:

Jeē cacán tahu rō, te suhva cahān rō:
Tátá maá ná jíjnáhan ná jēē ndeé ní andiví,
níní na cóo yñúhún ná nuū ní, chi Yaā ñi cúu ní.
Te ñúhun ni na jēē yachī quiji quiṽi ndacu ní jniñu
ní ñáyiví yáha.

Te na cóo tācá jniñu nújnahan ni ní,
nájnūhun íyó ini andiví, súcuan na cóo ini ñayiví.

³ Staā jeē cátecu na táca quiṽi, cuāha ní núū ná vijna.

⁴ Te cone cáhnu ni ni núū tāca cuēchi casáha ná núū
ní,

nájñūhun cáhine cáhnu ni na núū ñáyuu casáha
cuēchi nuū ná.

Te ma cuáha ní jnúhun jeē coto ndee jexeén sãñá,
chi sa suhva jnama ní sãña nuū tāca jēē neé.

Achi rō jíjnáhan ró. Achí yá.

⁵ Te ni cahān gā yā:

Núu ndé ñn rōhó íyó ñn amigo rō, te núu quihñn
rō vehe de sava ñuú te cahān rō jíin de: Amigo,
cuāha núu unī staā nuū rī. ⁶ Chi ñn amigo rī jēē
jíca de viaje, ni quee de vehe ri, te tú na vé névāha
ri jēē cuáha ri caji de. Achi rō. ⁷ Te núu cahān tēe
íne ini vehe: Ma stáhān rō ruhū, chi ndíhyú yehyí
rí, te je cáquixī sēhe ri jíin rí, te ma cúu ndonda ri
jeē cuáha ri nuū rō, achi de. ⁸ Te cáhán rī jíin ró,
vēsú ma ndónnda de cuāha de nuū rō siquī jēē cúu

de amigo rō, te jeē yóhyo stáhān rō de, jeē yúcuan ndonda de cuāha de ndíhi jeē jíni ñúhún ró. ⁹ Núu súcuan te cáhān rī jíin ró jijnáhan ró jeē suni súcuan cacān tahu ró nuū Yaā Dios, te cuāha ya nuū rō. Te nducú ró tāca jēē váha íyó núu yā, te nihīn rō sáha ya. Te cacān tahu ró nde nihīn rō, nájñūhun sáha ñayuu cahán yehyí ndé nune quívi i. ¹⁰ Chi tāca ñayuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

¹¹ ¿Te ndé ñn ró cúu tátá, te núu sēhe ró jicán i staā nuū rō, te á cuáha ró ñn yuū nuū i? Te núu jicán i chācá, ¿te á cuáha ró ñn coō nuū i? ¹² Chí núu jicán i ñn ndívi, ¿te á cuáha ró ñn tisuhma nuū i? Tú cuiñi súcuan. ¹³ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jēē váha nuū sēhe ró. Te nagā ni cuu máá Tátá rō andívi jēē ma cuáha ya Espíritu Santo nuū ñayuu jicán nuū yā. Achí yá.

*Jeē ní cacahān de jeē jejniñu ya fuerza Satanás
(Mt. 12.22-30; Mr. 3.19-27)*

¹⁴ Te quénehen ya ñn tachī ini ñn tēe, jeē ní cuñíhín de ni sáha. Te nuū ní quenda tachī, te ni nacahān tēe ni cuñíhín un. Te ni canaa ni ñayuu cájito i. ¹⁵ Te sava ñayuu ún chi ni cacahān i:

Jíin fuerza Satanás jeē kujéhnu nuū tachí, quénehen tēe yáha táca táchī ini ñayuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñn seña ichi ándívi. ¹⁷ Te máá yá jiní yā jeē súcuan cájeni ni i, te ni cahān yā:

Tācá nación jeē sasñn máá te cuajnáhan máá, núu súcuan te snāá jeē iyó váha máá. Te núu ñayuu

ɨn vehe sásɨn máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásɨn máá jíin jnáhan tachī, ¿te ndese cuiñi nīhin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu. ¹⁹ Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jíináhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jéē ndácu ya jniñu.

²¹ 'Te núu ɨn tēe ndacuī, ndító de vehe de jíin nújii de, núu súcuan te tú ni ɨn ndajniñu de ndoñuhún. ²² Te núu quiji inga tēe ndacuī gā, te cundeyí jíin tēe ún, núu súcuan te quende nujii de jeē ndító de vehe de, te sáha de ndese cúní maá de jíin ndajniñu jeē quénde de. Te nájnūhun tēe ndacuī gā ún, súcuan cúu máá rí nuū Satanás.

²³ 'Te ñayuu tu íyó mánī jíin rí, núu súcuan te jito uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

*Tachī jeē nastútú jnáhan ndávi ini ñayuu
(Mt. 12.43-45)*

²⁴ 'Núu ni quenda ɨn tachī ini ɨn tēe tu cándije, te jica cuu nuū ñūhun téhé, ndúcú nuū ndétátú, te tu níhín, yūcuán na te jéni ni maá: Na quínuhun rī vehe nuū ní quenda ri. ²⁵ Te núu ni ndee tucu, te jito jeē tēe tu cándije un cúu de nájnūhun ɨn vehe jeē ní ndundoo. ²⁶ Yūcuán na te jéquihin uxā gā tachī xeén gā vēsú maá. Te quívicoo ini tēe un jéē

cóyūcu yúcuān. Núu súcuan te xeēn gā ndoho tēe un jéē sándāhí vēsú jeē xíhna ñúhún. Achí yá.

Yōhyo ndetū ñayuu cájini nahín jnúhun ya

²⁷ Te níni cáhán yā jnúhun yáha, te ñn ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquícu i, áchí yá.

Jeē ní cajicān ñayuu tu cácandíje ñn jniñu jéhnu
(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni cásáha néé i. Te cájicān i ñn jniñu jéhnu jeē steén núu Yaā ní tají Yaā Dios cúu ri. Te tú na inga jniñu jéhnu stéén rī nuū i, chi máá-ni jniñu jéhnu nájnūhun ni cuu jíin Jonás, tēe ni nacani jnúhun Yaā Dios nde jenahán. ³⁰ Chi nájnūhun ni cajini ñayuu ñuu Nínive jeē ní cuu ñn jniñu jéhnu jíin Jonás, suni súcuan cuni ñayuu tiempo yáha jeē coo ñn jniñu jéhnu jíin rúhū, Yaā ní nduu tēe, jeē quijnáhan jíin modo ni ndoho Jonás. ³¹ Te reina jeē ní cújéhnu nación ichi sur, natecu ña jíin ñáyuu tiempo yáha, quiṽ juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnúhun ndíchí ní cahān rey Salomón. Te vijna chi cújéhnu ga ruhū, Yaā íne yāhá vēsú Salomón, te tu cácandíje ró rúhū. ³² Te tāca ñáyuu ñuu Nínive nuū ní nacani Jonás jnúhun, natecu i jíin ñáyuu tiempo yáha, quiṽ juicio jeē sándaā yā cuēchi, te cahān i cuēchi siquī ñáyuu yáha.

Chi máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújēhnu ga ruhū, Yaā íne yāhá vēsú Jonás, te tu cá candíje ró rúhū.

*Jnūhun yátá síquī lámpara
(Mt. 5.15; 6.22-23)*

³³ Núu nástin ñayuu ñn lámpara, tu chísāhí i, ni tu chúne i chíji ñn cajón. Chi sa suhva jéni i nuū sucún, návāha cundijin nuū ñáyuu quívicoo vehe. ³⁴ Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te nñ-ni yiqui cúñu rō cúndijin. Te núu tinūu ró tu íyó ndijin, te nñ-ni yiqui cúñu rō iyó nee. ³⁵ Te suni súcuan cúu ánuá rō, te coto ró jéē ma cáni neé ni rō, návāha tú coo nee ini anuá rō. ³⁶ Chi núu máni jniñu váha cásáha ró, te tú na jniñu neé cásáha ró, núu súcuan te luz yā cúndijin vāha ini anuá rō, nájñūhun ñn lámpara jeē sáha jeē cúndijin vāha. Achí yá.

*Jeē ni cáhān yā jeē iyó cuēchi de jijnáhan de
(Mt. 23.1-36; Mr. 12.38-40; Lc. 20.45-47)*

³⁷ Te nuū ní cuu ni cahān yā, te ñn tēe grupo fariseo ni cana de ya jeē caji yā staā vehe de. Te ni quivī ya, te ni cucōo ya mesa jeē cáji yā staā. ³⁸ Te tēe fariseo un náā ni de jito de jeē tu squícu ya costumbre jeē nandahá yá te caji yā staā. ³⁹ Te ni cahān maá Jítoho yō jíin de:

Róhó tēe fariseo jijnáhan ró, chi nájñūhun jeē cánacate ró yátā vaso jíin yátā cohó cúu jeē nandahá ró. Te ichi íni rō chi ñūhun máni máá jnūhun cuíhná jíin jnūhun neé. ⁴⁰ Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? ⁴¹ Te jeē cájēhe ró caridad nuū ñáyuu ndahú, na

sáha ró síquī jeē cundáhú ndije ni rō i. Te súcuan te coo ndaā anuá rō.

⁴² Nacā xeēn ndoho róhó téé fariseo, chi cásquīcu ró tācá jniñu lúli, te tu cásquīcu ró jniñu cánuú. Chi cásáha ró úxī uxī nuhnī tamīnu jíin ruda jíin táca yucū, te cásocō rō ñn ñn síquī tāca úxī un núū Yaā Dios. Te tu cásáha cuiti rō jniñu ndaā, ni tu cáhīyo manī rō jíin Yaā Dios. Tāca jéē yáha cánuú sáha ró núú, te suni ma stóo ró jéē socó rō tāca yúcū ún.

⁴³ Nacā xeēn ndoho róhó téé fariseo, chi máni cánujnahan ni rō cucōo ró núū silla yíñúhún gá ini vehe iī sinagoga. Te cánujnahan ni rō jeē cahán yíñúhún ñáyuu jíin ró nuū calle.

⁴⁴ Te nacā xeēn ndoho róhó téé cástéén tutu ley Yaā Dios, jíin róhó téé fariseo, chi tēe stáhú-ni cácuu ró. Chi cándāa ró nájñuhun yaū ndīyī jeē tú ndijin, chi cásnáā rō anuá ñayuu, te tu jíin i jeē súcuan cásáha ró jíin i. Achí yá jíin de.

⁴⁵ Yūcuán na te ni cahán ñn tēe stéén tutu ley:

Maestro, jeē ni cáhán ni táca jnúhun yáha, suni nde síquī maá ná jíjnáhan ná ní cahán ní, achí de jíin yá.

⁴⁶ Te ni cahán yā:

Suni nacā xeēn ndoho róhó téé cástéén tutu ley. Chi suni cástéén rō tāca ley ni catava maá ró jeē yíí sáha, te tu cácundeyí ñáyuu squīcu i. Te máá ró, chi ni ñn xinī ndáha ró tu cáscánda ró jéē squīcu ró.

⁴⁷ Nacā xeēn ndoho ró jíjnáhan ró. Chi cásáha ró vehe síquī nuū yíndūji ndīyī jíí rō, tēe ni canacani jnúhun Yaā Dios nde jenahán. Te suni tāca jíí rō ni cajehni de tēe ún. ⁴⁸ Te jeē casáha ró súcuan cúu jeē cáquijnáhan ró jíin de síquī jniñu ní casáha de. Chi

máá de ni cajehni tēe ún, te máá ró cásáha ró vehe ndīyī ún.

⁴⁹ Jeē yúcuan nde jenahán ní cahān Yaā Dios ñn jnūhun ndíchí: Tají rí tāca tēe nacani jnūhun rí jíín tāca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios.

⁵⁰ Te súcuan te siquī ñáyuu tiempo yáha na cóndee cuēchi jeē ní cajehni jíi i tēe ni canacani jnūhun Yaā Dios, nde quivī ni jécōo ñayīvī te nde vijna, ⁵¹ nde Abel xīhna gā te nde Zacarías, tēe ni cajehni de ini templo sava mēhñu cuarto ñ jíín altar. Núu súcuan te cáhán rí jíín ró jeē siquī ñáyuu tiempo yáha condee tāca cuēchi ún.

⁵² Nacā xeēn ndoho róhó jéē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cācuni rō jecūhun ni rō, ni tu cájehe ró jnūhun jeē jecūhun ni ñayuu cācuni. Achí yá.

⁵³ Te jeē ni cáhān yā jnūhun yáha, te tēe cástéén tutu ley Yaā Dios jíín tēe fariseo, yōhyo ni caquīñi ni de nuū yā. Te ni caquejéé de cástíchí de ya siquī cuehē gā jnūhun. ⁵⁴ Chi yuhu-ni cánducú de núu sanaa te stívī yá jnūhun cahān yā, návāha nihīn de cuēchi siquī yā.

Siquī jnūhun stáhú cácahān tēe fariseo

12

¹ Te níní súcuan cúu, te ni cacutútú cuéhē mil ñayuu, chi nde cájeñū i siquī jehé jnáhan i. Te xīhna gā ni quejéé yá cahān yā jíín tēe cáscuáha jíín yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíté núu nuū ñáyuu, nájñūhun ndécava levadura nuū ñújen

pan. ² Chi jnūhun stáhú un má quéndōo sāhí cuiti, chi ndihí natūu ndijin, te cuni ñayuu. ³ Núu súcuan te suni máá ró, tāca jnúhun ni cacahān rō jeē tu ní jíni ñayuu, ñn quivī te cuni vāha i. Te tāca jnúhun ni cacahān sāhi ró jeē ndihyú yehyí, ñn quivī te cahān jee ñayuu yatā tācá vehe.

*Jeē ní cachi yā ndé ñn cúu jeē yūhu yó
(Mt. 10.28-31)*

⁴ 'Cáhán rī jíin ró jijnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i rōhó, te tuá na vé cúu sáha ga i. ⁵ Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te tācá saa chi tú yahu ndéé tī, chi nde uhūn tī jeē uú centavo lulí. Te ni ñn ti tu náā ni Yaā Dios jeē tu ndíto ya. ⁷ Te nagā ni cuu rōhó jijnáhan ró, chi nde ndihí ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

*Ñayuu jejnúhún Jesucristo nuū ñnga ñayuu
(Mt. 10.32-33; 12.32; 10.19-20)*

⁸ 'Te cáhán rī jíin ró, tāca ñáyuu jeē cuajnúhún rúhū nuū ñnga ñayuu, suni súcuan ruhū, Yaā ní nduu tēe, cuajnúhún rí i nuū tācá ndajéhé Yaā Dios. ⁹ Te tāca ñáyuu jeē ma cuájnúhún rúhū nuū ñnga ñayuu, suni súcuan ma cuájnúhún rí i nuū tācá ndajéhé Yaā Dios.

¹⁰ 'Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu

ndé ñáyuu cahān ndevāha i siquī Espíritu Santo, ma cóne cáhnu ni Yaā Dios nuū i.

¹¹ Te núu cuandeca i róhó táca vehe iī sinagoga nuū tée cásándaā cuēchi, jíin núu tée cácuu tohō, te ma nácani ndasí ni rō ndese stíó cuíñi rō jnūhun nuū de. ¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajníñu cúcá

¹³ Yūcuán na te ñn tēe íne nuū ñáyuu cuehē un ní cahān de jíin Jesús:

Maestro, cahān ni jíin ñani na jēē na táhú sáva de tahū na jíin de, áchí de.

¹⁴ Te ni cahān yā jíin de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnáhan ró jēē ma ndíyo ni rō xūhun jíin táca gá. Chi vésú cuehē ndasí ndajníñu névāha ñn tēe, te nasūu jēē yúcuán sáha jeē quéndōo ndetū de, áchí yá.

¹⁶ Yūcuán na te ni cahān yā ñn jnūhun yátá jíin i:

Ni íyo ñn tēe cúcá jeē névāha ñhun jeē cúu vāha ndasí itu. ¹⁷ Te tēe cúcá un ní nacani ni de: ¿Ndese sáha ri? Chi tuá ndé cuhun niñi ri. Achí de. ¹⁸ Te ni jeni ni de: Suhva na sáha ri. Na cánu rī tāca yácā rī, te nasáha ri jeē náhnu ga. Te yūcuán chuvāha ndihī ri niñi ri jíin táca ndajníñu ri. ¹⁹ Yūcuán na te cahān rī jíin ánuá rī: Vijna te cuehē teyí névāha yó jēē canda cuehē cuiyā. Na ndétātu yó te caji yō coho yó, te na cúsi ni yō, ni jeni ni de. ²⁰ Te ni cahān Yaā Dios jíin de: Tēe cánéé cúu ró. Chi jecuāā vijna cuu rō, te tāca jēē ní chuvāha ró, ¿ndé tée cuu?

Achí Yaā Dios jíin de. ²¹ Te súcuan ndoho tāca téé jeē sacúca de máá de, te tu ndúcú de jeē quendōo ndetū de sáha Yaā Dios. Achí yá.

Yaā Dios ndító ya yohó

(Mt. 6.25-34)

²² Te ni cahān yā jíin téé cáscuáha jíin yá:

Núu súcuan te cáhān rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. ²³ Chi Yaā Dios ni sáha ya jeē técu rō jíin yiquī cúñu rō, te nagā ni cuu jeē ma cuáha ya jeē cáji rō jíin jéé cuhun ró. ²⁴ Condēhe ró ndese cátecu quitī cácuu nájñuhun cálu, chi tu cátaji ti, ni tu cánastútú tí jeē chuvéha ti, ni tú yacā tí. Te vésú súcuan te máá Yaā Dios scáji yā tí. Te cánuú ndasí gá rō jijnáhan ró vésú táca quitī ún. ²⁵ ¿Te ndé ñin ró, á cuu scuéhnu ró máá ró sava metro gā, vésú na nácani ndasí ni rō? ²⁶ Te núu ma cúu sáha ró vésú ñin jniñu lúli súcuan, ¿te najehē cánacani ndasí ni rō siquī jeē cáji rō jíin jéé cuhun ró?

²⁷ 'Condēhe jíjnáhan ró ndese jée ita tāca yúcū. Chi tu sájñiñu, ni tu táú. Te cáhān rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájñuhun ita ún. ²⁸ Te núu súcuan jéhe Yaā Dios sahma lúu ita un jéé jée vijna te sajnē cayū nuū ñuhún, te nagā ni cuu róhó jíjnáhan ró jéé ma sáha ya jeē nihín rō sahma. ¿Te naun tu cácandíje nīhin ró jéé ndító ya rohó? ²⁹ Núu súcuan te ma nácani cuíhyá ni rō ndese caji rō ndese coho ró. ³⁰ Chi tāca ñáyuu ñayivī jéé tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andivī, te jíní yā jeé cájini ñúhún ró tāca jéé yáha. ³¹ Te sa suhva cánuú

gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jéē yáha.

Ndese coo cúcá yó nde andiví
(Mt. 6.19-21)

³² Ma yūhu ró jijnáhan ró chi cácuu ró nájnūhun lanchi ri. Chi vésú jecu-ni cácuu ró, te máá Tátá rō cúsiñ ni yā jeē quívicoo ró ñuu nuū ndácu ya jniñu. ³³ Xīco ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chívāha ró xúhun ini yijni. Chi nde andiví te ma náā jeē váha coneváha ró. Chi yūcuan má quívī ñacuñná, ni ma cúu stívī tiquíxin. ³⁴ Chi nde nuū nihín rō tahū váha ró, yūcuan cúu nuū cóndihvī ni rō siquī.

Jeē na cóo tūhva yó jéē ndéē yā

³⁵ Coo tūhva ró jijnáhan ró jéē ndéē Jitoho rō, te coo ró nájnūhun mozo jeē nastín i lámpara i. ³⁶ Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jijnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jín ró jeē máá patrón sátūhva de máá de, te scúcōo de i mesa te cani de cohō i. ³⁸ Te vésú cucuéé de ndee de nde sava ñuú, chí jéē nēē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. ³⁹ Te na jécūhun ni rō jeē cahán jnūhun yátá yáha: Tēe chíí vehe, núu ni jini de na hora quiji ñacuñná, te condito de, te ma cuáha de jnūhun jeē sacuíhná vehe de núu. ⁴⁰ Te suni súcuan coo tūhva ró jijnáhan ró, chi núu tuú, te

máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

Jnūhun mozo vāha jíin mozo tu squícu
(Mt. 24.45-51)

⁴¹ Yūcuán na te Pedro ni cajnūhún de ya:

¿A jíin máá-ni ná jíináhan ná cáhán ni jnūhun yátá yáha, chí suni cáhán ni jíin ndihí ga ñayuu? achí de.

⁴² Te ni cahān maá Jítóho yō:

Cáhán rī jíin ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehé de, návāha scáji i máá hora. ⁴³ Te yōhyo ndetū mozo un jēē núu ni ndee patrón, te cuní de jeē súcuan squícu vāha i. ⁴⁴ Jendaá cahán rī jíin ró jeē caní de mozo un jēē cóto i ndihí ndajníñu de. ⁴⁵ Te núu jéni ni i jeē ma ndíji yachī patrón i, te quejéé i caní i tēe jíin ñahan cácuu jnáhan mozo i, te caji i coho i te najīni i, ⁴⁶ núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squíví de i ndoho i jíin ñáyuu tu cásquícu.

⁴⁷ Te mozo jeē jiní i ndese nújnahan ni patrón i, te núu tu sátūhva i ni tu squícu i jeē cuní de, ndoho xeēn i jíin yujnu xíi. ⁴⁸ Te mozo jeē tu jiní i ndese nújnahan ni patrón i, te núu sáha i jniñu jeē caní de i, núu súcuan te cūhva-ni caní de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjníñu ya i, suni cuehē gā nandacān yā nuū i.

Jeē siquí Jesús te cusñn ini ñayuu
(Mt. 10.34-36)

⁴⁹ Ni quee rī jeē nájnūhun jeē scuiquín rī ñuhūn ini ñayíví, te suu cúu jeē cusñn ini ñayuu jeē siquí

ruhū. Te cúní rī jeē yachī coo súcuan, návāha quīvicoo ñayuu ndaha Yaā Dios. ⁵⁰ Te íyó ñn jñūndóho cánuú ndoho ri, te cúcuíhyá ndasí ni rī chi nde jīnu ndoho ri, te ndusñ ni rī. ⁵¹ ¿A cájeni ni rō jeē véji ri jeē cóyūcu mánī ñayuu ñayīvī? Cáhán rī jín ró jeē tuú, chi sa suhva jeē cusñ ini ñayuu jeē síquí ruhū. ⁵² Chi nde vijna te quejéé jéē uhūn ñayuu ñn vehe, sásñ máá jijnáhan, unī síquī uú, te uū síquī unī. ⁵³ Chi tátá cusñ ini jín séhe yí, te séhe yí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

Jeē ni cáhān yā síquī seña andiví

(Mt. 16.1-4; Mr. 8.11-13)

⁵⁴ Te suni ni cahān yā jín ñayuu cuehē ún:

Núu cájito ró jeē nāne vicō ichi núu cáne niāndii, te cácahān rō jeē cuun saū, te súcuan cúu. ⁵⁵ Te núu quée tachī véji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chi cájecūhun ni rō ndese stéén seña andiví jín ini ñayīvī, ¿te naun tu cájecūhun ni rō ndé ñn cúu ruhū jeē sáha ri tācá jniñu jéhnú tiempo yáha?

Jeē cóndihvī ni yō jeē ma cóndee cuēchi síquī yō

(Mt. 5.25-26)

⁵⁷ ¿Te najehē tu cánacani ni maá ró ndé ñn cúu jniñu ndaā sáha ró? ⁵⁸ Te núu ñn ñayuu quihñ i jín ró nuū tohó jeē cacán i cuēchi síquī rō, núu súcuan te níní cuáhān rō jín i ichi te condihvī ni rō sándaā rō jín i. Chi núu tuú, te squívi i róhó núu juez, te juez siáha de róhó núu policía, te policía chune de róhó vecā. ⁵⁹ Te jendaá cahán rī jín ró jeē ma quénda cuítī rō yūcuán chi nde chunaa

rō ndihī cuiṭi xūhun cájicān de. Te suni súcuan condihvī ni rō cahān ndahú ró jíin Yaā Dios, návāha ma ndácunehen ya cuēchi siquī rō. Achí yá jíin de.

Jeē cánuú nacani ni yō jeē stóo yó cuéchi yó

13

¹ Te ñin quiṽi yúcuan ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quiṭi jeē socó de, te ni quecoo mozo Pilato ni cajehni tēe ún. ² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gá ñayuu Galilea? ³ Cáhán rī jíin ró jeē tuú. Te róhó jíináhan ró suni jnahnū ndetū rō núu tú nacani ni rō jeē stóo ró cuéchi ró. ⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén? ⁵ Cáhán rī jíin ró jeē tuú. Te máá ró jíináhan ró, suni jnahnū ndetū rō núu tú nacani ni rō jeē stóo ró cuéchi ró.

Jñūhun yátá núndēhe higo

⁶ Yūcuán na te ni cahān yā jñūhun yátá yáha jēe steén yā ndese cácuu ñayuu tu squícu jñūhun Yaā Dios:

Cácuu i nájñūhun ñin nundēhe higo jeē íin nuū ñūhun ñin tēe. Te ni jecondēhé de núu íin ndehē xinī, te tú na vé íin. ⁷ Te ni cahān de jíin mozo sájniñu nuū ñūhun de: Vijna te je íyó únī cuiyā jeē quiṭi ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jēe sajnēñu nuū ñūhun, áchí de. ⁸ Te ni cahān mozo un

jíin de: Stóo ní na cuiñi ñin na cuiyā, te na nástáyā ná jéhē te chuhun ná jéhen. ⁹ Te na cóndēhe yó núu tú cuun ndehē inga cuiyā. Te núu tuú, te tahndē, achí yá.

Jeē ní nasávāha ya ñin ñahan quivī ndétātú

¹⁰ Te ñin quivī ndétātú te stéén Jesús jnūhun ini vehe iī sinagoga. ¹¹ Te íyó ñin ñahan jeē ní cuu xahūn unī cuiyā kuhú ña. Chi ñin tachī ni sáha jeē jíca tñí ña, te tuá cúu cuiñi caca jnuu ña. ¹² Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jéē kuhú ni.

¹³ Te ni soó yá ndaha ya siquī ña, te ni nucuñi jnuu-ni ña, te ni nacuatáhú ña nuū Yaā Dios. ¹⁴ Te tēe cújéhnū ini vehe iī sinagoga, ni quiñi ni de nuū Jesús jeē ní nasávāha ya ñahan un quivī ndétātú. Te ni cahān de jíin ñayuu:

Iñū quivī iyó jéē sájniñu yó, te tāca quivī ún quijicoo ró nduvāha ró. Te quivī ndétātú chi ma cúu, áchí de.

¹⁵ Yūcuán na te ni cahān maá Jítóho yō jíin de:

Tēe stáhú-ni cácuu ró. Quivī ndétātu ¿á tu cándají ró stiñi rō burro ró jéē quíscóho ró tí ndute? ¹⁶ Te ñahan yáha jéē cúu ña ñin sēhe yucūn Abraham, chi nájñūhun ni conuhnī ña xahūn unī cuiyā ni sáha Satanás. ¿Te á tu íyó váha jeē nájñūhun nandají rí ña nuū cuehyī ndóho ña quivī ndétātú? Achí yá.

¹⁷ Te jeē ni cáhān yā súcuan, te tāca tēe cájito uhū de ya, ni cacucanu de. Te ndiñi ñayuu ún chi ni cacusiñi ni i jító i táca jniñu jéhnū sáha ya.

Jnūhun yátá siquī ndiquin mostaza

(Mt. 13.31-32; Mr. 4.30-32)

¹⁸ Te ni cahān yā:

Na cáhán rī ìn jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájnūhun jéhnū ìn ndiquin mostaza jeē jéquin ìn tēe nuū ñūhun de, te ndúu nájnūhun ìn yujnu. Te cúu cáhnu, te tǎcá saa chí cásáha ti tacā tī chīji ndaha ún. Achí yá.

*Jnūhun yátá síquī levadura
(Mt. 13.33)*

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájnūhun levadura jeē ní quihin ìn ñahan, te ni saca ña jíin únī kilo harina, te ni ndaa ndíhi ñujen ni sáha. Achí yá.

*Siquī jeē quiví yó yéhyí túū
(Mt. 7.13-14, 21-23)*

²² Te jíca Jesús jeē cuahán yā ichi ñúū Jerusalén, te yáha ya tǎcá ñuu náhnu jíin ñuu lulí, te stéén yā jnūhun. ²³ Te ìn ñayuu ni cajnūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condihvī ni rō quivícoo ró ndaha Yaā Dios. Chi cúu nájnūhun ìn yéhyí túū. Te cáhán rī jíin ró jeē ìn quiví te cuehē ñayuu nducú i quivícoo i, te ma cúu ga. ²⁵ Te quiví ún te sáha ri nájnūhun ìn tēe chíí vehe jeē ndocuiñī de te nacasi de yéhyí. Te ichi yátá véhe cuiñi ró jíjnáhan ró, te scáján ró yehyí, te cahān rō: Nune ní yéhyí na quivícoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñuu na ní steén ni jnúhun, achi rō. ²⁷ Te cahān maá de:

Cáhán rī jín ró jeē tu jíní rī rohó ndé chi véjicoo ró. Cuijiyo quingoo ró, chi ñayuu casáha jniñu néé cácuu ró. Achi de. ²⁸ Te quivícoo ró núū ndahyú rō, te nacayihí yuhu ró jéē ndoho xeēn rō. Te coto ró núū Abraham jín Isaac jín Jacob jín ndihí tēe ni canacani jnūhun Yaā Dios, cáyūcú de ñuu nuū ndácu ya jniñu. Te rōhó, vēsú cácuu ró yúcūn de, te quivícoo ró núū ndoho ró. ²⁹ Te cuehē ñayuu, vēsú tu cácuu i yucūn de, te quijicoo i ichi núū cáne niāndii jín ichi núū quée niāndii, ichi norte jín ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

*Jeē ní cucuíhyá ni yā siquī ñáyuu ñuu Jerusalén
(Mt. 23.37-39)*

³¹ Te máá quívī un ní quecoo jecu tēe fariseo, te ni cacahān de jín yá:

Cuijiyo ní quihīn ní inga lado, chi cúní Herodes cahni de níhín, áchí de.

³² Te ni cahān yā:

Cuángoo te castūhun ró nuū tēe mañoso un jéē ná tu jinū quivī cuu rī, chi vijna jín sájnē quenehen ri tachī ini ñayuu, te nasávāha ri ñayuu cácuu. Te isá te jīnu jniñu sáha ri, achi rō. ³³ Chi cánuú jéē cáca ri quihīn rī vijna jín sájnē jín isá, te jinū rī Jerusalén. Chi tēe cánacani jnūhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

³⁴ 'Róhó ñuu Jerusalén, jéhni rō tēe cánacani jnūhun Yaā Dios, te jéhe ró yúū xinī tée tájí Yaā Dios

vějicoo nuū rō. Te cuehē jínu ni cuni rī nastútú rí sēhe ró, nájñūhun ndují jéē nastútú tí sēhe tí chīji ndijēn tī, te tu ní cúní rō. ³⁵ Núu súcuan te vijna te stóo uun na ri rohó jíin séhe ró. Te cáhán rī jíin ró jéē ndé vijna te ma cóto cuiṭi gā rō nuū rī, chí nde quiji quivī jeē cahán sēhe ró: Yōhyo vāha Yaā cúu Yaā véndiji jíin jniñu máá Jítóho yō Yaā Dios, achi i. Achí yá.

Jeē ní nasávāha ya ñn tēe cúhú cuehyī cuiñi

14

¹ Te ñn quivī ndétātu ní jehēn yā vehe ñn tēe fariseo cujéhnu, ni jecaji yā staā jíin de. Te tāca gá tēe fariseo cájito yuhu de ya núu stívī yá. ² Te yūcuan íne ñn tēe cúhú de cuehyī cuiñi, índichi de nuū yā. ³ Te ni cajñūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuḥū quivī ndétātu, chí tuú? áchí yá.

⁴ Te máá de tu ní cácahān cuiṭi de. Te ni jñi ya tēe cúhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jíin de jíjnáhan de:

¿Ndé ñn róhó núu burro ró chí stíquī rō ñingava tí iní pozo, te á tu yachī natava rō tí vēsú quivī ndétātu cúu, chí naún? Achí yá.

⁶ Te tu ní cúu stíó cuiñí de ni ñn jñūhun nuū yā jeē súcuan ni cahān yā.

Jñūhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jñūhun yáha jíin de:

8 Núu ñn tēe cana de jeē quihín rō ñn vico nándāha, te ma cúcōo ró lugar nuū yíñúhún gá. Chi núu súcuan te sanaa te je ni cana de ñn tēe cújéhnua ga vēsú rohó. 9 Te quee tēe ni cana rōhó, te cahān de jíin ró: Ndonga, te na cúcōo tēe yáha jíñā. Yūcuán na te cucanu rō jeē quihín rō cucōo ró ndé sandihí na. 10 Chi sa suhva núu ni cana ñn tēe rōhó, te cucōo ró ndé lugar sandihí na. Te núu quee tēe ni cana rōhó, te cahān de jíin ró: Amigo, nehen cucōo ró ñn lugar nuū yíñúhún gá, achí de. Yūcuán na te ñayuu cáyūcu mesa jíin ró coto i jeē sajuhnu de rōhó. 11 Súcuan ni cahān rī jñūhun yáha návāha cuni rō jeē tāca ñayuu jeē sajuhnu i máá i, nuu i sáha Yaā Dios. Te ñayuu jeē snūū i máá i, ndujéhnua i sáha ya. Achí yá.

12 Te suni ni cahān yā jíin tēe ni cana ya yéji yā staā:

Núu sáha ró ñn vico cúsamá chí jēe cuxíni, te ma cána ró ñayuu cácuu amigo rō, jíin ñani rō, jíin jnāhan ró, jíin ñayuu cucá. Chi núu súcuan te suni máá i nacana i rōhó, te súcuan nanihín rō jeē ni jéhe ró. 13 Chi sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíin ñayuu cuaá. 14 Te súcuan te quendōo ndetū rō, chí ma cúu nacuāha i nuū rō. Te nihín rō tahū rō quivī nátecu ñayuu ndaā, achí yá.

Jñūhun yátá síquī vico cúxíni

15 Te ñn tēe yéji staā jíin yá, ni jini de jñūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

16 Yūcuán na te ni cahān Jesús ñn jnūhun yátá jēē steén yā jeē cána Yaā Dios ñayuu quívicoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu. 17 Te máá quívī cuxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je íyó túhva ndihi, áchí mozo. 18 Te ndihi i ni cacahān i jeē na cóne cáhnu ni de chi ma quíngoo i. ñn tēe ni cahān de: Sáá ní jeen ri ñn ñuhun te cánuú quícondēhe rí, te na cóne cáhnu ni de chi ma jeé rī. Achí de. 19 Te ñnga de ni cahān: Ni jeen ri uhūn yunta stiquī, te quihīn rī coto ndee rī tī, te na cóne cáhnu ni de nuū rī chi ma jeé rī, achí de. 20 Te ñnga de ni cahān de: Sáá ní quíjnáhan ri, te jeē yúcuán ma cúu jeē rī, achí de. 21 Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quítī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá, na quíjicoo i vico, áchí de. 22 Te ni jehēn mozo, te ni ndee de, te ni cahān de jíin patrón de: Je ni sáha ná jēē ni cahān ní, te cúmanī gā ñayuu te chitú vehe ní, áchí de. 23 Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quíjicoo i, návāha chitú vehe ri. 24 Chi cáhán rī jíin ró jeē ní ñn tēe ni cana ri xīhna ñūhún, ma cuáha cuítī rī jnūhun jeē cuxíni de vehe ri, achí de. Achí yá.

Jnūhun jeē cánuú nacani vāha ni yō te condiquñ yō Cristo

²⁵ Te cuehē ndasí ñáyuu cándiquīn i Jesús cuango i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin rúhū, ma cúu cuu i ñayuu scuáha jíin rí. Te núu ndíhví gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu. ²⁷ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jíin rí. ²⁸ Chi núu ndé ñn ró cúní rō sáha ró ñn vehe cáhnu, ¿á tu cánuú jéē xíhna gā cucōo ró te tava rō cuenta núu canda xūhun jéē sínu ró? ²⁹ Chi núu tuú, te núu je ni jequin rō cimientu, te tu cánda xūhun ró sínu ró, yūcuán na te tāca ñáyuu sácatā i coto i róhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achi i. ³¹ Te suni súcuan núu ñn rey quihīn de cuajnáhan de jíin ñnga rey jeē véji síquī de, ¿á tu cánuú jéē xíhna gā cucōo de te nacani ni de núu canda uxī mil soldado jeē cuajnáhan de jíin ñnga rey jeē véji síquī de jíin ócō mil soldado? ³² Chi núu tú canda de, te ní ní jícá gá véji ñnga rey, te tají de tēe cándiso jníñu, cajnūhún de na vé cuní ñnga rey jeē cuáha de nuū, te jecuiñī-ni. ³³ Te máá ró jijnáhan ró, suni súcuan cánuú jéē xíhna gā nacani ni rō cahnde ni rō stóo ró ndíhi jeē névāha ró, chi núu tuú te ma cúu cuu ró ñáyuu scuáha jíin rí.

Jnūhun yátá síquī ññ
(Mt. 5.13; Mr. 9.50)

³⁴ Te ñayuu cácandíje cácuu i nájnūhun ññ. Vāha íyó ññ, te núu ññ ún na náā jeē uhvuá, ¿te ndese

nduu uhvuā tucu? ³⁵ Tuá cuajníñu cuiti, ni jeē chūhun ñayuu nuū itu, ni jeē ndúu jēhen, chi máá cate iī-ni i. Tāca róhó jéē jíni sōho, na chúsóhó ró. Achí yá.

Jnūhun yátá síquī lanchi ní sana
(Mt. 18.10-14)

15

¹ Te tāca tée cástútú xūhun renta jíin táca gá tēe cásáha cuēchi, ni quecoo de nuū Jesús jeē cuni sōho de jnūhun cáhán yā. ² Te tāca tée grupo fariseo jíin tée cástéén tutu ley Yaā Dios, ni cacahān de síquī yā:

Tēe yáha jétáhú de tāca tée cásáha cuēchi te yéji de jíin, áchí de.

³ Te ni cahān yā jnūhun yátá yáha jíin de:

⁴ ¿Ndé ñn ró núu névāha ró ñn ciento lanchi, te núu scuíta ró ñn tí, te á tu stóo ró cúun xico xahūn cuūn gā tí yucu, te quinanducú ró quiti ní sana ún ndé nanihīn rō tí? ⁵ Te núu ni nanihīn rō tí, te coso sūcun ró tí, te cusī ni rō. ⁶ Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān rō jíin i: Na cusī ni yō, chi ni nanihīn rī lanchi ri jeē ní sana. Achí rō. ⁷ Te cáhán rī jíin ró jeē suni súcuan cúu nde andiví. Chi cusī gā ni yā jíin ñn ñayuu iyó cuéchi núu nacani ni i jeē stóo i cuéchi i, vésú jíin cúun xico xahūn cuūn ñayuu iyó ndāā jeē tuá jíni ñúhún nacani ni i.

Jnūhun yátá síquī ñahan ní scuíta xūhún

⁸ Te núu ñn ñahan névāha ña uxī peso cāa, te núu scuíta ña ñn, ¿á tu nastīn ña lámpara te nastāa ña vehe, te nanducú yúcun ña nde nanihīn ña? ⁹ Te

núu ni nanihīn ña, te nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cúsñ ni yō, chi ni nanihīn rī xūhun jēe ni scuíta ri. Achí ña. ¹⁰ Te cāhān rī jíin ró jeē suni súcuan cúsñ ni tācá ndajéhé Yaā Dios síquī ñn ñayuu iyó cuéchi núu nacani ni i jeē stóo i cuēchi i. Achí yá.

Jnūhun yátá síquī sūchi ní jéhēn jecó

¹¹ Te ni cahān gā yā:

ñn tēe ni iyo uū sēhe yñ de. ¹² Te tēe suchí gá ni cahān i jíin tátá i: Tátā, tahu sáva ní ndajniñu ní, te cuāha ní sava cuu tahū ná, áchí i. Te ni tahu sáva de tahū ndindúú i. ¹³ Te ni cuu jecu-ni quivī, te tēe suchí gá un ní stutú ndihī i ndajniñu i. Te ni quenda i cuahān i ñn ñuu jicá. Te yūcuan ní snāā i tahū i, chi ni jexīn cāhá i. ¹⁴ Te ná ni ndihī ni jexīn i, te ni quee ñn jnamā xeén ini ñuu ún, te ni quejéé cúmanī jeē cáji i. ¹⁵ Yūcuán na te cuanducú jniñu i nuū ñn tēe ñuu ún. Te ni tají de i cuahān i rancho de jeē cóto i quinī de. ¹⁶ Te cúní i caji i vēsú soō ndúchi jeē cáyeji quinī ún, návāha ndutú chíji i. Te ni ñn ñayuu tú na vé jéhe nuū i. ¹⁷ Yūcuán na te ni quejéé i nácani ni i: Tāca mozo casājniñu vehe tátá rī, iyó cuéhē staā cáyeji i. Te ruhū chíjí rī sōco yāhá. ¹⁸ Na quínuhun rī nuū tátá rī, te cahān rī jíin de: Tátā, ni sáva ná cuéchi nuū Yaā Dios jíin núu maá ní. ¹⁹ Vijna te nasūu gá tēe vāha cúu ná jēe cónaní ná sēhe ní. Te cuāha ní jnúhun cuu ná nájnūhun ñn mozo ni, achi rī. ²⁰ Yūcuán na te ni naquihin i ichi cuanuhun i vehe tátá i.

'Te níní jicá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²¹ Yūcuán na

te ni cahān i jín de: Tátā, ni sáha ná cuéchi nuū Yaā Dios jín núū maá ní. Vijna te nasūu gá tēe vāha cúu ná jéē cónaní ná sēhe ní. Achí i. ²² Te máá tátá i chi sa ni cahān de jín táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i. ²³ Te quiquihin ró becerro xéhen, te cahni rō tī na cáji yō, chí sáha yó vico. ²⁴ Chí sēhe yí rí yáha, nájnūhun je ni jihī i, te ni natecu i. Chi tu ní jíní rī ndé chi ní jéhēn i, te ni ndee i, áchí de. Te ni caquejéé de cásáha de vico.

²⁵ Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cájita jéhé ñáyu. ²⁶ Te ni cana i ñn mozo, te ni cajnūhún i na vé cúu jeē cúu. ²⁷ Te ni cachi mozo un núū i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo. ²⁸ Yūcuán na te ni quiñi ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jín i jeē na ndívi i. ²⁹ Te ni cahān i jín tátá i: Níní sáha ná jniñu ndácu ní, te tu cúnihni cuiti ni na núū ní. Te tu jéhe ní vésú ñn lítú núū ná, jeē sáha ná vico caji na jín táca amigo na. ³⁰ Te ni ndee sēhe ní yáha jeē ni jéxīn cāhá i xūhun ní jín táca ñahan. Te ni jehni ní becerro xéhen caji i, áchí i jín tátá i. ³¹ Yūcuán na te ni cahān de jín i: Séhē, róhó chi níní ndéé ró jín rí, te ndíhi jeē névāha ri chí suni cuenta maá ró cúu. ³² Te vijna chí íyó váha jeē sáha yó vico te cusí ni yō. Chí ñani rō yāhá, nájnūhun ni jihī i, te ni natecu i. Chi tu ní jíní yō ndé chí ní jéhēn i, te ni ndee i, áchí de. Achí yá.

Jnūhun yátá síquī mozo jeē ni stáhú de patrón de

16

¹ Te suni ni cahān Jesús jín tēe cáscuáha jín yá:

Īn tēe cúca ní Īyo ĩn mozo de jeē ndíso jníñu nuū tāca gá mozo. Te ni cacahān jín patrón un jeē mozo un snāā cāhá ndajníñu de. ² Te ni cana de mozo un, te ni cahān de jín: ¿Na jnūhun cúu yāha jeē nihín rī sīquī rō? Nacuāha cuenta jniñu ndíso ró, chí ma cóndiso jniñu ga rō nuū mozo rī. Achí de. ³ Yūcuán na te jéni ni maá de: ¿Ndese sáha ri vijna? Chí patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chí cúcanu rī. ⁴ Núu súcuan te jíní rī ĩn jeē sáha ri, návāha ñayuu cájeen nuū patrón rī, cuāha i vehe condee rī núu na quée quivī jeē quenehen de jniñu ri. ⁵ Te ni cana de ná ĩn ná ĩn tēe jeē cátaū nuū patrón de. Te ni cajnūhún de ĩn: ¿Nasaa táú rō nuū patrón rī? ⁶ Te ni cahān tēe ún: ĩn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró inga lista jeē uú xico uxī na, achí de. ⁷ Yūcuán na te ni cajnūhún de inga tēe: Te rōhó, ¿nasaa táú rō? Te tēe un ní cahān de: ĩn ciento cajón trigo, achí de. Te ni cahān de jín tēe ún: Yāhá na cuáha ri lista rō, te na sáha ró inga lista jeē cuún xico na, achí de. ⁸ Yūcuán na te patrón ni cahān de: Nacā jeē ndichí ní sáha tēe cúnéé un, achí de. Te cáhán rī jín ró jeē ñáyuu ñayīvi yáha, ndíchí gá casáha i jeē quendōo vāha i nuū jnáhan i, vēsú ñayuu cá candíje nuū Yaā Dios.

⁹ Núu súcuan te cáhán rī jín ró jeē ndichí gá na sáha ró vēsú jeē ni sáha mozo ndichí un. Chí ini ñayīvi yáha nuū yīhi cuēchi, na sáha ró jniñu váha jín xúhun ró, cuāha ró núu ñáyuu ndahú, návāha

vēsú núu ni ndihí xūhun ró ñayīví yáha, te quīvícoo ró andīví núu coo vehe ró ní cáni.

¹⁰ Tēe jeē squícu vāha jíin ñn jniñu lúli-ni, suni squícu vāha de jíin jniñu cáhnu. Te tēe jeē stahú jíin ñn jniñu lúli-ni, suni stahú de jíin jniñu cáhnu.

¹¹ Núu súcuan te núu tu squícu vāha ró jíin xūhun jeē iyó ñayīví yáha nuū yíhi cuēchi, te ma cuáha ya jeē váha cuu ró ní cáni andīví. ¹² Te núu tu squícu vāha ró jíin ndajniñu jeē ni jéhe núu ya nuū rō ñayīví yáha, te ma cuáha ya tahū cuu ró ní cáni.

¹³ Ni ñn mozo ma cúu cuajniñu de nuū uū patrón. Chi quitī ni de nuū ñn te coo manī de jíin inga, chí squícu vāha de nuū ñn te sájéé ni de nuū inga. Te suni súcuan ma cúu cuajniñu ró núu Yaā Dios te núu máni síquī xūhun ndíhví ni rō, achí yá.

¹⁴ Te tēe fariseo ni casacatā de nuū yā jeē ní cajini de tāca jnūhun cáhán yā, chí tēe cútóó xūhun cácuu de. ¹⁵ Te ni cahán yā jíin de:

Máa ró casáha ró jéé téé ndaā cácuu ró núu ñáyuu. Te Yaā Dios chí jíní yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

Síquī ley Yaā Dios jíin síquī jeē ndácu ya jniñu

¹⁶ Nde ná tu quiiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca téé canacani jnūhun ya. Yūcuán na te ná ni quiiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñáyuu nducú ndéyí i quívícoo i ndaha ya.

¹⁷ Te yí gá cúu jeē náā ñn letra nuū tútu ley yā vēsú jeē náā andīví jíin ñáyīví, chí squícu ndihí jnūhun cáhán.

*Siquī jeē ma stóo jnáhan tē jín ñahan
(Mt. 19.1-12; Mr. 10.1-12)*

¹⁸ 'Núu ñin tēe stóo de ñasihí de te quijnáhan de jín inga ñahan, núu súcuan te cásiquí ndéē de ña. Te núu ñin tēe condeca de ñahan ní ndusñin, suni cásiquí ndéē de ña, áchí yá.

Jnūhun tēe cúcá jín Lázaro

¹⁹ Te ni cahān gā yā:

Ni ñyo ñin tēe cúcá, ní ññuhun de sahma lúu váha ndasí. Te ndiquivī ni ñyo váha ndasí jēē ní yeji de. ²⁰ Te suni ni ñyo ñin tēe ndáhú, nání de Lázaro, néne de yéhyí tēe cúcá un, te ní cáhnu de ñin ndíhyi. ²¹ Te máni cúní de jeē ndutú chíji de jín stāā cuēchi jeē stívi tēe cúcá un. Te quécoo ina te cánayuu ti nuū ndíhyi de. ²² Te ni jihī tēe ndáhú un, te tēcá ndajéhé Yāā Dios cuangoo ya jín ánuá de nde andiví nuū néne Abraham. Te suni ni jihī tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de. ²⁴ Yūcuán na te ni cana cóhó de: Tātā Abraham, cundáhú ni ni sáña, te tají ní Lázaro, na quíchundaji de xinī ndáha de nuū ndúte, te quiji de stáji de yáá ná. Chi xeēn ndóho ná nuū yáñuhūn yāhá. Achí de. ²⁵ Te ni cahān Abraham jín de: Séhē, nucūhun ni rō jeē ni níhīn rō ndíhi jeē váha ná ni cotecu rō, te Lázaro chi sa suhva jnūndóho ni níhīn de. Te vijna je ni ndusñin de yāhá, te róhó chí ndóho ró jíñā. ²⁶ Te suni íyó ñin jeē cunú téyí, íne mēñhu yó jijnáhan yó. Te ñayuu cáhīin yāhá, vēsú cécuni i yāha i jeē i nuū rō, te ma cúu. Te ni ma cúu yāha máá ró quiijicoo ró yāha. Achí Abraham.

27 Yūcuán na te ni cahān tēe cúcá: Núu súcuan te cáhán ndahú ná jín ní, Tátā Abraham, tají ní Lázaro na quihín de vehe tátá na. 28 Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yáha, áchí de. 29 Te ni cahān Abraham jín de: Je cánevāha i tutu jeē ní tee Moisés jín táca tée ni canacani jnūhun Yaā Dios. Suu yūcuán na chúhun ni i, áchí Abraham. 30 Te ni cahān tucu tēe cúcá: Vēsú súcuan, Tátā Abraham, te núu ññayuu ni jihí quihín nuū i, yūcuán na te nacani ni i jeē stóo i cuēchi i, áchí de. 31 Te ni cahān Abraham jín de: Núu tu chúhun ni i jnūhun ni nacani Moisés jín táca tée ni canacani jnūhun Yaā Dios, suni ma candíje cuítí i núu natecu ññ ndīyí quihín nuū i, áchí de.

*Xeēn coo siquī ññayuu squíví jnáhan nuū cuéchi
(Mt. 18.6-7, 21-22; Mr. 9.42)*

17

1 Te ni cahān Jesús jín tée cáscuáha jín yá:

Máni íyó jéē nducú squíví ññayuu nuū cuéchi. Te nacā xeēn ndoho ññayuu jeē squíví jnáhan nuū cuéchi. 2 Vāha ga núu ni conuhnī ññ yōso cáhnu sucūn i te quēe i chíji ndute mar, vēsú jeē squíví i ññ sūchi lúli yáha núu cuéchi. 3 Coto ma sáha ró súcuan jíjnáhan ró.

'Te núu jnáhan ró sáha de cuēchi siquī rō, te cahān rō nuū de. Te núu nacani ni de, te cone cáhnu ni rō nuū de. 4 Te núu uxā jínu jeē ññ quíví sáha de cuēchi siquī rō, te núu uxā jínu nácani ni de te cahān de jín ró jeē cone cáhnu ni rō chí ma sáha ga de, te cánúú cone cáhnu ni rō nuū de. Achí yá.

Jeē yóhoyo cújéhnū jnūhun cándíje

⁵ Te tēe cácuu apóstol ni cacahān de jíin Jítóho yō: Sáha ní jeē nīhin ga candíje ná jeē sáha Yaā Dios jeē cájicān na núū yā, achí de.

⁶ Te ni cahān maá Jítóho yō jíin de:

Núu cácandíje ró vēsú ñn tíhlí-ni, nájnūhun ñn ndiquin mostaza jeē tihlí-ni cáa, te cuu cahān rō jeē nūyūhndu yáha na quenda te nucondichi nde nuū mar, te coo nájnūhun cahān rō.

Jeē cánuú squícu vāha yó núū yā

⁷ Ndé ñn ró íyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. ⁸ Chi sa suhva cáhán rō: Sáha ró ndeyu cuxíni ri, te cani ró cóhō rī. Te núu ni cuu ni yeji rī ni jihi ri, yūcuán na te caji maá ró coho ró, cácahān rō. ⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chi jeē cánuú sáha de cúu. ¹⁰ Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chi ní sáha ri máá-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea. ¹² Te ni jinū yā ñn ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de. ¹³ Te ni cacana jee de:

Jesús, Maestro, cundáhú ni ní sáña, áchí de jíjnáhan de.

14 Te ni jito Jesús nuū de, te ni cahān yā jín de:

Cuángoo te stéén rō maá ró nuū tāca sūtū jeē ní canduvāha ró, áchí yá.

Te níní cuángoo de te ni canduvāha-ni de.

15 Yūcuán na te ĩn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. 16 Te ni jecuĩñĩ yítí de nuū yā, te ni jequin de nuū de nde nuū ñúhun, te ni nacuatáhú de nuū yā. Te tēe Samaria cúu de. 17 Te ni cahān Jesús:

¿A násūú ndihúxí de ni canduvāha? Te ĩn gā de, ¿naun tu ní cánandicó de nacuatáhú de? 18 ¿A máñúhún-ni tēe ñuu jicá yāha cúu jeē ní nandicó de nácuatáhú de nuū Yaā Dios?

19 Te ni cahān yā jín tēe ún:

Ndocuĩñĩ quinhun rō. Chi ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

Ndese coo quivĩ jeē ndíji ya ndacu ya jniñu

(Mt. 24.23-28, 36-41)

20 Te tēe fariseo ni cacajnūhún de Jesús ndé quivĩ quejéé jéē ndácu Yaā Dios jniñu ini ñayĩví. Te ni cahān yā jín de:

Ma quēē ndijin jeē ndácu Yaā Dios jniñu. 21 Ni ma cúu cahān ñayuu: Yāha íne ya ndácu ya jniñu, chí: Yūcuan íne ya, achi i. Chi je ndácu Yaā Dios jniñu mēñu ró jijnáhan ró. Achí yá.

22 Yūcuán na te ni cahān yā jín tēe cáscuáha jín yá:

Quee tiempo jeē yóhyo cúu ni rō coto ró jéē ndiji ruhū, Yaā ní nduu tēe, te ma cóto ró jijnáhan ró.

23 Te cahān ñayuu jín ró: Yāha íne ya, chí: Yūcuan

íne ya, achi i. Te ma quíngoo ró condēhe ró, ni ma cóndiquĩn rō i. ²⁴ Chi nájnūhun sáha taja jeē ndíndēé ĩn lado andiví te cúndijin nde inga lado, suni súcuan cuu quiví ndíji ruhū, Yaā ní nduu tēe, chi ndihí ñayuu coto. ²⁵ Te jíni ñúhún jeē xíhna gā ndoho xeēn rī, te ñayuu iyó vijna, squéhichī i ruhū. ²⁶ Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe. ²⁷ Chi quiví un ní cayeji i, ni cajihi i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quíví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndihí i. ²⁸ Te suni súcuan ni cuu quiví ni íyo Lot. Ni cayeji i, ni cajihi i, ni cajeen i, ni caxícó i, ni cataji i itu, ni cajeni i vehe. ²⁹ Te quiví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándiví, te ni snáā ndihí ñayuu. ³⁰ Te suni súcuan coo quiví jeē ndíji ruhū, Yaā ní nduu tēe.

³¹ Te quiví ún te ñayuu cáhĩn yatā véhe, te ndajníñu i ñúhun ini vehe, cáhán rī jíin i jeē ma ndíví i naquihin i, chi cánuú cunu yachī i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajníñu i. ³² Te nucūhun ni rō ndese ni ndoho ñasihí Lot jeē ni jíhī ña. ³³ Te núu ndé ñáyuu cuní i cácu i nuū jnúndóho quiiji nuū i jeē síquí ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē síquí ruhū, te cotecu i ní cáni.

³⁴ Te cáhán rī jíin ró jeē quiví ndíji ri te quíxí uū tēe ĩn jito jecuáā, te ĩn de naquihin ri, te inga de ndōo, chi tu ní cándíje de. ³⁵ Te coo uū ñahan jeē ndíco cáhnu, te ĩn ña naquihin ri, te inga ña ndōo.

³⁶ Te uū tēe sájniñu de nuū ítu, te ñn de naquihin ri, te ñnga de ndōo. Achí yá.

³⁷ Te jeē ní cajini de jnūhun yáha, te ni caca-jnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jíin de:

Nájnūhun jeē cutútú téji ndé-ni cúu nuū catú quiñi ní jíhī, suni súcuan coo tāca jéē ni cahān rī ndé-ni cúu-ni nuū cáhīyo ñayuu.

Jnūhun yátá síquī juez jíin ñahan viuda

18

¹ Te ni cahān yā ñn jnūhun yátá jíin de jeē cánuú jeē niní cácan tahu de, te ma ndínuu ni de jíin. ² Te ni cahān yā:

Ni ñyo ñn juez ini ñn ñuu. Te ni tu ndíso ñyo de nuū Yaā Dios, ni tu yúhú de nuū ní ñn ñayuu. ³ Te suni ñuu un íyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de síquī ñn ñayuu jeē jíto uhū i ña. ⁴ Te cuehē quiñi tu ní cúni de sándaā de, te yūcuán na te ni jeni ni de: Vēsú tu ndíso ñyo ri nuū Yaā Dios, ni tu yúhú rí nuū ní ñn ñayuu, ⁵ te ñahan viuda yáha, yōhyo stáhān ña ruhū, te jeē yúcuan na sándaā rī síquī ñáyuu jeē jíto uhū i ña. Chi núu tuú, te quejéé rí jnaníni ni rī jeē quiñi quiñi ña. Achí de. Achí máá Jítoho yō.

⁶ Te ni cahān gā yā:

Súcuan cúu jeē ni cahān juez, tēe tú ndaā. ⁷ Te Yaā Dios, nasūu súcuan cúu ya, chi sándaā yā síquī jniñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéē cájito uhū i.

¿Te á cuéé jnama ya i? ⁸ Cáhán rī jín ró jeē yachī. Te quiṽī ndíji ruhū, Yaā ní nduu tēe, ¿á nīhīn gā rī ñayuu cá candíje nīhin ini ñayīṽí? Achí yá.

Jnūhun yátá síquī tēe fariseo jín tēe stútú xúhun renta

⁹ Te suni ni cahān yā jnūhun yátá yáha jín jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ĩn tēe fariseo cuahān de templo jeē cacān tahú de. Te ĩn tēe stútú xúhun renta suni cuacacān tahú de templo. ¹¹ Te tēe fariseo, índichi de, te súcuan ni jicān tahú de: Tátā Yaā Dios, na cútahū na núū ní, chí tu cúu ná nájñūhun cándāa sava ga tēe, tēe cuihná, tēe néé, tēe cá síquí ndéé jnáhan cácuu de. Ni tu cúu ná nájñūhun cáa tēe yúcuu jéē stútú xúhun renta jeē scáa ga de jícán de nuū ñáyuu. ¹² Te uū jínu jeē semana iyó ndite ni na núū ní, te jéhe ná nuū ní ĩn ĩn síquī tāca úxī ndajníñu nīhín na, áchí de. ¹³ Te tēe stútú xúhun renta, ni jecuiñī jicá de nuū templo, ni tu ní chúndeyí ni de jeē ndonehen de nuū de, chí sa suhva ni caní de yīquí jicā de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chí tēe íyó cuéchi cúu ná, áchí de. ¹⁴ Te cáhán rī jín ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñayuu jeē sa jéñu i máá i, sa ndululí i. Te ñayuu jeē sálulí i máá i, sa ndujéñu i. Achí yá.

*Jeē ni jicān tahú Jesús jehē sūchi lúlí
(Mt. 19.13-15; Mr. 10.13-16)*

¹⁵ Te ni quecoo ñayuu jín sūchi lúlí núū Jesús, jeē na sóo yá ndaha ya xinī i. Te tēe cáscuáha un ní

cajini de jeē súcuan cúu, te ni cacahān de nuū ñáyuu vējicoo jíin i. ¹⁶ Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo í. Chi ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā Dios jeē ndacu ya jniñu nuū i. ¹⁷ Te jendaá cahán rī jíin ró, núu ñn ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñn sūchi lúlí, ma quívi cuiti i ndaha ya, achí yá.

Jnūhun tēe cúcá

(Mt. 19.16-30; Mr. 10.17-31)

¹⁸ Te ñn tēe cújéhnu ni cajnūhún de ya:

Tēe vāha cúu ní Maestro. ¿Te na jniñu vāha sáha ná te nihīn tahu na cotecu na ñí cáni andívi? Achí de.

¹⁹ Te ni cahān Jesús jíin de:

¿Naun cáhán rō jeē tēe vāha cúu rī? Tú ni ñn tēe vāha íyó, chí máá ñn-ni Yaā Dios. ²⁰ Je jíin rō tácá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnūhún ró. Cuatáhú ró nuū tatá rō nuū naná rō. Achí yá.

²¹ Te ni cahān maá de:

Tácá jniñu yáha je ni squícu ná ndé ná lulí ná, achí de.

²² Te Jesús ni jini ya jnūhun yáha, te ni cahān yā jíin de:

Ñn na jniñu cúmanī sáha ró núu súcuan. Xíco ndíhi jeē névāha ró, te cuāha ró núū ñáyuu ndahú. Te nde andívi cuāha ya jeē vāha ndasí núū rō. Yūcuán na te quiji ró condiquīn rō ruhū, achí yá.

²³ Te ná ni jini sōho de jnūhun yáha, te yōhyo ni cucuíhyá ni de, chí cúcá ndasí de. ²⁴ Te jító Jesús jeē súcuan cucuíhyá ni de, te ni cahān yā:

Tēe cúcá chí yōhyo yí quívícoo de ndaha Yaā Dios jeē ndacu ya jniñu nuū de. ²⁵ Yachī gā yāha ñin camello yaū yutícuí vēsú jeē quíví ñin ñayuu cucá ndaha Yaā Dios jeē ndacu ya jniñu nuū i, áchí yá.

²⁶ Te tēe ní cajini jnūhun yáha, ní cacahān de:
¿Ndé ñayuu cúu jeē cácu núu súcuan? Achí de.

²⁷ Te ni cahān yā jíin de:

Ñayuu chí ma cúu squíví i máá i ndaha Yaā Dios, te máá yá chí cuu sáha ya, achí yá.

²⁸ Yūcuán na te ni cahān Pedro:

Sāña jíjnáhan ná ní castóo ná ndihí jeē cánevāha ná, te cándiquín na níhín, áchí de.

²⁹ Te máá yá ni cahān yā jíin de:

Jendaá cahán rī jíin ró jíjnáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē síquí jeē scáca i jnūhun jeē ndácu Yaā Dios jniñu nuū ñayuu, ³⁰ núu súcuan te nanihín cuehē gā i ini ñayíví yáha, te tiempo quiiji te cotecu i ní cáni, áchí yá.

Jeē ni cáhān tucu ya jeē cúu yā

(Mt. 20.17-19; Mr. 10.32-34)

³¹ Te ni cana sín ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndihí jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán. ³² Chí ñayuu nastúu i ruhū nuū tée nación Roma jeē cáyūcú Jerusalén cándacu jniñu. Te tēe un sácatā de nuū rī, te cahān neé de

nuū rī, te tesīhí de nuū rī. ³³ Te cani de ruhū, te sáá te cahni de ruhū. Te nuū uní quivī te natecu rī. Achí yá.

³⁴ Te máá de tu ní cájecūhun cuiti ni de tāca jnúhun yáha. Chi jnúhun yí cúu, te tu ní cúu jecūhun ni de jeē cahán yā.

*Jeē ní nasávāha ya #n tēe cuáá ñuu Jericó
(Mt. 20.29-34; Mr. 10.46-52)*

³⁵ Te ni cuyajni ya cuahān yā ñuu Jericó. Te #n tēe cuáá néne de yuhíchi, jícán de caridad. ³⁶ Te ni jini sōho de jeē yáha cuehē ñayuu cuangoo i, te ni cajnúhún de naun cuángoo i. ³⁷ Te ni cacahān i jín de jeē Jesús, tēe ñuu Nazaret, yáha ya cuahān yā. ³⁸ Yūcuán na te ni cana jee de:

Jesús Séhe yucūn David, cundáhú ni ni sáña, áchí de.

³⁹ Te ñayuu cuangoo ichi núú yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víí, achí de.

⁴⁰ Yūcuán na te ni jecuiñī Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnúhun yá de:

⁴¹ ¿Na vé cuní rō jeē sáha ri jín ró? achí yá.

Te ni cahān de:

Jeē na ndúndijin tinūu ná cuní na, áchí de.

⁴² Te ni cahān Jesús jín de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, achí yá.

⁴³ Te ni ndundijin-ni tinūú de, te ni ndiquīn de ya, te nácuatáhú de nuū Yaā Dios. Te ndihí ñayuu

jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quīvi Jesús ini ñuu Jericó, te ni yāha-ni ya cuahān yā. ² Te yūcuan íyó ñn tēe cúcá nání de Zaqueo, te cújéhnú de nuū tēe cástútú xúhun renta. ³ Te cúní de coto de návāha cuni de ndé ñn cúu Jesús. Te tu ní cúu, chí cuehē ñayuu cuango i jíin yá, te ndiqui-ni cáa de. ⁴ Te jínu de ni cosnúu de. Te ni caa de xinī ñn nuyūhndú návāha coto de nuū yā, chí yūcuan yáha ya quihīn yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chí jíni ñúhún jéē ndóo ri vehe ró vijna, áchí yá.

⁶ Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de. ⁷ Te ni cajito ñayuu jeē súcuan ni cuu, te ni cacahān i siquī yā jeē cuahán yā ndōo ya vehe ñn tēe sáha cuēchi. ⁸ Yūcuán na te ni ndocuññi Zaqueo, te ni cahān de jíin máá Jítoho yō:

Vijna te sava ndihī ndajníñu ná chí cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná únī gā siquī naquihin i, áchí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chí ni candíje de nájñūhun ni candíje jíi de Abraham. ¹⁰ Chí ruhū, Yaā ní nduu tēe, ni quiiji ri nducú rí ñayuu jeē jnahnú ndetū, te jnama ri i, áchí yá.

Jnūhun yátá síquī uxī mozo jín xūhun

¹¹ Te nuū ñayuu ní cajini tāca jnūhun yáha, ní cahān gā Jesús ñn jnūhun yátá jéē steén yā ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jéē ndácu ya jniñu sáha Yaā Dios. ¹² Te ni cahān yā:

Ñn tēe cújéhnu cuahān jicá de ñnga nación, návāha nihīn jniñu de cuu de rey, te ndiji de ndacu de jniñu. ¹³ Te nde ná tu quihīn de, te ni cana de uxī mozo de, te nuū ñn ñn i ní jéhe de ñn xūhun jéē ndeé yahu ndasí. Te ni cahān de jín i: Sájniñu ró jéē na ndúcuehē xūhun yáha jíjnáhan ró níni jéē quihín rī te ndee rī, achí de. ¹⁴ Te ñayuu nación de cáquīñi ni i nuū de, te ni catajī i jecu tēe cándiso jniñu cuangoo yatā de jeē cahān: Tu cánujnahan ni ñayuu nación na jéē cuáha ní jniñu nuū tée yáha jéē cuu de rey nuū i, achí. ¹⁵ Te vēsú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núū, návāha na cúni de nasaa ni canihīn ñn ñn i síquī. ¹⁶ Te ni quee ñn mozo un núū de, te ni cahān i: ñn xūhun jéē ni jéhe ní núū ná, ni nduu uxī, achí i. ¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jín ñn jniñu lúlí-ni, te víjna te sáha ri jeē cújéhnu ró ndacu ró jniñu nuū uxí ñuu jnñi ri, achí de. ¹⁸ Te ni quee ñnga mozo, te ni cahān i: ñn xūhun jéē ni jéhe ní núū ná, ni nduu uhūn, achí i. ¹⁹ Te suni ni cahān de jín mozo un: Róhó, cújéhnu ró ndacu ró jniñu nuū uhún ñuu jnñi ri, achí de. ²⁰ Te ni quee ñnga mozo, ni cahān i: Yāha nácuāha ná xūhun ní, chí ni chuvāha ná ini ñn pañuelo. ²¹ Chi ni yūhu ná

nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, áchí de. ²² Yūcuán na te ni cahān rey: Mozo neé cúu ró núu súcuan, te jíin jnúhun ni cahān rō te sándaā rī jeē iyó cuéchi ró jēē tu ní sájniñu ró jíin xúhun rí. Chi jéni ni rō jeē tēe xeēn cúu ri, te cuehē gā nándacān rī vēsú jeē ni jéhe ri, te cuehē gā cuní rī vēsú jeē cúu sáha mozo rī. ²³ Núu súcuan ¿te naun tu ní chúne ró xúhun rí vēsú nuū banco? Te jeē ní ndee rī te naquihín rí xúhun rí nde jíin séhe xúhun núú. Achí de. ²⁴ Te ni cahān de jíin ñáyuu cáhīin yūcuán: Quende xúhun jíñā nuū i, te cuāha ró núu mozo jeē névāha uxī, achí de. ²⁵ Te ñayuu un ní cacahān i jíin de: Te ndese, chi je névāha de uxī, achí i. ²⁶ Te ni cahān tucu rey: Cáhán rī jíin ró jeē ñáyuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ²⁷ Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihín de na quíjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén
(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihi ni cahān yā jnúhun yáha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de. ³⁰ Te áchí yá jíin de:

Cuáhán ñuu lulí íne ichi núú. Te núu ni quívi ró, te nihín rō ñin burro núhni tí, jeē ní ñin tēe ná tu coso de tí. Te ndají ró tí quiji ró jíin tí. ³¹ Te núu ndé ñin

cajnūhún naun cándají ró tī, te cahān rō jíin: Máá Jítóho yō jíni ñúhún yá tī, achi rō. Achí yá.

³² Te cuangoo tēe ni tají yá, te ni canihīn de ti nájnūhun ni cahān yā jíin de. ³³ Te jeē cándají de ti, te ni cacahān jítóho tī jíin de:

¿Naun cándají ró burro ri? achí.

³⁴ Te ni cacahān de:

Máá Jítóho yō jíni ñúhún yá tī.

³⁵ Te ni ndecoo de jíin tí nuū Jesús. Te ni casoó de sahma de siquī tī, te ni casáha de jeē ní jecosō yā siquī tī. ³⁶ Te ná-ni cuahān yā, sáá cáscáá ñayuu sahma i ini ichi. ³⁷ Te nuū ní cuyajni ya nuū cúun ichi yucu Olivos, te ndihi ñayuu cácdíje jeē cándiquīn i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios siquī tācá jniñu jéhnú ni sáha ya ni cajito i. ³⁸ Te áchí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhnú Yaā Dios, achí i jíjnáhan i.

³⁹ Yūcuán na te jecu tēe fariseo cáhīn mēhñu ñáyuu cuehē ún, ní cacahān de jíin yá:

Maestro, cahān ni núū ñáyuu cándiquīn nihín jéé na cási i yuhu i, áchí de.

⁴⁰ Te ni cahān Jesús:

Cáhán rī jíin ró jeē núu ñayuu yáha na cási i yuhu i, te tāca yúū chi cana jee, áchí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴² Te ni cahān yā:

Róhó ñáyuu Jerusalén, yóhoyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te siquī jeē tu cácdíje ró, te vijna chi ma cúu ga

jecūhun ni rō. ⁴³ Chi quee quiv̄i jeē coo jnūndóho, te ñayuu cájito uhū rohó, cuicó ndúū i ñuu rō, te casi cutú i jíin yúū, te tāca lado ndonda i siqūi rō. ⁴⁴ Te ndih̄i vehe scótúú i, te cahni i róhó jíjnáhan ró. Te ma stóo i ni ñn vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácandíje ró. Achí yá.

*Jeē ní quenehen ya ñayuu ini templo
(Mt. 21.12-17; Mr. 11.15-19; Jn. 2.13-22)*

⁴⁵ Te ni quiv̄i ya ini templo cáhnu, te ni quejéé yá quénehen ya tāca ñayuu cájeen quiti te cánaxico núū ñayuu jeē socō i. ⁴⁶ Te ni cahān yā jíin i:

Yósó núū tútu iī jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jíjnáhan ró, chi nájnūhun yaū cava ñacuīhna ní canasáha ró, áchí yá.

⁴⁷ Te ndiquiv̄i ni steén yā jnūhun ini templo. Te sutū cácujeñnu jíin téé cástéén tutu ley Yaā Dios jíin téé cácujeñnu nuū ñayuu ñuu ún, cánducú de modo ndese cahni de ya. ⁴⁸ Te tu cánih̄in de modo sáha de, chi ndiv̄ii ñayuu yōhyo cájetáhú i cájini nahín i jnūhun cáhán yā.

*Siqūi jeē ndíso jniñu Jesús
(Mt. 21.23-27; Mr. 11.27-33)*

20

¹ Te ñn quiv̄i steén yā jnūhun nuū ñayuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujeñnu jíin téé cástéén tutu ley Yaā Dios jíin táca téé jéñnu cándacu jniñu.

² Te ni cacahān de:

Castūhún, ¿ndé ní nihīn jniñu ró jeē sāha ró jniñu yáha? ¿Te ndé ìn ni tee jniñu síquī rō jeē sāha ró súcuan? Achí de.

³ Te ni cahān Jesús jíin de:

Suni ruhū cajnūhun rí rohó ìn jnūhun jíjnāhan ró. Castūhun núu rī: ⁴ ¿Ndé ìn ni tee jniñu síquī Juan jeē ni scuándute de? ¿A Yaā Dios chí táca téē? Achí yá.

⁵ Yūcuán na te ni candajnūhun máa de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácadíje ró de núu súcuan? ⁶ Te núu cahān yō jeē ñáyuu ni catee jniñu un síquī de, te ndivii ñáyuu cahni i yóhó jíin yúū, chí cácadíje i jeē téē ni nacani jnūhun Yaā Dios ni cuu ndije Juan, achí de cácahān máa de.

⁷ Te ni cacahān de jeē tu cájini de ndé ìn ni tee jniñu síquī Juan jeē ni scuándute de. ⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ìn ni tee jniñu síquī rī sāha rī jniñu yáha, áchí yá.

*Jnūhun yátá síquī tēe néé cásajniñu nuū uva
(Mt. 21.33-44; Mr. 12.1-11)*

⁹ Te ni quejéé Jesús cahān yā jnūhun yátá yáha jíin ñáyuu ún:

Ìn tēe ni nachuhun de cuehē uva nuū ñúhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu. ¹⁰ Te máa tiempo ndutútú uva, te ni tají de ìn mozo cuahān nuū téē cásajniñu ún, návāha naquihin de sava ndehē uva un. Te tēe un ní cacani de mozo, te ni canatají de i cuanuhun i súcuan-ni. ¹¹ Te tēe chíí uva ni tají tucu de inga

mozo cuahān. Te tēe cásájniñu ún, suni ni cacahān ndevāha de nuū i, te ni cacani de i, te ni canatají de i cuanuhun i súcuan-ni. ¹² Te tēe chíi uva ni tají tucu de inga mozo cuahān. Te tēe cásájniñu ún, suni ni castújí de mozo un, te ni cascúnu de i.

¹³ Yūcuán na te ni cahān tēe chíi uva: ¿Ndese sáha ri? Na tájí rí sēhe ri jeē maní rī jíin, chí sanaa te núu ni cajito de i te coo yíñúhún de nuū i. Achí de. ¹⁴ Te tēe cásájniñu ún, ná ni cajito de jeē véji i, te ni cacahān de: Tēe chíi táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha tēe chíi uva jíin tēe cásájniñu ún? ¹⁶ Ndihi de te cahni de tēe un jíjnáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aī, núu ma cóo cuiñi súcuan víi, achí i.

¹⁷ Te ndéhe yá nuū i jíjnáhan i, te ni cahān yā:

Núu súcuan ¿te á cájecūhun ni rō jnūhun yáha jēe yosó núu tútu iñ jeē cúu ri nájnūhun ñin yuū? Chi achí tutu:

Yuū jeē ní casquéhichī tēe cájeni vehe, yuū yáha nduu jeē quítuu vehe.

Achí. ¹⁸ Te ñayuu tu cá candíje, ndoho i nájnūhun ndóho ñayuu jeē cotúú siquī yuú te jnánnú i. Te quivī sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē nínga yuū siquī i te cundihī i sáha. Achí yá.

*Siquī xúhun renta**(Mt. 21.45-46; 22.15-22; Mr. 12.12-17)*

¹⁹ Yūcuán na te sutū cácujuhnu jíin tée cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquī maá de cúu jñūhun yátá ní cahān yā siquī tée cásájniñu nuū uva jíin tée cájeni vehe. Te tu ní cúu, chi cáyūhú de jeē quitī ni ñayuu. ²⁰ Yūcuán na te ni catají de jecu tēe cuacoto yuhu de ya, te tēe un cásáha-ni de jeē tée ndaā cácuu de. Te cánducú de sáha de jeē cahán yā ñn jñūhun jeē nihín de cuēchi siquī yā, te quindecena de ya nuū tēe cúu gobernador. ²¹ Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu ñn ñn ñayuu, chi inuū-ni sáha ní jíin í. Te stéén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñi nación yō, chí tuú? áchí de.

²³ Te ni jini yā jeē cácuuni de stáhú de ya, te ni cahān yā jíin de:

¿Najehē cájito ndee rō ruhū? ²⁴ Stéén ñn xūhún na cóto rí. ¿Ndé ñn nuū cúu jeē ndeé nuū xúhun yáha, te ndé síhví cúu jeē ndeé yāhá? áchí yá.

Te ni cacahān de jíin yá:

Nuū jíin síhví rey un cúu, áchí de.

²⁵ Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, áchí yá.

²⁶ Te tāca tée ún tu ní cúu nihín de cuēchi siquī yā jíin ni ñn jñūhun cáhán yā, cájito jínúu ñayuu. Chi sa ni canaa ni de jeē ndichí ní stió cuíñí yā jñūhun nuū de, te tuá na vé ni cacahān de.

Jeē ní cacajñūhún de siquī jeē nátecu ndīyī
(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndīyī. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuññī i nuū ndīyī ñani de, áchí tutu. ²⁹ Núu súcuan te ni íyo uxā ñani. Te tēe núú ní quijnáhan de jíin ñahan. Te ni jihī de, te tú sēhe de ní íyo. ³⁰ Te tēe uū ni naquihin de ña, te suni ni jihī de, te tú na sēhe de ní íyo. ³¹ Te tēe unī ni naquihin de ña. Te suni súcuan ndihúxá de ni condeca de ña, te ni cajihī ndihī de, te ni ñn de tú sēhe de ní íyo. ³² Te jeē sándihí te suni ni jihī ñahan ún. ³³ Núu súcuan te núu na nátecu de jíjnáhan de quiivī nátecu ndīyī, ¿te ndé ñn de cuu ña ñasihí de? Chi ndihúxá de ni condeca de ña. Achí de jíjnáhan de.

³⁴ Yūcuán na te ni cahān yā jíin de:

Ñayīvi yáha chi cáquijnáhan tēe jíin ñahan. ³⁵ Te ñayuu vāha jeē natecu i quiivīcoo i andiví, ma quijnáhan ga i yūcuán, chi tuá na jñūhun quijnáhan tēe jíin ñahan coo. ³⁶ Ni ma cúu cuiti gā i, chi coo i nájñūhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē nátecu ndīyī, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸ Te jeē ni cáhān de súcuan cúu jeē ní cachi de jeē cátecu tāca ndīyī. Chi vēsú je ni cajihī i,

te cátecu i nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de cajnūhún de ya.

*Siquī jeē cúu Cristo sēhe yucūn David
(Mt. 22.41-46; Mr. 12.35-37)*

⁴¹ Te ni cahān yā jíin de jíjnāhan de:

¿Ndese cúu jeē cácahān ñayuu jeē Cristo cúu sēhe yucūn David? ⁴² Chí máá David suhva ni cahān de jnūhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiji:

Cucōo ró lado váha ri nuū kujéhnú ró,

⁴³ te na sáha ri jeē quende rō poder tāca jéē cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

*Jeē ni cáhān yā jeē iyó cuéchi de jíjnāhan de
(Mt. 23.1-36; Mr. 12.38-40; Lc. 11.37-54)*

⁴⁵ Te ni cahān yā jíin tēe cáscuáha jíin yá, te suni ni cajini sōho ndihí ñayuu:

⁴⁶ Coto má cándíje ró táca tēe cástéén tutu ley. Chí cácusī ni de cáñuhun de sahma cáni jeē steén jeē kujéhnú de, cájica cuu de jíin. Te cánujnahan ni de jeē cahān yíñúhún ñáyuu jíin de nuū yáhu. Te cánujnahan ni de cucōo de nuū silla yíñúhún gá ini vehe iī sinagoga, jíin silla yíñúhún gá nuū víco cáyeji ñayuu. ⁴⁷ Te cáquende de vehe ñahan ní caquendōo ndáhú. Te nahán cájicān tahu de

návāha cani ni ñayuu jeē tú na cuēchi de. Tēe yáha jíjnáhan de chi xeēn gā ndoho de castigo. Achí yá.

Jeē ni sócō ñahan viuda xūhún
(Mr. 12.41-44)

21

¹ Te ná ni īyo ya ini templo, te jíto ya nuū ñáyuu cucá jéē cáchuhun i cuehē xūhún ini tāca yéjnū nuū cásocō i. ² Te suni ni jito ya nuū ñn ñahan viuda jeē ndóho ndáhú, te ni chuhun ña uū centavo lulí ini yejnū ún. ³ Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu. ⁴ Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

Jeē ní cachi yā jeē náā templo
(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yúu luu jíin táca jéē ní casocō ñayuu. Yūcuán na te ni cahān yā:

⁶ Ndihi jeē cájito ró yáha, quee quivī jeē ma cóso jnáhan ga ni ñn yuū, chi ndihí jnanū, achí yá.

Na seña coo nuū cuácuyajni ndihí ñayiví
(Mt. 24.3-28; Mr. 13.3-23)

⁷ Te ni cacajñuhún de ya:

Maestro, ¿ndé quivī coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cahān ní? áchí de.

⁸ Te ni cahān yā:

Coto ró jēē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quivī ndihí ñayīví, achi de. Te ma cóndiquīn rō de. ⁹ Te núu nihīn rō jnūhun jeē tāca lado iyó guerra te cándonda ñayuu síquī tohō, te ma yūhu ró, chi cánuú jēē xíhna gā coo súcuan, te ni ma jíinú yachī quivī ndihí ñayīví. Achí yá.

¹⁰ Te ni cahān gā yā:

Ndonda nación síquī inga nación, te ndonda ñuu síquī inga ñuu jeē cuajnáhan. ¹¹ Te cháha chúcuan jnáa téyí, te coo jnamā jíin cuéhyī xeēn. Te coo seña jéhnú ichi ándiví jēē yūhú ndasí ñayuu coto i.

¹² Te nde ná tu coo tācá jniñu yáha, te coto xeēn i róhó, te jni i róhó. Te quindeca i sava ró táca vehe īi sinagoga jeē cahán i cuēchi síquī rō. Te chune i sava ró vecāa. Te quindeca i sava ró núu tāca rey jíin núu tācá gobernador, te cahān i cuēchi síquī rō jeē síquí jeē cácandíje ró rúhū. ¹³ Te jeē súcuan coo, te cuitē núu ga jnūhun ri, chi nacani ndaā rō nuū de jíjnáhan de. ¹⁴ Núu súcuan te cundaā ni rō jeē ma nácani ni rō xíhna gā ndese stío cuíñí rō nuū de te cācu ró. ¹⁵ Chi ruhū cuāha ri jnūhun ndíchí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i síquī rō. ¹⁶ Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñayuu xeēn. Te cahni i sava ró. ¹⁷ Te tāca ñayuu chi quitī ni i nuū rō jeē síquí ruhū. ¹⁸ Te ni ĩin ixí xíní rō jíjnáhan ró ma náā, chi coto ya rohó. ¹⁹ Te núu cuiñi nīhin ró jíin jnūhun ri, te cotecu rō ní cáni.

²⁰ Te núu ni cajito ró jēē ní cajicó ndúu soldado

ñuu Jerusalén, te na jécūhun ni rō jeē jé yajni naa ñuu ún. ²¹ Yūcuán na te ñayuu cáyūcú región Judea, na cūnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīin nde rancho, ma nándicó i ñuu ún. ²² Chi tāca quiv̄i un cuáha Yaā Dios castigo nuū ñáyuu jeē siqūi cuéchi i, návāha squícu tāca jnúhun jeē yosó núu tútu. ²³ Te quiv̄i ún nacā jeē ndahú ñahan cáñuhun sēhe jín ñahan cándeca yiquín, chi ma cúnihin ña cunu yachī ña. Chi yōhyo xeēn coo jnūndóho ini ñayiv̄i, te quiji castigo xeēn siqūi ñáyuu yáha. ²⁴ Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nīhin i jniñu nuū ñáyuu ñuu Jerusalén, nde jīnu tiempo jeē jéhe Yaā Dios jnūhun ndacu i jniñu.

*Ndese coo quiv̄i ndiji Yaā ní nduu tēe
(Mt. 24.29-35, 42-44; Mr. 13.24-37)*

²⁵ Yūcuán na te coo seña nuū níandii jín núu yoó jín núu quimi. Te ini ñayiv̄i te quiji jnūndóho xeēn siqūi ñáyuu tācá nación. Te cunéé ni i, te yūhú i jeē níhin xeēn mar te ndóna xeēn ndute mar vēji nuū ñúhun. ²⁶ Te cuu sōó sava ñayuu jeē cáyūhú i cándetu i tāca jnūndóho quiji siqūi ñayiv̄i. Te tāca jéé ín andiv̄i chi quis̄i i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jín vícō, te condiso ri cuehē poder, te yōhyo luu cujéhu ri. ²⁸ Te núu ni quejéé táca jniñu yáha, te ndeȳi coo ni rō, te cocunuū rō andiv̄i, chi je yajni jnama ya rohó. Achí yá jín de jínáhan de.

²⁹ Te suni ni cahān yā jnūhun yátá yáha:

Condēhe jínáhan ró ndese sáha nundēhe higo jín táca gá yujnu. ³⁰ Núu cájito ró jéé ní quejéé náne

numa yújnu ún, te cájini rō jeē jé yajni coo tiempo jihní. ³¹ Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayīví.

³² Jendaá cahán rī jíin ró jeē ma cúū ndihī ñayuu tiempo un, chi nde squícu ndihī jniñu ún. ³³ Andiví jíin ñáyīví chi naa, te tāca jnúhun cáhān rī chi ma náā, chi ndihī squícu.

³⁴ Te coto ma stívī ró maá ró jijnáhan ró jéē sáha ró táca cuéchi, jíin jéē najīni ró, jíin jéē cujnéñu ró jíin táca ndajniñu cotecu rō, návāha tú sanaa ni rō te quee quivī un síquī rō. ³⁵ Chi nájnūhun jeē núu ñin trampa, súcuan quee jnūndóho síquī ñayuu cáyūcu ní cáhnu ñayīví. ³⁶ Núu súcuan te ndito coo ni rō, te níni cácan tahu rō, návāha cuu cācu ró núū tāca jnūndóho jeē quíji ún, te cuu cuiñi ró núū ruhū, Yaā ní nduu tēe. Achí yá.

³⁷ Te ndiquivī steén yā jnūhun ini templo, te ndijnahan jecuáā jéndō ya nde yucu jeē naní Olivos. ³⁸ Te tāca jénéhen quécoo ñayuu nuū yā ini templo jeē cúni sōho i jnūhun steén yā.

*Jeē ní casquíjnahān de jnūhun jñi de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ² Te sutū cácujuhnu jíin tée cástéén tutu ley, ni canducú yuhu de modo cahni de Jesús, chi cáyūhú de jeē quítī ni ñayuu.

³ Te ni quiv̄i Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol. ⁴ Te ni jehēn de ni candajnūhún de jíin táca sūtū cácujuhnu jíin tēe cándiso jníñu ini templo, núu ndese nastúu de ya nuū tēe un jíjnáhan. ⁵ Te tēe un ní cacusiñ ni de, te ni cajejnūhun de jeē cuáha de xūhun núū Judas. ⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quiv̄i víco jeē cáyeji ñayuu pan jeē tú na levadura yíhi, te suni quiv̄i un cájehni i londe nájnūhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajnūhún de ya:

¿Nde nuū cuní ni jéē quisátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quiv̄i vicoo ró te najnáhan ró jíin ñn tēe ndíso quiv̄i ndute. Te condiquin rō de quihin rō jíin de nde vehe nuū ndiv̄i de. ¹¹ Te cahān rō jíin tēe chíí vehe ún: Achí máá Maestro: ¿Nde ñn cúu cuarto vehe ní cuáha núú ní núu cuxíni ya vico pascua jíin tēe cáscuáha jíin yá, achi rō. ¹² Yūcuán na te stéén de ñn cuarto cáhnu nde xiní véhe jeē je iyó túhva, te yūcuan sátūhva ró jéē cuxíni yó, áchí yá.

13 Te cuangoo de, te ni canihīn de nájñūhun ni cahān yā. Te ni casátūhva de jeē cuxíni ya vico pascua.

14 Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tée cácuu apóstol.

15 Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. 16 Chi cáhán rī jíin ró jeē ma cáji cuiṭi gā rī vico pascua, chi nde quiji quiṽi ndacu Yaā Dios jniñu n̄ñ ñayīví, te sáa te caji tucu ri, achí yá.

17 Te ni quihin ya ñin copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró. 18 Chi cáhán rī jíin ró jeē ndé vijna te ma cóho ga rī ndūxi uva, chi nde quiji quiṽi ndacu Yaā Dios jniñu n̄ñ ñayīví, te sáa te coho tucu ri. Achí yá.

19 Te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū de jijnáhan de. Te ni cahān yā:

Yáha cúu yiqui cúñu rī jeē socō rī jeē chunaa rī cuēchi ró jijnáhan ró. Te níní caji rō súcuan jeē cáñuhun ni rō ruhū jeē ni jíhī rī jehē rō. Achí yá.

20 Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yáha cúu niñī rī jeē cuáha ri jeē cúu contrato jeé, te cati jeē ndundoo cuēchi ró jijnáhan ró.

21 Te vijna chi tée nastúu ruhū, néne de jíin rí nuū mesa yáha. 22 Chi ruhū, Yaā ní nduu tée, jendaá cúu jeē quihín rī cuu rī nájñūhun je ni sándaā Yaā Dios jeē súcuan coo. Te nacā xeēn ndoho tée jeē nastúu ruhū, achí yá.

²³ Yūcuán na te ni caquejéé de cácajnūhun jnáhan de ndé ñn de cúu jeē nastúu de ya.

Jeē ní cacahān de siquī ndé ñn de cújéhnū ga

²⁴ Yūcuán na te yōhyo ni cacahān de siquī ndé ñn de cújéhnū ga nuū jnáhan de. ²⁵ Te ni cahān Jesús jíin de:

Rey tācá nación chi cándacu nīhin de jniñu nuū ñáyuu cájni de, te cácahān i jeē téé cásáha vāha cúu jeē cácujeñnu nuū i. ²⁶ Te róhó jíjnáhan ró, ma cóo ró súcuan. Chi núu ndé ñn ró cújéhnū ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máá ró tēe jéjníñu nuū jnáhan. ²⁷ ¿Te ndé ñn cúu jeē cujéhnū ga, á téé yéji nuū mesa, chí téé jéni cohō? ¿A násūu téé jeē yéji nuū mesa cúu jeē cujéhnū ga? Te ruhū nasūu súcuan cúu ri, chi ni nasáha ri maá rí nájnūhun tēe jéjníñu nuū rō, chi vēji ri sáha ri jeē nihín tahú rō.

²⁸ Te máá ró cácuu tēe jeē niní cáhīin jíin rí tāca quívī jeē ndóho ri jnūndóho. ²⁹ Núu súcuan te nájnūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jíjnáhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró ñn ñn mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jíiní de ya

(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítóho yō jíin Simón Pedro:

Simón, cuni sōho ró, chi ni jicān Satanás rohó jíjnáhan ró jéé coto ndee rohó nájnūhun jeē síjin trigo, te stúu ndé ñn ró cácuu nájnūhun paja jeē

nayūhu ró, te ndé ñn ró cácuu nájnūhun trigo jeē candíje ñihin ró. ³² Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnáhan ró jíin jnúhun ri. Achí yá.

³³ Te ni cahān de jíin yá:

Je íyó túhva ná quíhñ na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jññ ñayuu rohó, te unī jíinu cahān rō jeē tu jíiní rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnūhun yá de jíjnáhan de:

Ná ni tají rí rohó ní jengoo ró jéē tu ní cóndiso ró ñunu ni yijñi xūhún ni ndijēn, ¿te á ní íyo ñn jeē ní cumanī nuū rō? Achí yá.

Te ni cacahān de:

Tú ni ñn ní cúmanī.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yijñi xūhún. Te tēe jeē tu névāha espada jeē coto de máá de, na xíco de ticāchí de te na cuāan de. ³⁷ Chi cáhán rī jíin ró jeē quee quivī ndoho yó jnūndóho, chi cánuú squícu jnūhun yáha jéē cahān nuū tútu siquī rī: Sáha ñayuu jíin yá nájnūhun cásáha i jíin tée sáha cuēchi xeēn, achí tutu. Chi tāca jnúhun un jéē yosó cáhán siquī rī, chi squícu nahín, achí yá.

³⁸ Yūcuán na te ni cacahān de:

Yáha íyó úu espada, achí de.

Te ni cahān yā jíin de:

Jíin jéē yáha-ni, achí yá.

Jeē ni jícān tahu yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnuhun sáha sáha ya. Te tēe cáscuáha jíin yá ni candiquín de ya cuango de jíin yá. ⁴⁰ Te nuū ni jíin yā yūcuán, te ni cahān yā jíin de:

Cacān tahu rō jijnáhan ró jeē chindéé ñáhán yá rohó jeē ma sáha ró cuéchi núu coto ndee jeneé röhó, achí yá.

⁴¹ Te ni jica ya jecu, cūhva jeē jicá jíin yū jeē squiín. Te ni jecuiñī yití yá, te suhva ni jicān tahu yā:

⁴² Tātā, núu cúní ni te tejiyo ní jnúndóho yáha jeē ma quíji siquí ná. Te nasūu jeē cuní maá ná, chí jeē cuní maá ní na cóo, achí yá.

⁴³ Te ni cane ñn ndajéhé andiví núu yā, te ni jēhe fuerza nuū yā. ⁴⁴ Te cúcuíhyá ndasí ni yā jeē quiji jnúndóho siquí yā, te ni nducú ndeyí gá yā ni jicān tahu yā. Te ni cane jnañū yā, te tóo nuū ñúhun nájnuhun yúyú náhnu niñī.

⁴⁵ Te ná ni ndocuiñī yā jeē ni jicān tahu yā, te ni ndee yā nuū tée cáscuáha jíin yá. Te ni jito ya jeē cáquixī de, chí tuá cáhīyo ndeyí ni de cacān tahu de jeē cácuíhyá ndasí ni de. ⁴⁶ Te ni cahān yā jíin de:

¿Naun cáquixī rō? Nonda te cacān tahu rō jeē chindéé ñáhán yá rohó jeē ma sáha ró cuéchi jeē cóto ndee jeneé röhó. Achí yá.

Jeē ní cajñi de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jíin yá, yósnuu de nuū ñáyuu un véji de. Te

ni quee de nde nuū Jesús, te ni techūhú de ya, te súcuān ni nastúu de ya. ⁴⁸ Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró ruhū, Yaā ní nduu tēe? Achí yá.

⁴⁹ Te tēe cáhīn jíin yá, ni cajito de jeē ní quejéé cúu, te ni cacajñūhún de ya:

¿A ndonda ná jíináhan ná síquī de jíin espada? áchí de.

⁵⁰ Te ñn de ni stují de mozo sutū cujéhnū ga, chí ni jehnde de sōho lado váha. ⁵¹ Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de. ⁵² Te ni cahān yā jíin sūtū cácujehnū jíin tēe cándiso jñíñu ini templo jíin táca tēe jéhnū jeē ní quecoo de jeē jñí de ya:

¿Te va tēe cuíhná cúu ri jeē véjicoo ró jíin espada jíin yujnu jeē jñí ró ruhū jeē súcuān? ⁵³ Tāca quíví ni ine ri jíin ró jíináhan ró ini templo cáhnu, te tu ní cájñí ró ruhū. Te vijna te ni quee hora jeē jñí ró ruhū jíin jéē sáha ró táca jñíñu jeē ndácu jeneé jéē ndeé núu néē. Achí yá.

Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajñí de ya cuango de jíin yá vehe sutū cujéhnū ga. Te Pedro chí jíicá-ni ndíquín de ya. ⁵⁵ Te tācá policía ni cascáyú de ñuhūn ini patio, te ni condúu de yuñúhún un cáyūcú de. Te suni ní cucōo Pedro jíin de. ⁵⁶ Te ñn ñahan jéjñíñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yáha suni ni jica de jíin tēe ún, áchí ña.

57 Te máá de tu ní cáchi de, chi ni cahān de:

Tu jíní rī tēe ún, áchí de.

58 Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan tāca tēe un cúu ró, áchí.

Te ni cahān Pedro:

Nasūu cúu ri, hombre, achí de.

59 Te ni cuu nájnūhun ñn hora gā, te ni cahān nīhin inga de:

Jendaá ndije jeē tēe yáha ní jica de jín tēe ún, chi suni tēe región Galilea cúu de, áchí de.

60 Te ni cahān Pedro:

Hombre, tu jíní rī na jnūhun cáhán rō.

Te sá súcuan cáhán gā de, te ni cana-ni líhli.

61 Yūcuán na te ni ndió cóto máá Jítoho yō, te ni jito ya nuū Pedro. Te ni nucūhun ni de jnūhun ni cahān yā jín de: Nde ná tu cana líhli, te yūhu ró te cahān rō unī jínu jeē tu jíní rō ruhū. 62 Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē ní casácatā de nuū yā

(Mt. 26.67-68; Mr. 14.65)

63 Te tāca tēe cándito Jesús, ni casácatā de nuū yā, te ni cacani de ya. 64 Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

65 Te cuehē gā jnūhun súcuan ni cacahān neé de jín yá.

Jeē ní indichi Jesús nuū junta tēe cácujeñnu ga

(Mt. 26.59-66; Mr. 14.55-64; Jn. 18.19-24)

66 Te jeē ní cundijin, te ni candutútú táca tēe jéñnu cándacu jniñu nuū ñayuu hebreo, jín sūtū

cácujéhnu, jíin tée cástéén tutu ley Yaā Dios. Te cuangoo de jíin yá nuū junta tēe CÁCUJÉHNU ga, te yūcuan ní cacajñuhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhán rī jeē suu ri cúu, te ni ma candíje cuiṭi rō. ⁶⁸ Te suni núu cajñuhun máá rí rohó jíjnáhan ró, te suni ma stió cuiñí rō nuū rī, ni ma siaá rō ruhū. ⁶⁹ Te ruhū, Yaā ní nduu tēe, tāca quívi jeē quíji conene ri lado váha máá Yaā iyó poder, achí yá.

⁷⁰ Yūcuán na te ndihí de ni cacajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíni ñuhún yó núu súcuan? Chi ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíjnáhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuiñí ndihí de, te cuangoo de jíin yá nuū Pilato. ² Te yūcuan ní caquejéé de cácahān de cuēchi siquī yā:

Ni canihīn na tée yáha jéé stóna de ñayuu siquī tohō. Te cáhán de jeē tú vāha jeē cuāha ná xuhun renta nuū rey nación Roma jeē ndácu jniñu nuū nación na. Te suni cáhán de jeē maá de cúu Cristo, Rey jeē ní tají Yaā Dios. Achí de jíjnáhan de.

³ Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájñūhun cáhán rō, achí yá.

⁴ Te ni cahān Pilato jíin sūtū cácujuhnu jíin ñayuu cuehē ún:

Tú ni ññ jñūhun stívī cáhán tēe yáha jéē nihín rī cuēchi siquī de, áchí de.

⁵ Te máá de víhyá gā ni cacahān de:

Tēe yáha stóna ndasí de ñayuu siquī tohō jíin jñūhun stéén de ní Judea. Chi ni quejéé de stéén de nde Galilea, te vijna te nde yáha, áchí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajñūhún de ñayuu núu tēe región Galilea cúu ya.

⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quivī ún suni íne Herodes ñuu Jerusalén. ⁸ Te nuū ní jito de nuū Jesús, te yōhyo ni cusī ni de, chi je ni cuu cuehē tiempo jeē cuní de coto de nuū yā. Chi ni nihín de jñūhun ya, te ñūhun ni de jeē sáha ya ññ jniñu jénu coto de. ⁹ Te ni cajñūhún de ya cuehē jñūhun, te tu ní stío cuíñī yā ni ññ jñūhun nuū de. ¹⁰ Te suni cáhīn táca sūtū cácujuhnu jíin tēe cástéén tutu ley, te nihín ni cacahān de cuēchi siquī yā. ¹¹ Yūcuán na te Herodes jíin táca soldado de ni cacahān neé de jíin yá, te ni casácatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato. ¹² Te máá quivī un ní candumanī jñáhan Pilato jíin Herodes, chi ichi yátá ni caquītī jñáhan ni de.

*Jeē ní cundaā jeē cúū yā
(Mt. 27.15-26; Mr. 15.6-15; Jn. 18.39-19.16)*

¹³ Yūcuán na te ni cana Pilato tāca sūtū cácujeñnu jíin táca tēe cándiso jniñu jíin táca gá ñayuu, ni candutútú. ¹⁴ Te ni cahān de:

Ni caquindeca ró tēe yáha núū rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jíinū rō. Te tu ní níhín rī ni ñn cuēchi siquī de nájnūhun jeē cácahān rō. ¹⁵ Te ni Herodes, tu ní níhín de, chi ni natají tucu de tēe yáha núū rī. Te tú cuiti ni ñn cuēchi ní sáha de jeē cúū de. ¹⁶ Núu súcuan te na cuáha ri castigo de, te siaá rī de quihīn de, áchí Pilato.

¹⁷ Te íyó costumbre jeē tācá vico pascua siaá Pilato ñn preso jeē cuní ñayuu. ¹⁸ Te ñayuu cuehē ún, inuú-ni ni cacana jee i:

Na cúū tēe jííá, te siaá ní Barrabás, achí i.

¹⁹ Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyí.

²⁰ Te Pilato cuní de siaá de Jesús, te ni cahān tucu de jíin ñáyuu. ²¹ Te máá i víhyá gā ni cacana jee i:

Cata caa ní de jicā cruz, na cúū de, áchí i.

²² Te ni cahān tucu de jíin i vuelta unī:

¿Na cuēchi ni sáha de núu súcuan? Tu ní níhín cuiti rī ni ñn cuēchi siquī de jeē cúū de. Núu súcuan te na cuáha ri castigo de, te siaá rī de quihīn de, áchí Pilato.

²³ Te víhyá gā ni cacana jee ñayuu un, ní cacahān nīhin i jeē na cúū yā jicā cruz. Te máá i jíin táca sūtū cácujeñnu, ni cacana jee ndasí i. Te ni cacundeyí i ni cascāhān i Pilato jeē na cúū yā. ²⁴ Yūcuán na te ni ndacu Pilato jniñu jeē na cóo nájnūhun cácuñi i. ²⁵ Te ni siaá de tēe jeē ní cajicān i, tēe jeē íne

vecāa jeē ni stónnda de ñayuu siquī tohō te ni jehni de ndīyī. Te ni jēhe de jnūhun jeē na cúū Jesús nájnūhun cáccuni i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuangoo tācá soldado jíin yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendiji de jeē ni jéhēn de rancho. Te ni catejníñu de tēe un jēe cóndiso de cruz yā quihīn de yatā yā.

²⁷ Te cuehē ndasí ñáyuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cáccucuíhyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyū rō jehē maá ró jíin jéhē sēhe ró jíin áhan i. ²⁹ Chí quee quivī jeē coo jnūndóho xeēn siquī rō, te cahān rō: Yōhyo ndetū tācá ñahan númá, jíin jēe tu ní scácu sēhe, jíin jēe tu ní cóndeca yiquín, chí tú sēhe ña jeē jnahuhū ni ña jeē ndóho i, achi rō jijnáhan ró. ³⁰ Quivī ún te quejéé ñáyuu cahān i jíin táca yucu: Cotúú síquī rī jijnáhan ri návāha cuu rī. Te suni jíin táca loma: Casi siquī rī jijnáhan ri, achi i. ³¹ Chí núu casáha xeēn i jíin rúhū jeē tú na cuēchi ri, te nagā ni cuu jeē ma cóo xeēn siquī ndihī ñayuu chí íyó cuēchi i. Achí yá.

³² Te suni cuangoo de jíin ūū tēe ni casáha cuēchi xeēn, jeē suni cuu de jíin yá. ³³ Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndíndúú tēe ni casáha cuēchi xeēn un núū uū gā cruz, ñn de

lado váha ya, te inga de lado jecó yá. ³⁴ Te níní jéē súcuán cúu, te ni cahān Jesús:

Tátā, cone cáhnu ni ni núū de jíjnāhan de, chi tu cájini de na vé casáha de, áchí yá.

Te soldado un ní casáha de sorteo jeē siquí ndese nihīn ñn ñn de sahma ya. ³⁵ Te cáhīn ñayuu yūcuán, cájito i nuū yā. Te suni nde tēe cándiso jníñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te tācá soldado suni ni casácatā de nuū yā, chi ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jíjn yá:

Núu máá ró cúu Rey ñayuu hebreo, te na jnáma ró máá ró, achí de.

³⁸ Te suni ni ĩyo jñūhun jeē ndeé xinī cruz yā jeē cahán na siquí ni jíhī yā, te suhva yósó jíjn yuhu griego jíjn latín jíjn hebreo: Yāha cúu Rey ñayuu hebreo, achí.

³⁹ Te ñn jeē ndīndúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndīndúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi ĩnuú cándoho yó jíjn Yaā yáha. ⁴¹ Te máá yó chi vetū-ni cándoho yó, chi yāha cánihīn yō castigo siquí jniñu neé ní casáha yó. Te Yaā yáha chi tú ni ñn cuēchi ní sáha ya, achí de.

⁴² Te ni cahān de jíjn yá:

Jesús, nucūhun ni ni sáña jéē quéjéé ní ndacu ní jniñu, áchí de.

⁴³ Yūcuán na te ni cahān Jesús jíin de:
Jendaá cahán rī jíin ró jeē víjna te condee rō jíin
rí nuū jardín andiví, áchí yá.

Jeē ni jíhī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee
ní cáhnu nde cahunī. ⁴⁵ Te ni cujnuú níandii. Te
sahma ndíta caa jeē ndihyú cuarto iī ini templo
cáhnu, ni ndatā-ni sava sava. ⁴⁶ Yūcuán na te ni
cana jee Jesús:

Tátā, naquihin ní ánuá na, áchí yá.

Te súcuan ni cahān yā, te ni jíhī-ni ya.

⁴⁷ Te tēe nación Roma jeē cúu capitán ni jito de
jeē súcuan ni cuu, te ni cahān de jeē yóhyo cújéhnu
Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí
de.

⁴⁸ Te ndivii ñayuu cáhīn yūcuan ní cajito i tāca jēe
ní cuu, te cácani i yīqui jíicā i jeē cájnahuhū ni i, te
ni nandió cóo i cuanungoo i. ⁴⁹ Te tāca ñayuu cájini
jnáhan jíin yá, jíin tāca ñahan Galilea jeē ní cajica ña
jíin yá, cáhīn jíicā ña cájito ña tāca jēe ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni iyo ñn tēe vāha tēe ndaā, nání de José.
Te tēe ñuu Arimatea ndañū Judea cúu de. Te cúu
de jnáhan tāca tēe hebreo cácuje hnu ga jeē casáha
junta. ⁵¹ Te ñūhun ni de jeē quiji quiví jeē ndacu
Yaā Dios jniñu, te suni tu ní nújnahan ni de jeē ní
casándaā junta un jēe cúu Jesús. ⁵² Te tēe un ní
jehēn de nuū Pilato, ni jíicān de yīqui cúñu Jesús.
⁵³ Te ni snúu de ya jíicā cruz, te ni chusúcún de ya ñn

sahma cuitá. Te ni chindūji de ya ini ñn yaū jeē ní caan jicā ñn cava, nuū ná tu quindūji ndīyi. ⁵⁴ Te quivī un cúu quivī casátūhva ñayuu, chi jehíni un quéjéé quivī ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña tācá perfume jíin aceite yucū jeén asīn. Te ni candetátú ña quivī ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahá ña tācá perfume jíin aceite ni casátūhva ña. Te suni cuangoo sava ga ñahan jíin ña. ² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi. ³ Te ni quivīcoo ña yaū ún, te tuá yiqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndīyi. Sáa te ni cajito ña uū ndajéhé Yaā Dios jeē cáa nájnūhun tēe, cáhīn ya xiin ña, te cáñūhun ya sahma ndíndéé. ⁵ Te yōhyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu? ⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhīyo cuēchi, jeē

jn̄i de ya cahni de ya jicā cruz, te nuū uní quiv̄i te natecu yā. Achí ndajéhé un.

⁸ Yūcuán na te ni canucūhun ni ña tāca jnúhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núū ndihúxí ñn apóstol jíin núū tāca gá de. ¹⁰ Te ñahan ní canacani jnúhun yáha núū tée cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tācá apóstol chi cájeni ni de jeē jnúhun cánéé cáñúú cácahān ña, te tu ní cácandíje de.

¹² Te vēsú súcuan, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán nāā ni de jeē ní jito de jeē tuá yā.

*Jeē ní ndajnúhun yá jíin úū de ichi cuáhán Emaús
(Mr. 16.12-13)*

¹³ Te suu quiv̄i un cuángoo uū jnáhan de ñn ñuu naní Emaús, jeē jicá nájnūhun uxī ñn kilómetro jíin ñuu Jerusalén. ¹⁴ Te cándajnúhún de siqūi tācá jniñu jeē ní cuu ún. ¹⁵ Te níiní cándajnúhún de te cácajnūhun jnáhan de, te máá Jesús ni cuyajni ya yatā de, te jica ya cuahān yā jíin de. ¹⁶ Te ni sáha jíin de jeē tu ní cánacuni de ya, vēsú cájito de nuū yā. ¹⁷ Te ni cajnúhun yá de:

¿Na jnúhun cándajnúhun ró cájica ró? ¿Te najehē cácuuhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Ndih̄i cuiti ñayuu cájini i tācá jniñu ní cuu ini ñuu Jerusalén tāca quiv̄i yáha. ¿Te á máñúhún-ni nihín

cúu jeē ní quee ní ñuu un jéē tu jíní ni na vé ni cuu?
Achí de.

¹⁹ Te ni cajñūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jíin poder Yaā Dios ni sáha ya tācá jniñu jéhnu te ni nacani ya jñūhun, jíto jíinū Yaā Dios jíin táca ñáyuu. ²⁰ Te sutū cácujuhnu jíin tée cándiso jniñu nuū ná, ni canastúu de ya nuū tāca tée Roma, te tēe un ní casándaā de jeē cúu yā jicā cruz. ²¹ Te máa ná ní cañūhun ni na jéē maá yá jnama ya nación na Israel nuū ñáyuu Roma nuú. Te siquē tācá jniñu yáha, te ni cane inga jñūhun. Chi vijna je íyó úní quivī jeē ní cuu ún. ²² Te sava ñahan cájini jnáhan ná jíin, ni canacani ña in jñūhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyí ún. ²³ Te tuá ni cájito ña yiqui cúñu yā. Te ni ndecoo ña nuū na jíinán ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū ndīyí ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuítí de nuū yā.

²⁵ Yūcuán na te ni cahān maá yá jíin de:

Tēe tu cájecūhun cuítí ni cácuu ró. Yóhoyo uhū cácandíje ró táca jnúhun Cristo ni cacahān tēe ni canacani jñūhun Yaā Dios nde jenahán. ²⁶ ¿Te á tu súcuan ní jíni ñúhún ndoho Cristo tāca jnúndóho yáha, te sáa te quínuhun yā nuū lúu cujéhnu ya? Achí yá.

²⁷ Te ni nacani cájí yá tāca jnúhun jeē yosó núū tútu ìi jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā tāca jnúhun jeē ní catee tēe ni canacani jnúhun ya nde jenahán.

²⁸ Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quīvi ya jeē quéndōo ya jíin de.

³⁰ Te nuū ní cucōo ya mesa jeē cáji yā jíin de jíináhan de, te ni quihin ya staā, te ni jicān tahu yā, te ni tahu cuéchí yá, te ni jēhe ya nuū de. ³¹ Te jeē sáha ya súcuan, te nájnūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. ³² Te ni cacahān maá de:

Jendaá jeē yóhyo ni cacusi ni yō ná ni nacani ya jnúhun nuū yō ichi ún te ni castūhun cájí yá jnúhun cáhán tutu ìi. Achí de.

³³ Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí ñn ga apóstol, cáyūcu tútú de jíin sava ga jnáhan de. ³⁴ Te ni cacahān tēe cáyūcu tútú un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíináhan de.

³⁵ Yūcuán na te ndindúú tēe un ní canacani de jnúhun ndese ni najnáhan ya jíin de ichi, jíin ndese ni canacuni de ya ná ni tahu cuéchí yá staā.

*Jeē ní nane ya nuū tēe cáscuáha jíin yá
(Mt. 28.16-20; Mr. 16.14-18; Jn. 20.19-23)*

³⁶ Te sá cácahān gā de tāca jnúhun yáha, te ni jecuiñi-ni Jesús mēhñú de jínáhan de. Te ni cahān yā jín de:

Ndeyí sñ coo ni rō jijnáhan ró, áchí yá.

³⁷ Te ni candacoto iyo de, ni cayūhú ndasí de, chi ni cajeni ni de jeē ñn ánuá cúu ya. ³⁸ Te ni cahān yā jín de:

¿Naun cáyūhu ró, te naun cájeni siquí ni rō súcuan? ³⁹ Condēhé ndaha ri jín jéhē rī, te cuni rō jeē maá rí cúu. Jñi ruhū te cuni rō, chí ñn ánuá tu névāha cūñu ni yiqui nájñūhun cájito ró jēé névāha máá rí, achí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yñi ndūyu cāa. ⁴¹ Te yōhyo ni cacusiñi ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jín de:

¿A cánevāha ró jecu jeē cáji rī yāhá? áchí yá.

⁴² Yūcuán na te ni cajēhe de ñn pedazo chācá ní tau nuū yā, jín ñn pedazo ñahmā ndūxi yocō. ⁴³ Te ni quihin ya, te ni yeji yā nuū de jijnáhan de. ⁴⁴ Te ni cahān yā jín de:

Tāca jēé ní cuu jín rí cúu jeē ni cáhān rī ná ni ine ri jín ró jijnáhan ró ndé saá, jeē cánuú squícu tāca jnúhun ri jeē yosó núu tútu ley Moisés, jín núu tācá tutu tēe ni canacani jñūhun Yaā Dios, jín núu tútu salmo, achí yá.

⁴⁵ Te ni nune ya jeē níjnūní de, návāha cuu jecūhun ni de tāca jēé cahán tutu iī. ⁴⁶ Te ni cahān yā:

Súcuan cáhán nuū tútu jeē ruhū Cristo, cánuú cuu rī, te nuū uní quivñi natecu rī. ⁴⁷ Te cuitē núu jñūhun

ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuítē núu jnūhun yáha, te quihīn nuū ñáyuu tācá nación. ⁴⁸ Te máá ró cácuu tēe nacani jnūhun tācá jniñu ní cajito ró. ⁴⁹ Te tají rí Espíritu Santo quiji ya nuū rō jijnáhan ró, nájñūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quiji nde andiví. Achí yá.

Jeē ní ndaa ya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de. ⁵¹ Te níni jícan tahu yā jehē de, te ni cujiyo-ni ya nuū de, ni ndaa ya cuanuhun yā andiví. ⁵² Te máá de ni cachiñúhún de ya. Te sáa te cuanungoo de ñuu Jerusalén, te yōhyo cácusī ni de. ⁵³ Te níni cáhīn de ini templo cáhnu, cánacuatáhú de nuū Yaā Dios. Te ni cuu. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f